

明

書

一九





書 明

(九十)

纂 鱗 維 傳

明書卷一百一

列傳二

忠節傳一

史官論曰。孔子稱伯夷。叔齊曰。求仁得仁。又何怨乎。怨不怨。聖人所難言也。夫人生也直。圓刃委曲。豈性所樂哉。利害炎於中。安危交於外。感慨未已。而悔吝隨之。故意變於初。而行枉其性也。若夫嚴氣正志。赴蹈爲期。指刃鑊以旌心。凌風霜而辨業。懷懷皜皜。豈利害安危之可動其中耶。而死生尤其大焉者。於是乃憮然曰。人臣死生之際。顧不重哉。丁國家傾仄之運。昏濁之朝。或沈惑僻毒。或鼎圖囓震。而夷然若無預。此人世之大僂也。若夫見理明決。義不返顧。以片言溥仁人之利。亢章而進。力足回天。不惜血碧幽藏。卽頻危而不死。而視湯沸刀鋸。如飴之甘。屹然如山。峙而不轉。使天下萬世仰之如恆。岱焉。不亦休乎。亦有委折以濟事。留身以有爲。卒之時過事遷。勢無如何。遂曉然白於天下。以見前之所以生。爲後之所以死。而人乃服於其驟。以釋其疑。設相時之所譽。以嚮直。以至主憂臣辱。主辱臣死之秋。而曰我致死而未獲。駕言明哲之保。爲藏身之巧。伊誰欺。欺天乎。縱頸血不濺。頭顱苟全。而其心則不勝誅矣。若君死之自死之。可死而幸勿死焉。而天下萬世頌之。懷然有生氣。一時之生終死。一時之死終生。人臣儻錫。不以樸

賊予君而斤斤於生死之名焉。其品已卑。況彼夷然若無預者哉。如明之持初節。膏戰場。遭燕難。爭大禮。罹極禍。遇喪亡。而能碧血殷郊原。漆身溷豎牧。卽截支體燔九族而不悔。而甲申之變。妻徇其夫。子隨其父。闔門雉經。視死若歸。真足以泣鬼神而動天地。而或抗顏直諫。至於流離沈滯。氣壯河山。如此者皆人傑也。爰錄於篇。以媿天下萬世之爲人臣而不忠節者。人臣死生之際。顧不重哉。若而人其古之求仁者歟。嗚呼。此皆明興來祖宗教養之遺澤也。平時無犯顏敢諫之士。臨難必無仗節死義之臣。養士者鑒之哉。養士者鑒之哉。

王綱

附王名
善陳敬 王禕 附子紳

孫炎、葉琛、許璣、王愷、熊鼎、附黃 胡深傳

王綱一名性常。字德常。温州人。弟秉常。敬常。並以文學知名。綱尤善識鑒。有文武才。少與族人元章、永嘉高則誠相友善。往來山水間。時人莫知測也。元末嘗奉母避兵五洩山中。有道士夜投宿。綱異其氣貌。禮敬之曰。君必有道者。願聞姓字。道士曰。湖南隱士趙緣督也。與語達旦。因授以筮法。且爲筮曰。公後當名世。然不克終牖下。今能從吾出遊乎。綱以母老有難色。道士笑曰。俗緣未斷。吾固知之。劉基微時。常造語不忍去。謂曰。子真王佐才。然貌微不稱其心。宜厚施而薄受之。予性在邱壑。異日得志。幸勿以法見累。則善矣。基薦綱於太祖曰。王綱命世才也。洪武四年。以文學徵至京。時年已七十。齒髮精神如少壯。上見而異之。親策治道。大悅。拜兵部郎中。未幾。潮民弗靖。擢廣東參議。督兵糧。謂所親曰。吾命盡茲行乎。致書與

家人訣。攜其子彥達以行。至則單舸往諭。民咸叩首服罪。事竣。歸增城。遇海寇曹真鼓噪突至。截舟。願得爲帥。曲諭不從。叱罵之。遂共擁而去。賊爲壇坐網。日羅拜請不已。網痛罵不絕聲。遂遇害。時彥達年十六。亦隨入賊中。從旁哭罵求死。賊欲并殺之。其曾曰。父忠而子孝。殺之不祥。與之食。不顧。賊憫其誠。孝。令綴羊革裹屍。負之而出。歸葬禾山。洪武二十四年。御史郭純上其事。得立廟死所。錄用彥達。痛父以忠死。力耕養母。粗衣惡食。終其身不仕。時有王名善。義烏人。洪武七年。爲高州府通判。四年秋八月。黨寇羅子仁劫奪府印。逼名善附之。名善罵賊不屈。執至霞峒新營。遂遇害。未幾。寇平。旌名善。又有陳敬。世家增城之石灘。洪武十四年。以賢良舉授禮部主客司郎中。遇事剛果。敢爲人多忌之。以事左遷。雲南曲靖府經歷。尋署劍川州事。劍川鄰寇竊發來攻。敬率壯士禦之。衆寡不敵。其下欲退。敬瞋目大罵。賈勇前進。遂力戰而死。軍民咸聚哭。收其屍。事聞。命有司恤其喪以歸。

王禕。字子充。烏人。幼秀爽奇敏。義及長。長身山立。屹有偉度。習古學。師事黃潛。戊子。元政亂。公爲書七八千言上時宰。以切直格不聞。危素。張起巖並薦不報。隱青巖山著書。戊戌。被徵。署中書省掾。商略幾務。上每稱子充而不名。間與論文章稱善。因命摭故實爲四言詩授太子。辛丑。江西平。禕上頌。上覽頌喜。歎曰。吾固知浙東二儒。卿與宋濂。學問之博。卿不如濂。才思之雄。濂不如卿。癸卯。授江西儒學提舉司校理。外艱。乙巳。除禮侍郎。兼引進使。定議禮制。遷起居注。丙午。陞同知南康府。禕披榛莽。建府署。撫瘡殘。集流散。收廩賢士。摻除姦蠹。經理廢壞。郡得安輯。賜黃金帶。丁未。召議卽位禮。忤旨。洪武元年。降漳州府通判。尋

上疏言。上天以生物爲心。雷霆霜雪。有時而搏擊。有時而肅殺。然皆暫而不常。向使雷霆霜雪。無日不有。則上天生物之心息矣。又曰。修德之要。忠厚以存體。寬大以致用。無外法天道以順人心二者。二年。召修元史。與宋濂爲總裁官。徵逸士汪克寬。胡翰。宋僖。陶凱。陳基。趙增。曾魯。高啓。趙訪。張文海。徐尊生。黃篔。傅恕。王綺。傅著。謝徵。十六人爲纂修官。開局天界寺。禋史事擅長。裁繁剔穢。力任筆削。書成。拜翰林待制。同知制誥。坐失朝降國史院編修。三年。預教大本堂。經明理達。善開道。召對殿廷。必賜坐。從容宴語。奉使吐蕃。尋召還。五年。往雲南諭元梁王把而刺瓦爾。既至。抗首皇上。聰明神聖。天人所歸。惟爾僻在西南。久阻聲教。故遣使者來諭意。亟宜奉版圖。歸職方。官封如故。身名俱全。不然。天討且旦。夕至。梁王不聽。館別室。數日。又諭曰。朝廷以雲南百萬生聚。不欲殲於鋒刃。今元綱解紐。天兵四征。不五六年。天下大定。爾恃險遠。屢拒明命。龍驤鷁艦。會戰昆明。悔無及矣。梁王駭服。有降意。卽爲改館。會元遺孽自立於沙漠。遣使脫脫至雲南。覲梁王。有二心。迫殺我使。以固其意。梁王持兩可。不決。匿樟春登楊氏家。脫脫聞之。誚責梁王。不得已。出樟。脫脫欲降之。不屈。罵曰。天訖汝元命。實代之。燭火餘燼。尙欲與日月爭光耶。我將命遠來。豈爲汝屈。有死而已。顧梁王曰。大兵旦夕至。屠梁矣。傍有解者。脫脫曰。今雖孔聖。義不可生。竟被害。司徒達里麻等殮而火之。既葬。莫實其處。時六年十二月也。年五十二。雲南既平。立祠祀之。著有華川前後集。玉堂雜著。續東萊大事記。子紳。字仲縉。父死時。甫十三。明悟能文章。鞠於伯氏。授事母何盡孝。及卒。哀毀踰禮。未幾。綬亦沒。獨傑然負奇志。益取經史百氏言。窮其浩博。會其旨歸。曲暢引之。縱橫磅礴。出入上下。務

探擷精英乃已。潛溪先生一見器之曰：吾友其有後乎？蜀王能下士聞之聘以爲客。紳孺父死節蠻徼遺骸未返，白其事。王憫之，給道里費以行。二十九年，至雲南，號哭訪求不獲，幾絕者數。過者洒泣，述滇陽慟哭記志感，乃還。建文皇帝卽位，給事中涂誠、御史黃凱會薦爲國子博士，預修太祖實錄。獻大明鏡歌，鼓吹曲十二章。曰：神龍躍，曰：殪奔鯨，曰：開洪基，曰：清江漢，曰：縛狡兔，曰：墜殘虜，曰：海波平，曰：拓閩境，曰：定關陝，曰：闢川蜀，曰：散苞苴，與方孝孺友善。嘗尊孝孺爲百代儒宗，每勸著書淑來學。孝孺不應，紳悟遂略文藝。潛心道德，尋上言父死節狀，贈棹翰林學士，諡文節。明之文臣有諡自棹始。正統中，改諡忠文。紳以建文二年卒，年四十一，有繼志齋集二十卷行世。子稔，字叔豐，受業方孝孺，妻以女。方死難，稔周旋其間，又與廖鏞、鄭珣等至聚寶門外求遺骸歸葬，不得，卒坐逮繫。太宗念其祖死國，特宥免，且欲用之，疾辭還金華，結屋讀書青巖之下。稔與童景庸書信，痛念遜志名蹟，日就湮沒，欲執事與令兄商權，摯輯其學行幽潛，生平始末爲家傳行狀，以傳同志。有愛慕之心者，自能默識謹藏，或可待時發揚於萬一。遂輯方氏遺文爲侯城集。稔性至孝，初紳痛念父沒，每食必斥兼味。稔一遵遺志，子孫相承，閱千百年不變。居喪三年，酒肉未嘗入口。學問該博，從遊者日衆。郡邑交重之，禮爲鄉賓，分獻先聖廟。稔疏髯偉貌，出必儼然古冠服。人爭覩之，曰：此王先生也。所著有青巖藁、聖廟文纂、金華賢達傳、續文章正宗。卒年五十九，門人私諡曰：莊先生。稔子汝舉進士，授中書舍人，亦辭疾不仕。弘治初，與陳獻章並薦，應召道卒。

孫炎，字伯融，句容人，面如鐵，跛一足，持辨風生，能爲歌詩。時丁復、夏煜以詩名，炎遊此兩人間，相切劘，好

立機括。觸紙爛然。雅能飲。與對引務出奇。得一爽句。輒浮白拍案大呼。拔劍起舞。亦以經濟自負。氣豪才雄。蔑視章句。常曰。孫炎男子。豈死蓬蒿下哉。太祖渡江。召見與語。請延攬賢士。以成大業。上悅。辟行省掾。論事慷慨激切。多合上心。從征浙東。擢池州府同知。尋遷華陽知府。己亥。擢行省都事。是年冬。處州初下。山澤間盜賊憑結不解。甚難治。上以炎才。授處州總制。聽其辟任。一切不從中覆。上實未嘗與一兵。但責以口舌安反側。乃匹馬入城。召父老。諭以天命所集。宜稟教化。不且爲僂。衆皆感悅。尋擇勇健者練爲兵。紀律嚴明。賊皆退縮。時才俊士因亂多伏居山谷不肯出。炎悉爲鉤至。劉基。章溢。葉琛皆知名。而基爲最。使者再往返不起。基以一寶劍遺炎。炎作詩。以爲劍當獻之天子。斬不順命者。我人臣不可私受。封還之。草數千言。諭基。文詞瞻美。基不答。然已心折炎。久之相見。飲酒酣。炎論古今成敗之事。如傾峽。略無枝複。基乃深引服。歎曰。基自以爲勝公。審今基何敢望。會上來聘。遂送基京師。炎在郡日。悉反側子。而大寇充斥。日置身狼虎間。無所疑憚。壬寅。降苗叛。害將軍耿再成。炎被擒。幽空室守之。脅炎。炎始給以生。賊觀非本情。恐留自遺患。燼鴈斗酒。噉炎曰。以此與公訣。炎拔劍割鴈。舉卮酒曰。嗟呼。我乃爲鼠輩所陷。爾死。犬豕且不爾食。賊持刀睨炎。炎飲酒自如。賊叱解衣。炎罵曰。此紫綺衣。上所賜。吾當服以死。何可解。引枕而臥。賊猶不忍。伺其睡。乃害之。年四十。事聞。追封丹陽縣男。炎妻亦爲賊擒。不屈死。炎事親孝。與人交。緩急可恃。遇匱乏者。解衣推食。所著詩文甚多。有散佚。弟子蔣敬編次傳於世。

葉琛。字景淵。麗水人。元季兵亂。從參政石抹宜孫守處州。時青田葉賢三等作亂。琛爲畫策捕斬之。其餘

山寇竊發者。以次翦滅。行省承制授元帥。守桃花寨。明兵下處州。琛謂其下曰。金陵兵有紀律。且氣候清明。必成大事。遂來降。而又爲孫炎所招致。僉院胡大海以琛偕劉基送建康。辛丑。授營田司僉事。復命同佐鄧愈守洪都。祝康之亂。愈脫走。琛被執不屈。大罵死之。事聞。上痛悼。遣使往祭。追封南陽郡侯。復其家。塑像於院。判耿再成之祠。有司歲時祀。後友諒滅。配享洪都功臣廟。

許環。字粟夫。江西樂平人。聰明強記。至正中。兩以易經舉於鄉。皆第一。會試不第。放浪吳越間。每醉輒大言自負。人未有知之者。戊戌。太祖駐兵婺州。環以儒士進謁。因言于上曰。方今元祚垂盡。四方鼎沸。豪傑才勇之士。勢不能獨安。夫有雄略者。乃可馭雄材。有奇識者。然後能用奇士。欲掃除僭亂。宜攬收英雄。此急務也。上曰。民塗炭。予用英雄如饑渴。大善之。授博士。留帷幄。參謀議。以太平股肱郡。命知府。環至。厲士卒。修城池。撫黎庶。庚子。漢友諒率舟師攻太平。與守將花雲拒戰。城陷被執。罵不屈死之。追贈高陽郡侯。王愷。字用和。當塗人。幼有大志。通經術。爲府吏。人服其平。乙未。太祖渡江。召至幕府爲掾。參決戎事。時新下京口。民杌隉不安。遣慰撫之。效建中書省。進左右司都事。遇事彌綸。元戎宿將。咸信其言。戊戌。獠兵數萬自杭來降。待命嚴陵境。上遣馳至軍諭之。偕其渠帥來朝。是年冬。胡大海已戍蘭谿。命與愷定議。取婺降之。己亥。克三衢。擢左司郎中。總制衢州軍民事。調度有方。兵食俱足。有警。以五丁應付。一丁攻守。凡得萬餘人。會常遇春屯兵金華。其部將或侵民。愷知之。悉械而撻諸市。遇春使人來讓。報曰。民者國之本。將軍天子股肱。肯令傷其本乎。撻一部將而民安。計將軍所樂聞也。遇春歎美之。開化馬宣挾舊印爲亂。江

山楊明恃險劫掠。悉討擒之。部內大安。出粟賑饑疫。興學校。士民悅服。諸暨戍將謝再興與部帥王甲有違言。幾致亂。力調解得安。往來李文忠軍中議事。多用其策。六月。漢寇龍江。上召嚴陵帥葛俊擣廣信牽制之。愷謂俊曰。廣信爲漢門戶。彼旣傾國入寇。必以重兵爲守。非大將統全師往不可。乃止。俊請胡大海行。廣信乃潰。辛丑。分省於婺。控浙東。胡大海日治軍旅。以民事悉委愷。時力役無藝。乃核故田額數。糧多者爲里正。寡者副之。合計約一斗役一日。賤貴無苟免。金華周泰。義烏柳昌。恃挾蠹民。逮至獄。痛懲之。自是畏避。猾胥潘立。道操一已。田賦柄久。緣爲姦。廉其罪狀。以聞。寘於法。綱紀肅然。苗軍亂。胡大海被害。擁愷而出。愷正色責以大義。賊帥劉震欲生之。其黨吳得真素隙愷。曰。無自貽患。乃被殺。并其子行及掾史章城俱及難。愷年四十六。追封當塗男。愷善謀。能斷。常白事未許。卻立戶外。比暮不去。上出怪而問之。從容諫如初。上爲允行。尤長史事。以儒術飾案牘。辭簡而意周。喜爲詩歌。情意爽豁。上每語侍臣。以經濟材稱之。子三。長祿。爲侍儀使。次行。同死於難。次升童。後官郎中。

熊鼎。字伯穎。臨川人。元末。鄉薦。入試禮部。以議論奇。棄不取。歸主龍溪書院。兵亂。立柵結民兵自守。一郡獨完。漢友諒禮致之。不應。鄧將軍愈下江西。聞其賢。邀至。欲薦授官。辭。上至江西。召見。慰勞甚。至。授以官。又以母老固辭。乃留愈府參軍事。母憂旣葬。徵興諸儒。撫作公子書。以訓貴戚子弟。初平浙西。授德清丞。錢鶴皋反松江。德清震恐。民逃散。鼎坐鎮之。卒得無患。吳元年。召議禮儀。遷中書考功博士。尋任起居注。時上精求禮樂之事。嘗召翰林學士朱升等。陳樂器。俾辯馨聲。升對忤旨。上怒。欲寘升法。鼎從容論解。上

曰。升每謂審音。願不辯宮徵。何耶。對曰。石音難辯。自古而然。唐虞惟后夔能和磬聲。書曰。於予擊石拊石。百獸率舞。上曰。任此豎儒治樂。樂何繇和。鼎具言樂之和由人所致。人君能致中和。則萬民和。萬物和。而樂音和矣。上怒。解釋升。升既出。謝曰。非熊君。吾屬幾殆。會有自廣信還。奏郡縣官違法。茶稅多失實。時新行赦。上怒。趨中書。遣御史往廉狀。丞相善長諫不聽。御史已受詔。丞相復諫。又不從。鼎與給事中尹正進曰。朝廷新立。將布大信於四方。今肆赦之後。復以細故而煩御史按問。既失信。且喪國威。上良久曰。止。追御史毋往。上詔浙西民輸糧京師。率五石致一石。民甚苦之。鼎曰。國家都金陵。以浙西爲根本。而遽困之。農作方興。僕僕道路。苟一年失耕。害不淺矣。上悅。卽詔罷之。明年。上卽皇帝位。凡創制更革之典。多預聞。上每字稱而不名。立浙江按察司。以爲僉事。分部台溫。二郡經方氏竊據之後。別部僞官悍將二百人。暴如虎狼。出奇計。盡刮遷於江淮間。民始安枕。溫有邪師。自號大明教。飾殿堂極麗。民之無業者咸歸焉。以其警俗眩世。奏毀之。散其衆爲農。地多倡家。每朝使以事至。多挾倡飲。有司罷於供應。鼎下永嘉。令籍倡戶數千。械送之京。平陽州吏目杜乙賊罪事發。下鞠。同知以下皆服罪。獨知州梅諡辯不已。民數百庶門爭之。鼎將聽之。吏曰。奉詔按獄。而釋知州。情則得矣。知身受故出何。再進民詢之。辭不變。歎曰。法已誅罪。吾敢身畏譴而誅無罪人乎。釋諡。以情聞。上可其奏。寧海強民陳德仲。以憾密支解黎異死。冤久滯。妻進牒鼎。鼎覽牒疑。忽有青蛙立案上。曰。蛙非黎異乎。果異則止勿動。吾復爾冤。蛙果如言。明日。逮陳訊得實。誅之。凡事未便者。皆爲奏改。兩郡民灑然如更生。始兩郡旱。既至。輒雨。民曰。此熊使君雨也。是年秋。立按

察司於山東。擇人行新政。上曰：無如熊鼎矣。改治濟南。論罷州縣貪私數十輩。六郡肅清。遷副使。三年。拜晉王右傅。治宮晉陽。坐事左遷。大同。衛知事。五年。召還。授晉府參軍。復以尚書授秦王經。明年。改刑部主事。八年。授衛經歷。時朶兒只把雖降。尚持兩端。鼎上書萬餘言。謂西涼、岐寧、漢、唐內地。不可棄。朶兒只把非有歸向之誠。特假我聲援。脅服鄰邦。爲自安計。朝廷宜思制之之道。急之則必席卷而遁。雖得其地。而無民。緩之則恐羽翼旣成。漸致跋扈。宜稍給種糧。撫其遺民。以安衆心。而以良將參守之。則彼特匹夫耳。又將安往。上覽奏。歎曰：人謂熊鼎迂闊。今不迂也。九年。徵還。次西涼打班驛。遇朶兒只把叛兵。擁之北行。以大義切責。兵脅之不屈。遂與中使趙成等皆遇害。年五十有五。上憾悼。遣使葬之。黃羊川立祠致祭。恤其家。時有黃政者。亦死難。政。碭山人。爲僉都御史。以事謫爲桂林府吏。或言其知兵習武。書召還。八年。命往宿。徐收集舊戰士卒。赴遼西從征。二十一年。復從征雲南。未幾。還至普安。遇夷寇。與其子琬力戰而死。

卹典比鼎。

胡深。字仲淵。處州龍泉人。穎拔有智略。涉獵經史。及天官術數之書。父銍。仕元爲征東行省左右司員外郎。嘗對母趙談兵。父聞警之曰：才雖撥亂。智在識主。父宦游京師。深年十歲。往侍。父使高麗歸卒。奉柩南還。廬墓。益讀書。尤工文辭。元末。兵亂。歎曰：浙水東地。氣盡白。禍將及矣。結鄉里自固。石抹宜孫辟參軍事。募兵。浹日間得數千。引屯竹口。時盜賊所在結聚。往諭曰：爾皆良民。迫至此。棄伏卽良民耳。盜以深長者不欺。遂降。會韓虎等殺主帥。據城叛。深曰：城中叛者。惟一二人耳。請往諭之。軍民見深。相泣曰：吾屬自度。

且暮鬼耳。若得更生，敢不惟命。遂以城降。從征鄱陽賊。青田潘惟賢聚衆不叛。龍泉長吏聞風遁去。賊焚縣治。深之師曰：王毅者，隱德教授，乃與門弟子集義兵搗退之。里中惡少年疾其功，因害毅。時深在鄱陽，馳歸執肆害者盡殲之。移師攻遂昌，賊曾出戰，深望見笑曰：賊若堅守不出，未易即滅。今來，是天授我也。分部諸校，以正兵接戰，奇兵夾擊之，別遣遊兵擣伏匿。比戰，賊三面被擊，大敗，生擒八百人。明兵取浙東，婺衢既下，獨處州爲石抹宜孫所守不降。己亥，太祖遣胡大海由間道取處州，宜孫敗，大軍入城，徇屬邑。葉琛來降，遣琛招諭深，遂來。上素聞其名，至京，擢左司員外郎，與論事稱善。詔還處州，招集舊部，曲從西征。上旣平江西，命守吉安。會浙東苗軍變，殺守將，已而復平。命總制處州軍民事。時寇竊發，人情未固，捕首惡誅之，防禦甚周。慮戍兵單弱，多方招募，遂得兵萬餘人。曰：兵足矣。諗於衆曰：兵少不足禦敵，師衆又無以餉，奈何？衆對曰：養兵所以衛民，苟不爲禦備計，子女玉帛且不保，而況於食？遂量民產勸輸粟，軍興以饒，請寬鹽稅二十取一，商販大集，以沒入田代租，民甚賴之。薦進士吳世昌司學校事。文治大興，諸全守將謝再興叛，犯東陽，李文忠擊走之，深引兵來援，議以浙東屏障，度地去諸賢六十里，乃築城相犄角，其勢益固。時李伯昇大舉入寇，頓城下，堅不可攻，敗去。上聞，旌其功，賜名馬，遂平青田。方明善取平陽，出偏帥復之，并復瑞安侵地。統正軍攻溫州，明善勢蹙，與其叔國珍議歲幣，乃還師。太祖卽吳王位，擢王府參軍，仍總制處州。命征陳友定，取浦城，崇安，建陽，敗將阮德柔兵四萬。友定懇帥銳卒來鬪，深以氛惡未卽戰，爲朱亮祖所迫，不得已進擊之，破其二柵，敵悉銳圍深數重。日暮，率精兵突出，伏起馬蹶見執。友定

不敢害。會元使至督促，乃見殺。年五十二。追封縉雲郡伯。深智識絕倫。藝術無不精曉。儻好施予。其守鄉郡凡五載。馭衆一以寬厚。用兵十餘年。未嘗妄戮一人。宋濂侍上白虎殿。忽顧問曰。胡深何如人。對曰。文武才也。上曰。誠如卿言。浙東保障。朕甚賴之。比伐閩。有星變。上曰。東南必失一大將。亟使諭之。深已被害。上聞痛惜之。爲之流涕。子楨。刻木具衣冠葬之。友定旣死。上使楨樹其肉以祭。

贊曰。明明明祖。旌余祀福。忠義相望。芳名載馥。銜命守土。捐徇弗劬。慷慨就刃。審義自劓。遇難買首。苟免無惡。開代傑搢。儷之冰玉。

史官曰。嗚呼。自王綱而下。皆以死事著聲。成仁取義。方之古烈。奚以尙茲。綱不受賊釋而死。烈哉。禕遲回。欲的當以報也。子孫孝義高一時。不愧其祖父矣。炎奇峭。獨以文章能得士。琛之洪都。瑗之太平。無負此土哉。王愷。饒治材而兼武略。鼎雖倉卒臨難。而平日表表有足過人者。使胡深不死。大將才也。其心靡二。豈不足風。

于光、張子明附徐明傳

于光。字大用。南康都昌人。磊落有大志。初集鄉兵自捍禦。尋徐壽輝破都昌。以光爲元帥。守鄱陽浮梁。未幾。陳友諒弑壽輝。光誓不肯北面友諒。庚子七月。光及左丞余椿等擊走友諒部將辛同知。遂取饒州來歸。太祖命光爲江西參政。同鄧愈鎮饒州。已而令光開分省於饒州。與愈連營守禦。尋入金陵。謁上於龍

江授行樞密院判。俾伐徽州。比行召還。解金連環賜之。光頓首謝曰。臣被厚恩。鞠躬盡力。死而後已。辛丑八月。從上伐漢。至安慶。遂攻敗破其水寨。癸卯。從戰彭蠡。大捷。遷指揮同知。甲辰春。武昌平。進鷹揚衛指揮使。戊申。同大將軍徐達取陝西。下潼關。遂領兵守潼關。九月。元兵攻潼關。光出禦。舞稍大呼。橫貫其陣。敵衆大敗。已酉。移鎮鞏昌。飭號令。練行伍。繕甲兵。嚴警備。敵至。輒擊卻之。是冬十二月。屢戰。王保保走之。洪武二年。保保知大軍南還。盛衆襲蘭州。守將張溫以兵少不與戰。嬰城自守。光聞。卽赴援。比抵馬蘭灘。敵猝至。腹背受攻。被執。保保以光至蘭州城下。使諭溫降。光諾。則大呼曰。我不幸被執。公等宜厲城爲守。徐將軍五十萬衆且至矣。虜怒。批其頰。遂被害。城中聞光言。守益固。保保進攻不利。竟引去。光死事聞。上遣祭以少牢。配享功臣廟。光氣貌修整。幼讀書。知大義。善鼓琴。能詩。雅健可觀。兼通岐黃術。望之翩翩佳士。及持戟上馬。意氣雄壯。所向無前。旣死。人皆痛惜之。

張子明。張元帥之子。初以軍功任千戶。取南昌。從大都督朱文正守南昌。癸酉夏。漢友諒圍南昌數重。勢急。文正遣子明建康乞援。子明取小漁舟。潛夜從水關出。越石頭口。夜行晝止。半日得達。見太祖具言之。上曰。兵勢如何。對曰。敵衆雖盛。而戰鬪死者亦不少。今江水日涸。巨艦將無所用之。又師久乏糧。若援至。可破也。上曰。汝歸語文正。但堅守一月。吾當自取之。子明還至湖口。爲友諒兵所執。友諒語之曰。若能誘城降。非但不死。官萬戶。子明佯諾。比至城下。大呼曰。我張大舍。已見主上。大軍旦夕至。將軍無苦。需嬰城以待。友諒以見賣。怒。攢槊殺子明。文正得子明言。氣益倍。隨方應敵。城得不破。援兵至。友諒敗死。初贈武

毅將軍飛騎尉。後加贈忠節侯。廟祀南昌。時有徐明者。有膽力。善修飾。軍中呼爲胎裏謊。爲管軍百戶。從守南昌。漢友諒圍城急。嘗夜出劫友諒營。獲其良馬以歸。友諒乃設坎以誘之。明善飲。一日浮白狂叫大醉曰。我此番當得友諒首矣。出賊覺。明逐射賊。失入坎中。漢執之歸。誘降不屈。見害。追贈合肥縣男。列祀南昌。

贊曰。兵以正勝。尤以奇應。誘敵成功。慨然殞命。不有所達。衆心奚定。破敵全城。允藉決勝。良馬之獲。膽氣壯盛。

史官曰。于光、張子明之死。若出一轍。皆有晉解揚之義。呼吸之際。足以鼓三軍之氣。而奪敵人之魄。身死城存。似詭實正。可謂烈矣。昔人以唐劉感事例光。謂崇報無聞焉。鷄鳴列祖。豈忘蘭州哉。

李仕魯、陳汶輝、青文勝、薛祥、葉伯巨、周敬心傳

李仕魯。字宗孔。濮州人。幼穎敏。嘗閉室讀書。不窺戶外者三年。賊博淵沈。益切尙友之志。聞婺人朱公遷得晦翁朱子之傳。千里負笈。一見深相契合。專精探究。盡得其所學而歸。元末隱居不出。然所在聲望奕奕。太祖龍潛時。已識其名。洪武初。詔求天下有能傳朱學者。所在以聞。有司乃舉仕魯。應召乘傳至京。上一見喜曰。吾求子久。何相見之晚也。對曰。陛下方以武定天下。臣縫掖下士。溺於章句。不能左鞭右弭。馳驅中原。冀禮興樂成之會。臣以文事進。故意有所待耳。上曰。文武初無異道。朕方收攬才士。以佐太平。乃以文武擇乎。遂除黃州府同知。仕魯曰。臣夙願惟欲朝夕備顧問。以行所學。上曰。姑以民事試子。乃奉詔。

抵任。風裁整峻。政理寬和。民之瘡殘者。卹之。吏之莠蠹者。斥之。期年。以治行卓異。聞於朝。召拜大理寺卿。律比精嚴。守正不撓。時有僧金碧峯者。應對稱旨。求爲僧建職。司授官許之。仕魯曰。陛下建極之初。意所祈嚮。卽爲後世子孫。天下臣民。標表。柰何不崇聖學。而信外道乎。疏至三十上。上堅不從。入涕泣叩頭曰。臣言不入。何以臣爲。願還陛下笏。放歸田里。上震怒。命武士摔搏之。立死階下。事亦不果行。

陳汝輝。字耿光。詔安人。幼攻儒術。兼通武略。尤邃天文地理及數學。結廬南臬。嘗與趙子貞。柳舜舉遊燕。越以觀羣雄者六七年。又與劉伯復。余叔紳。登臨衡湘。久之。歸隱於越。結雲庵。初溪潭上。樹種瓜果。以待嘯侶。恆卽景賦詩。笑傲自若。上旣渡江。秦元之。陳遇交薦之。降書徵辟。時張士德聘幣亦至。並不應。報元之飛龍在天書。再徵。比之伊呂。孔明復不起。繼而徐達復遣使檄起。亦不至。天下旣定。遂以經明行修。應詔。使大臣校其學行。第一。稱爲八閩元士。時其門人陳元震同舉。元震觀法太嚴。懼甚。乞歸。汝輝留。毅然條論十事。詞氣英爽。授禮科給事中。按視吳松民瘼。吏弊。還奏吳松閱數千里之地。墟港所泊。無它貨。食物悉有征稅。此皆承襲元污。未盡更刷。一切宜埽除之。又言。自古文武並用。所以靖禍亂。綏太平。未聞有縉紳縉流。雜居同事。而可以相濟也。臣觀勳舊有德。思欲去位。而縉流儉夫。加以讒間。如劉基。徐達之見疑。李善長。周德興之被謗。視蕭何。韓信之危。相去不遠。府生太學生之斥。視宋臣詠。檜貽譏之逐。能幾何哉。伏願自腹心以至耳目。啓沃喉舌之司。皆處以德行文。章之彥。則天下之賢可收。天下之治可成。復承制奏論政疏。請法程灝所陳十事。旨之至再。上謂其志大旨迂。不達時變。徒滯成語。紛更朝事。汝輝因自

勅求歸不許。以爲大理寺丞。適有疑獄。又上疏曰。伏觀十二月大理寮屬所評張廉使。李知府諸刑。奉有內旨。不敢准理。臣聞張爲廉使山東。杖一僧人。李爲知府。忤一屯道。翰林學士但撰文犯諱忌字。皆非大姦惡。刑部及本寺寮屬。因得內降。但欲織獄。夫廉使知府。非一考六年可至。必疊課積資以得。伏惟念得賢之難。少加愛惜。既奉詔卹刑獄於山東。浙江。歸還本寺少卿。李善長之獄。復上書力爭。善長死。上思汝輝疏。召入賜宴。與侍臣賦詩。名黃花宴。宴畢。仍以鞍馬賜歸。一日。上問卿幾子。朕當擢用。對曰。臣有三子。長在太學。次蒙吏部選除序班。季尙幼。上復賜白金綵段。并及三子。汝輝挈子入謝。復留賜宴。因問閩中藥物。汝輝誤對稱俺科。臣劾汝輝倨傲無禮。汝輝謝罪乞休。不許。頃之。山東副使張甲不奉敕諭。鞭笞內戚。上欲處於大辟。汝輝力爭。封還御旨。上怒。遣御前指揮牽赴刑部。金水橋投水死。上聞而悼之。坐指揮不救死。製文諭祭葬鳳凰山。時年九十餘矣。著有南皋集。

齊文勝。字質夫。夔州大寧人。仕爲龍陽縣典史。龍陽治瀕洞庭。歲罹水患。賦額繁重。年徵課三萬七千有奇。積逋數十萬。斃於敲扑者相踵。文勝至。歲大稔。疏請蠲恤。不報。再疏。復不報。歎曰。吾爲民請命。不得。明主可以死悟也。袖諫章。擊登聞鼓。輒自經。鼓下。太祖聞之。爲改容哀其志。詔寬龍陽租二萬四千有奇。定以爲類。邑人貌祠之。扁曰惠烈。子孫貧困不能歸。因家焉。其後裔有登科者。

薛祥。字彥祥。無爲州人。元季。與舒城許榮各集義兵保鄉里。乙未。從俞通海來附。爲水寨管軍鎮撫。屢從戰。得侍黃船。與議軍政。太祖語俞平章曰。汝之功。非彥祥不能成。以後攻浙。拔吳。定中原。皆與有功。洪武

元年漕運孟津。上遣人謂曰：聞有亡命潛伏來劫，毋得輕敵。夜半抵蔡沙，賊千人果至。祥理解散之。上聞甚喜。祥方患背疽，上親視之。願延安侯曰：汝等其善護祥，且言其多軍功，勤供億，古蕭何寇恂也。特命爲都漕運使。自揚達濟，修築坦堰，衆勞無怨。諭以奏功，授職者三十餘人。時幽薊初附，官民南遷者皆賴之。海州亂，駙馬都尉黃琛討平之，擒萬餘人。祥與會問，無名號者皆釋之。所活甚衆。八年，召爲工部尙書。李善長奏鳳陽工人覓鎮，祥面折曰：太師一言壞天下人。若此，恐不利子孫。乃命釋無罪者，活數千人。九年，營謹身殿，部奏誤匠役以中等作上等，上大怒。命有司皆棄市。丞相大夫不得復請。祥抗諫，得下腐。復奏曰：是成廢人，莫若杖而復工。從之。是歲改天下行省爲布政司，授祥北平布政使。三年，爲天下治行第一。胡惟庸惡之，坐以營建擾民，降。知嘉興府。十三年，惟庸誅，召復工部尙書。上問姦臣讒汝，何不言。對曰：臣無所知。十四年，復以直諫死。杖下。子四：凱、能、政、宣，皆徙于瓊。

葉伯巨，字居升，寧海人。好讀書，年二十餘，有名於鄉黨。善說禮。凡朋友有婚喪，必延爲相。性耿介，不能藏人短，見不善，立折之，不顧其喜怒。人知其無它，終亦不恨也。以通經術進太學。未久，詔諸生分教河北。子弟得平遙，待諸生如子。人咸愛敬焉。洪武九年，星變，下詔求言。伯巨曰：今天下有三事最切，其二事易見，而爲患小，其一事難見，而爲患大。此三者積於吾心久矣。縱不求，猶將言之。況有明詔乎。卽爲書言三事。曰：分封太侈也。曰：用刑太繁也。曰：求治太急也。主上有天下，掃除羣雄，如踏草芥。包絡豪傑，如臂使指。公卿大臣數十萬衆，戰勝攻取者，一介使召，拱手聽命。無敢後時。況敢有抗衡者乎。傳曰：都城過百雉，國之

害也。先王之制，大都不過三國之一，小九之一。國家裂土分封，懲宋、元孤立，然而秦、晉、燕、齊、梁、楚、吳、閩諸國，各盡其地而封之，都城宮室之制，廣狹大小，亞於天子之都，賜之以甲兵衛士之盛，臣恐數世之後，尾大不掉，然後削其地而奪之權，則起其怨。如漢之七國，晉之諸王，否則特險爭衡，否則擁衆入朝，甚則緣間而起，防之無及也。議者曰：諸王皆天子親子，皇太子親骨肉，所謂磐石之宗，天下服其強耳。禮莫大於分，使王侯之國與京畿同，則爲列國矣。尙有君臣之分乎？今秦、晉、燕、齊、吳、閩諸國，連帶數十城，而復優之以制，假之以兵，無事則易驕佚，有事則易僭亂，何不撫漢、晉之事觀之乎？孝景皇帝，漢高之孫也。七國之王，皆景帝之同宗父兄弟也。當時一削其地，則遽構兵西向。晉之諸王，皆武帝之親子孫也。易世之後，迭相擁兵，以危皇室，遂成五胡雲擾之患。由此言之，分封隲制，禍患立生。援古證今，昭昭然矣。當賈誼勸漢文帝早分諸國地，空之以待諸王子孫，謂力少易使義，國小無邪心，使帝盡從誼言，必無七國禍。願及諸王未之國前，節其都邑之制，減其衛兵，限其疆理，亦以待封諸王之子孫。此制一定，然後諸王有聖賢德行者，入爲輔相，其餘世爲藩屏，可以與國同休，世世無窮矣。古者斷死刑，天子爲之撤樂減膳，而寓慘怛之意於其間，誠以天生斯民，立之司牧而教養之，俱欲其並生於天地之間也。故其子孫享國久遠者，六七百年，近者亦三四百年，豈偶然而已哉？笞杖徒流死，今之五刑也。用此五刑，既無假貸，一出於大公至正可也。而用刑之際，多出聖衷，致使治獄之吏，務從深刻，以趨求上意。深刻者多獲功，平允者多獲罪，或至以贓罪多寡爲殿最，欲求治獄之平允，豈易得哉？今四方平矣，民庶思治矣，而不務以寬厚御之，視

誅殺人如滅螻蟻。使民不獲安息。欲以圖治。難矣。古之爲仕者。以登仕版爲榮。以罷職不敘爲辱。今之爲士者。以混迹無聞爲福。以受玷不辱爲幸。以屯田工役爲必獲之罪。以鞭笞捶楚爲尋常之辱。其始也。朝廷取天下之士。綱羅摺撫。務無遺逸。有司催迫上道。如捕重囚。比至京師。而除官各以貌選。故所學或非其所聞。而所用或非其所學。泊乎居官。言動一跌於法。苟免誅戮。則必屯田力役之科。所謂取之盡錙銖。用之如泥沙。率是爲常。少不顧惜。然此亦豈人主樂爲之事哉。良由激濁揚清之不明。善惡賢愚之無別。議賢議能之法既廢。以致人不自勵。而爲善者怠。有人於此。廉如夷。齊。智如良。平。一或不謹。少戾於法。上之人將錄其所長。棄其所短。而用之乎。將舍其所長。指其所短。而實之法乎。漢之世。徙大族於山陵矣。未聞實之以罪人也。今鳳陽皇陵所在。龍興之地。而率以罪人居之。以怨嗟愁苦之聲。充斥園邑。非朝廷所以恭承廟意也。賊人僞四大王突竄山谷。捕之數年。既無其方。而乃歸咎於新附戶籍之細民。而遷徙之。騷動四千里之地。鷄犬不得寧息。況新附之民。日前兵難。流於他所。朝廷許之復業。而來歸者。今既附籍矣。乃取其數而盡遷之。是法不信於民也。夫有戶口。而後田野闢。田野闢而後賦稅增。今責守令增戶口。正謂此也。近者納稅糧之家。雖承特旨分釋還家。而其心猶不自定。已起戶口。雖蒙憐恤。見留開封聽候。今軍士散漫村落。居民不知所爲。訛言驚動。況太原諸郡。外界邊鄙。民心如此。甚非安邊之計也。臣恐自茲之後。北郡戶口。不得復增矣。何者。小民易動而難安。今之小民。以爲新籍在官。乃見遷徙。反易逃匿。若欲遷徙。概而遷之。我奚先受其殃乎。主上切切以民俗澆漓。人不知懼。法出而姦生。令下而詐起。故或朝

誅而暮犯者有之。昨日所進今日被戮者有之。乃致令下而尋改。已赦而復收。天下臣民莫之適從。而不能相安者。甚不稱主上求治之心也。求治之道。莫先於正風俗。正風俗之道。莫先於使守令知所務。使守令知所務。莫先於使風憲知所重。使風憲知所重。莫先於朝廷知所尚。朝廷知所尚。則必以簿書期會。獄訟錢穀之不報爲可恕。而世俗流失敗壞爲不可不問。而後正風俗之道得矣。風俗旣正。天下其有不治者乎。以農桑言之。方春州縣下一文帖。里中申回文狀而已。守令未嘗親點視種蒔次第。旱澇預備之具也。以學校言之。各處生師缺員者多。縱使具員。守令亦鮮有以禮讓之實。作其成器者。朝廷切切社學爲重。教民之急務。屢行取劾師生姓名所習課業。如是之詳。今之社學。當鎮城郭。或但置門牌。遠村僻處。則又具其名耳。守令亦未嘗以教養爲己任。徒具文案以備照刷而已。及至憲司分部按臨。亦但循習故常。依紙上照刷。亦未嘗差一人巡行點視興廢之實。上下視爲虛文如此。小民不知孝弟忠信爲何物。爭鬪之俗成。奸詐之風熾。而禮義廉恥埽地矣。此守令未知所務之失也。風紀之司。所以代朝廷宣導風化。訪察善惡。條舉綱目。拯治萬事。至於聽訟讞獄。其一事耳。今以訟獄爲要務。一不稱職。雖有忠臣孝子。義夫節婦。視爲虛文末節。而不暇舉其始。但知去一賊吏。決一獄訟爲治。而不知勸民成俗。使民遷善遠罪。爲治之大者也。此風憲未知所重之失也。天下郡邑生員。考於禮部。升於太學。使歷練衆職。任之以事。可以洗歷代舉選之陋。而上法成周之制矣。然而郡邑生員。升於太學。或未數月。遽選入官者。間亦有之。臣恐此輩未諳時政。未熟朝廷禮法。不能宣導德化。上乖德政。下困黎民。開國以來。遷舉秀才。不爲不多。選任

名位不爲不重。自今數之。賢者寧有幾。豈不深可痛惜乎。夫圖治於陵剝之餘。猶理絲於焚亂之後。緩之則端緒可得。欲速則膠結而不可窮。今病民之不安。奸邪不止。朝夕異令。賞罰不準。君勞於上。臣困於下。治烏可致乎。書奏。上大怒曰。伯巨何物。乃敢聞吾骨肉。我見之心憤切齒。可使吾兒見乎。速取來。吾將手射之。且啖其肉。逮至。丞相乘上喜。乃敢奏聞。瘦死刑部獄。

周敬心。山東人。太學生。洪武二十五年。訪求曉歷數善知來者。爵封侯。祿千五百石。敬心上疏極諫。且及時事。奏以爲臣聞國祚長短。在德厚薄。不在歷數。三代尙矣。三代而下。德澤最厚。莫如漢。唐宋國祚最短。莫如秦。隋。五代。如漢高之寬仁。繼以文。景。昭。宣。光武之廓大。繼以明。章。唐太宗之仁義。繼以肅。憲。宋太宗之誠愛。繼以真。仁。是以有道長也。始皇之酷虐。煬帝之苛暴。五代之窮兇。是以無道短也。由此觀之。皆係人事。不在歷數。陛下以神聖之資。膺天眷命。埽滅胡夷。救亂誅暴。厥功偉矣。然神武過漢。不及其寬大。賢文過唐。宋不及其忠厚。是以御宇以來。政教行而民不悅。法度嚴而民不服。陛下若効兩漢之寬大。唐宋之忠厚。講三代所以有道之長。則帝王之祚。可傳萬世。何必問諸孤方小道之人耶。臣又聞陛下連年遠征。北出沙漠。臣民萬口一詞。爲恥不得傳國璽。欲取之耳。臣不知璽何始哉。聞楚平王時。琢以卞和之玉。秦始皇祕之曰御璽。自是以來。歷代帝王。珍如執券。不得則若有所遺。然戰國之君。趙先得璽。其國不守。五代得璽。不旋踵亡。臣又聞莊宗滅梁。取蜀璽併歸唐。及晉石敬瑭反。潞王從珂攜傳國寶登樓自焚。則秦璽雖在。固已燬矣。敬瑭入洛。更以玉爲之。契丹滅晉。重貴獻之。詰其非真。言故乃止。女直之亂。遼王延

膺遺傳國寶於桑乾河。元世祖時有札刺爾者。漁而得之。今元人所挾石氏璽耳。昔者三代不知有璽。仁爲之璽。故曰聖人大寶曰位。何以守位曰仁。今陛下國則願富。兵則願強。城池則願高深。宮室則願華麗。土地人民則願廣大。征伐兵革。歲無虛日。此忽三代之大璽。而求漢唐宋之小璽也。臣聞自古不嗜殺人者能一天下。秦隋元魏好殺不已。迨其後世。至於滅絕。漢時誤殺孝婦一人。海涸三歲。人事天應。不可不謹也。臣見洪武四年錄天下官吏。十三年連坐胡黨。十九年起天下積年民害。二十三年大戮京民。妄言罪名不分。臧否一概被誅。夫其中豈無忠臣烈士善人君子。於茲見陛下之薄德而任刑矣。水旱連年。豐稔不臻。夫豈無故。臣又聞明主賞不僭而刑不濫。刑既濫矣。賞復無節。天下老人非功非德。賜鈔五錠。出征軍官位高祿厚。平寇禦侮。固其職事。而賞賜無藝。厚斂窮民。不嚴駁幸於無功。此亦明主所宜禁也。齊奏上怒。旣而原之。後隱居不仕。

贊曰。危言觸諱。身撻逆鱗。風節矯矯。直氣嶙峋。力闢異教。冤抑爲伸。登聞死諫。楚庶獲春。刑威屢霽。終以諫殉。陳說痛切。無慚古人。

史官曰。犯顏抗對。折檻之風逸矣。而仕魯以死爭儒墨之辨。吾道關繫甚鉅。其孔孟之功臣乎。當汶輝壯遊四方。結廬南臯。迹其始類縱橫家。而應詔後所奏論切時要。皆廷臣所蜷舌鼠項而避之者。徵書所謂伊呂孔明。卽不及。亦其流亞歟。文勝自殺以活人。不愧惠烈矣。祥敢言卒死於言。安在明主可爲忠言也。使伯巨分封之議行。第王燕以數縣。卽鬚長過腹。寧遂貴不可言。敬心暴其所忌。得老死牖下幸矣。皆所

開逢、比、九、鄂之選哉。

明書卷一百二

列傳二

忠節傳二

徐輝祖梅殷傳

徐輝祖，中山王達長子。初名允恭。母謝，生輝祖。少而白皙，秀眉目，豐頤方面，及長，身八尺五寸，顧盼有神，舉止儼雅。父達，數鎮北平，留宿衛，御家，家衆肅然。理左府事，給月祿，達還自北平，道病疽，手詔遣往迎勞。達薨，又三年，己巳，襲爵，賜誥，稱揚中山之烈，而勉輝祖忠以立志，禮以守身，恪盡繼承之道。尋以皇太孫允炆嫌諱，改名，賜黃金三百兩，白金二千兩，鈔三千錠，綺綾四十端，俾還鳳陽，賜第，以歲時入覲。尋給兵百二十人爲衛，復賜鈔四百錠，詔還公田於官，仍太倉歲支祿五千石。時諸將皆老，輝祖以材器，特見信用，數往陝西、山東、西北平、河南練兵治餉，降將阿魯帖木兒隸燕府，有異志，爲人所發，上密詔王訥實，而命輝祖以詔往，於是悉得實，合策捕誅之，還領中府。又遣諭燕王送虜虜至京，并出獵，勒兵之法。二十九年，國子學正吳啓請重臣甄別國子師生，上以輝祖同禮部翰林官詣監，試其文藝，分別送吏部銓用。上知其有文，故特遣之，人以爲榮。建文皇帝卽位，用爲肺腑，與曹公李景隆領朝班，加太子太傅。先是輝祖

嘗侍孝康皇帝於潛邸。同諸王講讀。學通經史。又從詹希原學書。時建武學於京師。教將臣子弟。與駙馬都尉梅殷往來提督。絃誦大興。時藩國疆盛。齊秦等議削奪。亦與密謀。數宴見定進止。燕王尤以屬尊見疑。先太祖崩。遺詔各王臨本國。燕王不從。入臨。至淮。特敕阻歸。明年小祥。燕王入朝。行皇道。被劾不問。尋辭歸。世子兩郡王皆留。既猜嫌益甚。燕王稱病請還。世子郡王朝議以遺命喪畢方遣。不許。燕王固請。未決。建文皇帝以達女爲燕王妃。召輝祖及其弟增壽議之。輝祖執不可。且密奏高煦好勇無賴。自恃騎射。非惟不忠。抑且叛父。它日必爲大患。請收之。增壽以百口保無它。高煦已竊入輝祖廐。取其善馬馳去。輝祖卽以聞。欲追之。增壽與駙馬王寧力爲庇。黃子澄亦曰。留之生疑。并世子及二郡王皆遣歸。燕謀得行。仍數數陰餌之。確然不撓。上益信重之。燕兵旣起。謀大將。嘗屬輝祖。終以王妃相左。嘗一出兵。又有疑而嘗者。謂顧私親戰不力。亟召還。由是諸將連敗。增壽密爲內應。燕兵日迫。渡江。輝祖與開國公常昇分道出師禦戰。援何福於齊眉山。斬燕千戶李斌。燕兵再卻。尋召還。燕王入城。輝祖仍率兵巷戰。不支。獨守先廟不迎。太宗卽位。廷臣論劾。令自陳狀。止書中山王達開國功。子孫免死而已。太宗大怒曰。此與齊秦輩同罪。宜誅。沈吟久之。削爵。錮私第。尋下獄。尋竟自裁。年四十餘。十八年。上念中山王達功。且以后恩。召其長子釋伽保見。賜名欽。襲魏國公。盡還誥券。歲祿賜田。欽乞守父墓。上怒。復削爵。徙鳳陽。仁宗卽位。欽來朝。復爵。尋卒。子顯宗嗣。太宗封增壽爲武陽侯。進定國公。世襲。萬歷初。詔錄建文死事諸臣。各以官稱立廟南京。而輝祖居首。

梅殷夏邑人。汝南侯思祖從子。初殷之祖以水卒。從太祖軍中。號曰梅梢。鄱陽之戰。矢幾及上梅梢。偃上坐得避。矢從上左側過。僅一線耳。時力戰與死者甚多。上倉皇不能盡憶。亦不能一一頒賞。比上卽位。梢老矣。失明。無爲言者。他日候上郊。使殷掖之路隅。呼屬車下曰。皇帝皇帝。忘梅梢耶。上視之大驚曰。果忘公矣。卽召厚賜之。洪武十一年。殷尙太祖第二女甯國公主。爲駙馬都尉。恭謹有謀。勤問學。能騎射。諸駙馬中。太祖尤愛殷。十九年。敕殷提督山東學校。兼理地方。敕語謂殷篤學。精通經史。堪爲儒宗。後受密命。輔建文皇帝。燕兵起。殷充總兵官。鎮守淮安。悉心防禦。號令嚴明。燕王遣殷書。欲進香金陵。殷報書云。皇祖有禁。遵者爲孝。不遵者爲不孝。時燕王稱兵已三年。所得燕南及山東州縣。俱不能守。又大敗於東昌。甚窘。會有內間言。南朝諸重將皆分屯山東。京師空虛。遂引兵直趨南。南諸將反隔於後。倉皇追戰。咸不利。沿淮相持者數日。糧乏欲走。合勢出戰。俄以驚疑大潰。諸將皆被執去。而淮安實不聞。燕王遣使假道。遺書言與兵以除君側之惡之意。殷割使人耳鼻。授詞答曰。留汝口與殿下言。君父恩義。燕王憚其詞直。又城堅兵勢重。不可攻。竟不敢道淮安。乃渡泗水。破盱眙。出六合。至京師。卽帝位。殷尙擁重兵淮上。太宗迫公主招殷。公主嚙指血爲書。以達殷。殷得書慟哭。詢皇帝所在。使曰。去矣。殷曰。君存與存。君亡與亡。吾姑忍俟之。乃還京見上。上曰。駙馬勞苦。曰。勞而無功。徒自慙耳。久之。殷不能平。時見詞色。上疑之。嘗夜遣小中官潛入殷第。察之。殷愈怒。都御史陳瑛言。殷招藏亡命。私匿胡人瓦刺灰。與女秀才劉氏。朋邪詛覲。以公主故。隱忍不罪。而心銜益甚。永樂三年冬。早朝。召殷。都督譚深。指揮趙曦。令人擠殷死。笄橋下。曦水。

淺不能沒。奮舟駕其背而死。乃言殷自投水死。都督許成發其事。上乃罪深。曦二人對曰。此上命也。奈何。罪臣上大怒。立命力士持金瓜落二人齒斬之。醢殷榮定。公主以上果死。殺殷。牽衣大哭。問駙馬安在。上笑曰。爲公主蹤跡賊。無自苦。乃官其子順昌爲中府都督僉事。景福爲旗手衛指揮僉事。賜手書曰。朕不念爾母。爾安得至今日。後俱改孝陵衛指揮使。宣德中。與世襲孫純。成化辛丑。進士爲定遠知縣。忤上官棄歸。改襲前職。官至中都副留守。初。燕兵起。公主嘗貽書以大義阻兵。太宗不答。兵至淮北。與公主書。旨與師不得已之故。令遷居太平門外。勿罹兵禍。公主應不答。殷死。瓦刺灰乃持刀割深。曦手足。剖取其腸。持祭殷畢。遂自縊於旁。灰降虜也。向屬殷幕下。

贊曰。徐居元勳。梅受顧命。外雖懿親。內實君令。守死不移。國亡猶競。功憾其無。死得其正。一心靡二。親臣之鏡。

史官曰。書稱熊羆不二心者。保乂王家。而漢室帶礪之盟。爰及苗裔。助威尙矣。矧開國元功。密受偶奩之命者乎。金川旣啓。喋血飛灰。忠義性生。自難委折。然椒塗有倪天之妹。瀉汭有釐降之姬。少一移志。當以元舅帝甥居上公。備心肺。不亦以功名終乎。而輝祖恬然趨死。殷乃怏怏不忘。身可幽。名可榜。爵可停。榮顯如土直。而志必不可奪。蓋此之所處極難耳。魯昭公之失國也。叔昭子祈死。君子以爲義而哀之。司馬牛曰。臣死之年。固大魏之忠臣也。予於徐梅亦云。

方孝孺^{附林}、盧原質、廖鏞、胡子昭、葉惠仲、劉瑞、王高、鄭公智、劉政、鄭居貞、林嘉猷傳

方孝孺字希直一字希古浙寧海人祖炯子二長克勤次克家克勤洪武初由薦辟爲濟南知府學術治行名於一時生孝孺是夕有大星墜其所幼精敏絕倫雙眸炯炯如電日讀書積寸爲文雄邁醇深鄉人目爲小韓子年十四五從父宦遊齊魯間歷覽周公孔子廟宅考古聖賢遺蹟喟然曰無尼父安所瞻依如顏閔固未可企假令與游夏共遊孔門亦當比肩伯仲聞者以爲狂會克勤以空印事被誣逮繫孝孺疏乞身代不報曹公李文忠見之期以國士時宋濂以道義文章重海內克勤於獄中命孝孺往問學焉一見大加賞異曰吾閱士多未有如子者克勤尋歿孝孺扶喪歸是時濂亦乞還金華孝孺往來四年濂門多天下名士如胡翰蘇伯衡皆自謂弗如比於歐蘇濂每稱其凝重洞釋諸理孝孺顧未視文藝恆以明王道闢異端爲己任世咸以爲程朱復出嘗臥病絕糧家人以告笑曰古有三旬九食貧豈獨我哉洪武十五年濂入京侍宴受命作靈芝甘露頌歸醉臥忘之孝孺度未能興密爲代之比旦濂愕曰死矣孝孺曰無恐某已代屬草未知當否濂卽攜入上覽曰此非學士筆也濂頓首以實對上曰良勝汝召見試以一論五策立成上改容歎曰異才也賜緋袍腰帶猶平巾往見東宮宴禮部則遣使人欲所坐几試之孝孺必正席乃坐上喜其端整而口其傲謂東宮曰此莊士當老其才留輔汝光輔太平也諭還家濂爲文送之期以遠大有曰予所許汝不獨以文後二十餘年當信予爲知言其秋濂徙蜀孝孺爲文籲天願

損己壽年益師。壬戌與葉林、張陳四君子登巾子山絕頂。縱譚千古曰：此樂蘇子瞻死後三百年所無也。杜門著述。適有仇家獲罪。詞連孝孺。有司籍其家。械送闕下。上見其名曰：是方生耶。釋之。令奉祖母葉。挈妻子還。二十五年以薦召之。入對。上方重賞罰。未遑教化。曰：今非用孝孺時。除漢中教授。日與諸生講明聖學。蜀獻王聞其賢。聘爲世子師。每見必陳說道德。王喜甚。尊以殊禮。召對不名。號其讀書之廬曰正學。丙子考文京府。皇太孫卽位。召爲翰林博士。進侍講。尋陞侍講學士。預經筵。備顧問。孝孺每曰：治先制作。經制在周官。建文皇帝虛己以聽。德望旣隆。一時倚重。上每讀書有疑。卽召講解。臨朝奏事。臣僚面議可否。必命孝孺就展前批答。預修太祖實錄及類要諸書。爲總裁官。會改謹身殿爲正心。獻銘作凝命神寶。又作頌。皆規正君德。比定官制。改文學博士。燕兵起。日召諮議。詔檄皆出其手。先是燕王發北平。僧道衍送之郊。密啓曰：臣有所請。江南方孝孺者。學行高卓。必抗不降。乞勿殺之。殺之天下讀書種子絕矣。兵及江上。孝孺畫策堅守。誓死社稷。建文皇帝旣去。宮中火熾。孝孺乃服斬。晝夜哭。鎮撫伍雲等執以獻。不屈。繫獄一日。王遣諭再三。終不變。復召草禪詔。及見背立。悲慟聲徹殿陛。太宗降榻勞曰：先生無自苦。予欲法周公輔成王耳。曰：成王安在。上曰：彼自焚死。曰：成王不存。何不立成王之子。上曰：國賴長君。曰：何不立成王之弟。太宗語塞。曰：此朕家事。先生無過勞苦。顧左右授筆札。曰：詔天下非先生草不可。大批數字云云。投筆於地。哭且罵。曰：死卽死。草不可得。上大怒。叱曰：汝不顧九族矣。孝孺奮然曰：能殺我十族乎。命以刀抉其口。旁至耳。孝孺噴血犯御座。罵喃喃不絕。復繫獄以俟。據其宗支及母族林彥法等妻族鄭原。

吉等示且脅之執不從。上怒甚。乃括朋友門生爲十族誅之。然後詔磔之。聚寶門外。慨然就戮。爲絕命詞曰。天降亂離兮。孰知其由。姦臣得計兮。謀國用猶。忠臣發憤兮。血淚交流。以此徇君兮。抑又何求。嗚呼哀哉。庶不我尤。時年四十六。詔收其妻鄭。鄭與二子中憲。中愈。先已自經死。二女投水死。宗族坐死八百七十三人。時外親族盡數鈔沒。發興州等衛充軍。尋調三萬衛。再調甘肅衛。坐死者復千餘人。距濂惜別時。恰二十年矣。孝孺和粹貞亮。事親孝。處師友篤恩義。先當宋濂死。葬夔州。孝孺自漢中走荆榛往祭。哭盡哀。言於蜀王。厚恤其孤嫠。道夔復艤舟哭移時乃去。每私居念及。或見其手跡。或對客譚及。輒泣不能止。與林右、王紳、郭濬、劉浩、葉見泰諸名士友善。切磨道義。被薦時。王叔英與書。大率以時措之宜爲言。及與政。輒慕古王政。盡欲見諸行事。以故多紛更。其文章大類蘇氏。而正論過之。嘗謂道之於事。無乎不在。列爲二十八箴。雜誠三十八章。以自警。謂化民必自正家始。作宗儀九箴。謂先王之治。先德禮而後政刑。作深慮論十首。以篡臣女主夷狄。雖一天下。不可爲正統。作釋統三篇。多先哲所未發。四方夷裔得一字寶。於金壁。死後遺骨。門人廖鏞、王稔等瘞之。聚寶門外。有分攜還鄉者。故各處多孝孺墓。同時文學用事之臣。際會功名。作實錄。極詆孝孺。後彭澤作哀江南詞。有曰。後來姦佞。巧言自粉飾。叩頭乞餘生。無乃非直筆。仁宗嘗諭羣臣曰。若孝孺輩。皆忠臣也。詔姦臣黨與從寬典。方氏遺族始有赦還者。一子婦魏氏亦得歸。因卽故居立祠祀之。後王稔輯遺文爲侯城集。謝方石鐸與黃文選孔昭蒐集得三十卷。拾遺十卷。爲文千二百首。所稱遜志齋集。孝孺自號也。又著有周禮考次、大易枝辭、武王誠書注、帝王基命錄、文統。

宋史要言諸書弘治中給事中金谿吳世忠請表祠孝孺等台人繆恭走京師上六事亦以爲言皆不報至萬歷初始詔許褻錄建祠祠於南京朝天宮前位居第二南都察院司務余養蒙建顯祠於聚寶山之木末亭方氏旣無噍類惟克家子孝復於洪武二十五年湯和城海上加賦寧民羣赴闕奏減孝復與焉請寧夏慶遠衛軍攜宗圖以行及孝孺死難鈔逮不及軍故孝復以軍支幸脫仁宗大赦孝復子琬援例調海門衛軍尋釋爲民繇是方氏之嫡胤始歸成化十八年謝鐸謁祠琬孫志淵出迎鐸喜先生有後因題詩贈之有孫枝一葉是君恩之句乃志淵故有仇人曰葉琰者遊於海鹽得見鄭曉恣其說遂以人傳又乞王世貞爲復姓記天啓中松江人俞斌原竈丁欲脫其籍販於寧豔慕卹改縣志於名宦魏澤下摘去黃萌三行竄入托孤一節指幼子名德宗以爲俞允任勉等求王世貞作復姓記松江益張大其事造祠立碑纂歸宗錄至寧海溷告侵奪知府洪都松人主其說訟者數年後始審查明確黜革方氏揭奏於朝始定總之遺族赦還京者其實錄也兄孝聞字希學少有至性十三喪母輒稽典禮蔬食水飲越三年及父卒居宿於外祖母亡亦如之每一號慟聲盡氣極嘔出血扶而後起寢成羸疾守禮益確家素貧吉凶之禮儉而不陋平居未嘗去書徧學五經而邃於易德器完粹爲文章理深意遠議論風偉從學者甚衆孝孺嘗曰某所以竊知斯道者非特父師之教抑亦吾兄之訓飭也卒於家弟孝友字希賢庶母董出興孝孺訣詩曰阿兄端不淚漣漣取義成仁在此間華表柱頭十載後旅魂依舊到家山士論壯之後亦見收其友有林右者字公輔浙臨海人洪武中爲中書舍人嘗奉詔行邊有勘定功進春坊大學士輔導

皇太孫以事誦中都教授尋掛冠歸聞孝孺死爲位哭於家永樂戊子島夷訶海上台被毒甚地方官聞右才請爲閩里計右勉起視兵督郡子弟勦平之上以此知名遣使召之不赴令武士械至京然猶以溫語相慰勞欲錄用右對曰罪人逃死已久藉令可仕當與方孝孺同朝矣上怒命劓之竟死。

盧原質字希魯初名質寧海人母方氏孝孺之姑也文學得於方氏爲多洪武戊辰舉進士第二授翰林編修庚午以父喪歸歷遷太常少卿建文中多所建明密參謀議壬午孝孺死原質坐黨族其家與弟原林等太宗皆收殺之。

廖鏞德慶侯永忠之孫父權嗣封鏞以適子任散騎舍人歷官至都督建文中與兵事時宿衛殿廷燕王既破京師以鏞與其弟銘嘗受學方孝孺令召之孝孺怒曰汝讀幾年書還不識箇是字復命太宗大怒殺孝孺鏞銘拾遺骸骨葬聚寶門外山上甫畢而廖氏亦見收鏞銘逃去永樂元年四月錦衣衛奏獲鏞送刑部論死弟銘鉞及從父淮安指揮僉事昇俱謫戍邊鏞母東甌王長女也并銘女送浣衣局從兄基指揮同知投獄死。

胡子昭字仲常初名志高字伯尙四川榮縣人富經術性耿介少從學方孝孺游漢中蜀獻王重之贈以詩以明經薦爲榮縣訓導建文初陞翰林檢討遷山東僉事進刑部左侍郎四年九月十一日坐方黨死臨刑高唱詩曰兩間正氣歸泉壤一點丹心在帝鄉年四十一閩族被擒父復初母郭皆年八十餘子五人紹緝繼等皆謫戍妻女給功臣爲奴正德中巡按御史熊相立祠祀之弟子義一名志遠洪武時薦辟

歷蜀府典寶。聞兄死。棄官辟丹陵。蜀獻王深憐之。令削髮爲僧。以親遺體辭。有子二人。方數歲。子義曰。我兄無後。天不絕吾生。二子當免難。竟攜二子避去。莫知所之。

葉惠仲。名見恭。以字行。浙臨海人。與兄刑部主事夷仲。名見泰。並有文名。時稱二葉。各有集。惠仲性亢直。雅爲方孝孺所知。初任廣武衛知事。建文初。以知縣入史館。與修太祖實錄。二年。爲會試同考。陞南昌知府。未行。永樂元年二月。坐實錄書燕兵爲逆黨。上怒。追以孝孺黨。磔籍其家。年六十四。妻蕭。給功臣家爲奴。

劉瑞。王高。俱南昌人。建文二年。同舉進士。相友善。端由給事中遷大理寺丞。高爲刑部郎中。皆廉明執法。壬午之變。端約高棄官去。跡露被執。召問練安。方孝孺何如人。端曰。忠臣也。上曰。汝逃。忠乎。端曰。存身以圖報耳。命與高俱劓之。太宗笑曰。看你這副面皮。端嘗曰。我到有顏。卽死。可見皇祖。上大怒。立捶殺。戍其家。先是。孝孺見收。端。高俱爲法官。息孝孺樹陰。上已心惡。至是殺之。端著有儒行十二篇。懷古詩集。百家輯錄行世。後建大節祠。並祀之。

鄭公智。字叔貞。浙寧海人。力學好古。工文辭。與林嘉猷。皆方氏姻戚。孝孺薦之。蜀獻王召至成都。王與語。史論詞藝。公智數數稱述河間。東平賢行。王說之。建文初。從孝孺至京。尋舉賢良爲監察御史。吏事精敏。持法不阿。燕兵至。坐方黨論死。而宋濂孫情。又坐鄭黨。陳瑛請並罪之。太宗曰。濂名儒。開國時事。皇考有勞。宥之。獨殺公智。

劉政字仲理長洲人幼聰睿力學居恆以忠義自許建文己卯舉應天鄉試第一考官方孝孺以託孤寄命命題得其文驚曰此他日臨大節而不可奪者批有羣鳥孤鳳之語一時稱爲得人及燕兵起感憤不食成疾乃草平燕策將獻之臥病未得行數問其家人曰燕兵得無渡江乎恐疾劇不以告後聞京師破孝孺被收乃責其家人曰胡不早言使余得一伸志以死也因擲足榻前嘔血死

鄭居貞初名久成改士恆以字行徽州人豐頰美髯善書從父潛官閩中因家焉從尙書賈泰遊洪武中舉明經授鞏昌判陞禮部郎中建文時爲河南參政永樂初坐方黨論死有閩南集關隴行藁歸來藁隨藁檜廷藁子孫因留居福州之瓜山

林嘉猷初名昇以字行浙臨海人師同邑王琦琦坐累雲南族姻無敢顧者惟嘉猷徒步千里遠送泣別人高其誼後與鄭公智負笈六千里至漢中師方孝孺時學於方氏之門者踵接而孝孺獨以得二人爲喜曰匡我者二子也洪武末以儒士校文四川蜀王訝其名字不相蒙更名良顯建文初薦修太祖實錄入史館爲編修遷陝西僉事嘗被燕邸召入居久之得其隱情以告孝孺達於建文皇帝遣錦衣千戶張安持書詣燕許世子王燕燕內使黃儼因問世子計且得行世子竟先發事遂洩燕兵入京坐方黨逮入謂僚友曰此大丈夫見義勇爲時也太宗遂殺之

贊曰讀書種子烈烈志節萬段已甘十族亦決氣厲岳搖忠精日揭不有斯人維傾軸折二虜二盧爲師駢殉志高見恭屠僂蹈躐二鄭能吏嘉猷名俊黨禍連結不隕厥問高瑞俠烈仲理畢命臣義交情千古

之正。

史官曰。嗚呼。昔生於盛明者。著書立說。謂孝孺平日以周孔自處。海內之人。亦皆謂程朱復生。及其得君。而格心之學。經術之業。無聞焉。又謂諸紛更。去新莽無幾。噫。亦未會其時而易言之耳。予生明末。見所謂君死臣囚之會。慷慨就義者。百無一二焉。始服孝孺輩之不可及也。孝孺方駕格澤。騁故主而賓於帝所。一死之烈。天日爲之悽慘。正氣沸鬱於天壤間。眞星日其名。而金石其言矣。至使雷霆之怒。不能快意於其間。其遺烈足千古矣。身處清平。何輕置喙。若盧原質以下數人者。皆死孝孺者也。以太宗之智。不能自用諸人。而使諸人爲孝孺用。計亦左矣。死孝孺多一人。則事燕殿下少一人。諸人可謂有君有師有友。而太宗於君臣之義。其謂之何。死見高皇一語。尤足刺心哉。人謂太宗之勢如火烈。而不知其氣大沮。孝孺之氣且長伸歟。自孝孺及程通。皆殉難者。故其傳以次第敘焉。

齊泰黃子澄楊任傳

齊泰。溧水人。初名德。洪武二十年。舉應天鄉試第一。明年進士。歷禮兵部主事。會雷震。謹身殿。太祖禱郊廟。擇歷官九年無過者陪祀。德與焉。賜名泰。時上年高。皇太子參機務。召與語。甚悅。曰。此經濟才也。三十年。陞兵部左侍郎。明年。進本部尙書。上嘗召泰問邊將姓名。歷數無遺。又問諸圖籍。泰出手冊袖中。進簡要詳密。上大奇泰。是年閏五月。受顧命輔皇太孫。時諸王皆尊屬。擁重兵。專制地。嫌勢逼。遺詔諸王臨邸。中毋奔喪。王國所在吏民。聽朝廷節制。諸王顧不悅。謂此齊尙書言於新君。矯皇考詔問我也。比燕王入

臨。至淮安。秦請急出符勒歸國。王益恨秦。秦嘗使燕厚餽。歸上於朝。上嘉之。益信重。遂與太常卿黃子澄建策。凡諸王有罪。輒除國。秦欲先燕。以王英武。志廣而氣剛。可借以讐諸國。子澄不以爲然。其後諸王有罪。輒除國。而周、齊、湘、代。岷相繼罪廢。及燕兵起。秦慷慨任兵事。建文皇帝得自寬。日召學士輩坐便殿。議行周官法度。君臣賡歌。闔外事一委秦。秦請削燕屬籍。移檄聲罪致討。或難之。秦曰。名正言順。敵乃可克。衆不能奪。而燕遂以誅秦爲名。時諸老將惟耿炳文、郭英在。而炳文子尙主最親。英在太祖時未嘗特將。遂拜炳文平燕大將軍。會兵五十萬。進征北平。時上遣諸王監督諸軍。秦以谷王穗漏師遁還。又慮遼、寧二王近燕爲變。皆奏召還。遼王植汎海至。寧王竟不至。炳文旣戰敗。使李景隆代。秦極言其不可任。建文皇帝直以門第肺腑至親。必遣之。師大衄。四年。燕兵已逼淮、泗。上猶以燕真甘心秦等。講秦子澄官。而令景隆致書燕請罷兵。燕王曰。給我也不聽。進兵益急。乃復召秦。未及還。金川門失守。上遜去。秦追之。廣德不及。至欲往他郡起兵興復。所乘馬白。慮爲人所識。乃以墨塗馬。旣而行遠。汗流墨脫。有見者曰。此齊尙書馬也。遂被執。送京師。不屈。死之。籍九族。從兄弟敬宗等皆死。叔時永、時彥等謫戍。妻及姊甥媳俱發教坊。女至死守節。兒甫六歲。戍邊。洪熙改元。赦還。其後有存者。嘉靖中。知縣謝廷灌爲祠祀。稱中山書院。黃子澄。初名湜。以字行。改字伯淵。分宜人。先世嘉。宋靖康間爲太學生。從陳東伏闕上書。請誅蔡京。復責開封尹王時雍姦邪。爲廉州司法參軍。子澄少從歐陽貞受易。周與學。受尙書。梁寅受春秋。博學負俊聲。洪武十七年。江西鄉試第二。明年。禮部第一。揭榜。五色雲見。廷試第三。授編修。陞修撰。東宮伴讀。累官太

常寺卿。建文爲太孫時。嘗密召於東角門。屏左右曰。諸王尊屬。擁重兵。奈何。對曰。諸王僅有護兵。僅自守。不足恃。萬一有變。六師臨之。誰其能支。漢七國非不盛。卒底亡滅。大小強弱之勢不同。而順逆之理異也。太孫喜曰。茲事終仗先生。及卽位。命兼翰林院學士。曰。先生無忘東角門之言。子澄頓首曰。謹奉命。遂出。與齊泰議。削奪諸王兵權。泰欲先燕。子澄曰。燕王雖桀。今無所跡。不可。周、齊、岷代在太祖。每以不法見督。何況今日。須先周。夫周、燕之母弟。辟手足。翦一則燕必來爭。可以并坐。泰曰。善。時燕世子及兩郡王俱在京。泰欲先收之。子澄不可。曰。彼知而先發有名。不如遣歸。坦懷無疑也。乃白上。會周府人告周王。遂襲執周王。櫛歸。敕燕王議其罪。王上書言周王所爲。形跡曖昧。幸念至親。曲垂寬宥。如其顯著。祖訓具在。臣何敢私。伏望陛下體祖宗之心。廓日月之明。施天地之德。上覽之惻然。謂事且中止。子澄、泰爭之未決。明日復言之。曰。周王已獲。可慮者獨有燕。擒燕則大事定矣。否者燕威名日盛。今不去。後難圖也。上猶豫。且曰。朕在位未久。連去數王。何以自解於天下。燕亦疑懼。稱病不出。子澄曰。成大事者不顧小信。因其久病。正天與之時。先人者制人。上曰。燕王智勇善用兵。雖病。恐難猝圖。宜更審之。乃以備邊爲名。出兵開平諸鎮。及更置北平守臣。伺燕府中事。燕兵遂起。自以周公輔成王。且索諸大臣。及耿炳文諸將相繼敗。上憂之。召問子澄。對曰。勝負兵家常事。以天下富強。區區一隅。豈能當哉。今以兵五十萬。四面並進。旦夕且成擒矣。遂薦李景隆爲大將。代炳文。臨行。惓惓授以兵略。景隆庸懦不能用。旣戰輒敗。棄其師遁。召還。赦不誅。子澄哭爭之。曰。景隆觀望懷二心。不誅何以謝祖宗。厲士卒。練子事。亦執景隆於朝。哭而數其罪。請誅之。

上不聽。自是江淮諸將連敗。或投入燕軍。子澄拊膺慟曰：事去矣。錯薦景隆。誤國萬死不足贖罪。燕兵至淮上。不得已。逐子澄。秦然密使募兵。而以竄齊。黃告燕。冀緩師。不得。燕王書給請。悉召平安、盛庸、吳傑師還。卽已。上更遣少卿薛巖。罷兵。又不許。兵抵江干。子澄奉密詔。攜妻子由洞庭。微服至蘇州。與知府姚善。倡義勤王。善乃編子澄子崑山珪爲道士。更名玄微。守譜籍。王爲里正。更名彥修。奉母。許相約同死國事。善又上言。子澄才略足捍國難。不宜屏棄閒遠。以快敵人。方亟。召子澄未至。而燕王金川遽卽位。購子澄急。太倉武士湯華。縛詣京師。見不屈。稱殿下。抗言。臣知殿下以兵力取富貴。不知殿下忍卽此位。若欲用臣。是不欲以綱常治天下乎。上解顏曰。聞卿博學善讀書。不比方孝孺執迷。朕將悉赦若罪。曰。經史柔翰。治世所用。亂世將安用耶。況富貴瞬息。何足輕重。殿下向來悖謬。恐子孫有效尤而起。何以爲訓。上變色曰。此天命有在。汝欲借兵日本抗我乎。曰。皇祖起義兵。定天下。以殿下勇力冠世。與東北大藩。得典兵永衛王室。而烽煙塞北。不能靖。願反內噬。若臣引彝內攻。與殿下逆謀何異。上曰。此細人言。不足信。朕亦不以此罪汝。今以魏徵。趙普不足學。則迂甚矣。今引江西所錄族屬六十五人。妻族外親三百八十人。齊至。哀號震天。子澄色不變。太宗謂曰。知汝必不爲我用。當認何罪。給筆札自供。大書曰。湜本爲先帝文臣。不職。諫削藩。權不早。以成此兇殘。後嗣慎不足法。太宗大怒。命截其手曰。雖汝不入島彝。足跡已至海上。復命截其足。磔死。年五十三。族人無大小。籍江西。皆斬。獨彥修能作崑山語。充解役。收骸骨。藏焦山。一妾在繫所。爲紙牌祀之。忽一日。晝雷大風。飄互懼其主去。久之來。會漢王高煦謀逆。上乃追思子澄之言。削

漢護衛徙居樂安州。謂侍臣曰：卿等謀國，勿以黃子澄臨刑語爲諱。洪熙元年七月，移葬崑之馬鞍山。御史劉漣爲立傳，銘曰：天生忠臣孝之力，天植綱常死之力，天祐眷屬友之力，天護骸骨子之力。死而不亡君之力，百世芳風山之力，藏名於中萬年出，至萬歷四年，其孫黃熊與蔣乾同以祭塚爭地致訟，縣令至山勘，忽地中震雷，化青氣上冲西北去，裂溝得劉御史舊志，令大驚。上聞，因表墓立祠。其在分宜葬者，亦曰馬鞍山。永樂初，舉發革除之黨者，亦曰蔣乾。易世爲讐，人皆異之。兩地各有以裔孫一人主祭。

楊任，嘉興人。母章氏，初生有胡僧過之，聞啼聲，歎曰：此兒異日必顯，終不免刑戮耳。任性至孝，嗜學。洪武間，由人才擢知袁州府。黃子澄一見，以國士許之。守袁州，政多宜民。燕兵起，引疾歸。壬午，子澄出徵兵，往約姚善圖復，共至任家，與任謀求舊君，以舉大事。咸奮誓死，收集義勇，事泄，俱被擒。至京，磔於市。籍產族誅凡九十三人。媼屬金莊，章范諸姓戍邊者百餘家。

贊曰：秦稱受遺，澄比家令，削濠召戈，除藩生覺，謀之不終，得死則順。任志勤王，欲燃餘燼，天命有歸，同隕厥命。

史官曰：葉伯巨分封太侈之言，真至言哉。太祖且怒，謂況使吾兒見之，使當日聽其言，稍一裁抑，諸王孰不弭耳頰首以安之，而身骨未寒，覺生嫡胤，使帝宮飛咸陽之焰，空山有瞿曇之跡，伊誰咎也。太宗英武雄鳩，其立太孫之日，已藏虎視熊攬之思，卽削亦反，不削亦反，而論者乃欲援漢文賜几杖不朝之例，何其迂也。齊黃誤國之言，亦永樂諸臣發論耳。然秦不爭炳文，而子澄乃薦景隆，挫衄不支，未嘗不憾其謀。

之不臧也。秦走廣德，擬復起事，卽無成。有文信國之風焉。子澄喃喃一再殿下，語溫而亢，使太宗追思效尤之言，亦一快也。任以林居急國難，考之古人不多得。

鐵鉉

附高賢寧陳迪附黃魁

暴昭傳

鐵鉉，祖父原色，人居鄧州，爲鄧州人。鉉生聰敏剛決，入大學，通經史，選授給事中，調都督府斷事，奏對詳明。太祖每試以事，知其能甚喜，賜字曰鼎石。時朝政威神，羣臣奔走奉職，救過不贍，鉉獨以材能稱任，使有藩府大獄，刑官久鞫不能決，屬鉉治，立具。上益喜，令法司諸疑獄盡屬鉉。建文初，遷山東參政，燕兵起，耿炳文戰敗，李景隆代將師五十萬駐德州，命鉉給餉，飛芻輓粟，軍興不乏。十月，景隆進圍北平，敗績。明年四月，師再進，又敗，燕兵追襲鉉，與參贊高巍並轡南奔，道出臨邑，灑血同盟，以口舌激義，大集民丁，固守濟南，僅十日，燕兵逼城，以書傳矢射城中招降，而城諸生高賢寧作周公輔成王論，以破其解，傳矢答之，堅守不爲下。城夜壞，則纒藍幕裹葦，塞破，望之若城，旋卽補築。燕王堰濟水灌城，城中大懼，鉉曰：無恐，計且破之。令人登陴哭求降，出千人伏地請命。時燕王甚苦諸郡縣旋陷，旋守，至是大喜，諸將曰：濟南中原要會，得此可斷南北，卽不下金陵，晝而自守，徐圖江淮，可以得志。軍中皆呼萬歲，遂下令退軍受降。鉉乃暗懸鐵版城門上，伏壯士闔堵中，約燕王入城，轟呼千歲，輒下版，旋卽斷橋。燕王乘馬率勁騎度橋而登，導者入門，伺燕王至門中，望之呼千歲，版下稍急，傷燕王馬首，燕王跌，急棄馬，奪從馬走至橋，橋

堅不可動。乃得馳去。大怒。麾兵力攻。鉉令守陣者羣噪罵。燕兵攻益急。以大礮擊城。城且破。鉉復多書高皇帝神牌懸受擊處。遂不敢擊。每因機變化。計盡毀北兵攻具。出城累敗之。相持者三月。燕王不得志。舍之南去。圍卒解。捷聞。賚金帛。進左布政使。時歷城侯盛庸代景隆將。合兵戰東昌。大捷。召鉉趨朝受賞。宋參軍說鉉曰。北兵去濟而南。其留守北平者類老弱。且永平保定雖叛。諸郡縣堅守者實多。守臣郭資輩。書生不知兵。公能出奇兵疾馳真定。我諸將潰遺者稍稍收合。不數日。竟取北平。其間豪傑有聞義而起者。便宜署部號。召招徠之。此走魏都計也。破則北兵顧家室心亂。勢必敗歸。徐沛間素稱驍健。若檄諸守臣。倡集義勇。乘勢晝夜逼之。而公館穀北平。休養士馬。逆其至擊之。彼背腹受敵。大難旦夕。平耳。鉉以軍餉盡於德州。城守既久。士卒憊甚。而南將皆鷙材。無足恃。莫若固守濟南。使江淮有備。北兵不能越淮。歸必道濟。吾邀而擊之。以逸待勞。全勝計也。乃設宴天心水面亭。犒問辛苦。述賦賡歌。激發忠義。尋進兵部尚書。佐盛庸軍事。燕兵既至滄州。十月。徐凱見擒。復命鉉守濟南。與高巍賦詩慷慨對泣。庸帥兵往來邢博間。燕兵以鉉故。不敢近濟南。竟趨東昌。辛巳。由萊河還戰蕪城。遂略彰德。真定。壬午春。由德州取道東阿汶上。直抵靈璧。至宿州。鉉率兵踵其後。邀擊。大勝於小河。中原震動。燕王幾欲棄師而歸。會中官有招者。諸將亦請乘虛直進。遂督兵渡淮。不踰月。京師不守。鉉感憤不自裁。左右拂之。燕王踐位。尚擁殘兵駐淮南。已而擒鉉至京。見太宗。背坐廷中。不肯屈。令一仰。願終不可得。割耳鼻。終不肯顧。碎其體。以肉納口中。問曰。甘乎。曰。忠臣肉甘。至死罵不絕聲。時年三十七。父母安置海南。男福安。年十二。編伍河池。康安。七

歲充匠。尋皆戮死。妻楊並二女發教坊司。楊憂憤死。二女終不受辱。上聞曰：渠竟不屈耶？赦出之。皆適士人。鉉以非常之才。匡難殉國。遭天命已改。志不克就。然剛毅果敢之氣。耿耿激烈。不可屈撓。自其蚤歲受知太祖。已負託孤寄命不奪之節。乃卒以烈誠奇畫。震耀古今。太宗每對羣臣。特稱其忠焉。後高賢寧被執。太宗曰：此作論秀才耶？欲官之。賢寧固辭。其友紀綱勸令就職。賢寧曰：君學校棄才。舍而事新主。固無妨。吾食餼有年。義不可上不罪而遞之。卒年九十七。

陳迪。字景道。宣城人。祖宥。賢國初。從征有功。調撫州百戶。因家焉。父仲康。嗣百戶。迪幼儻。有志操。洪武八年。薦辟爲郡學訓導。嘗代郡草萬壽表。太祖覽而異之。十二年。薦召爲翰林編修。遷侍講。預修大典。十四年。陞山東左參政。捕蝗弭盜。民德之。二十七年。內艱。奪情起復。辭不允。明年。進雲南右布政使。時普定等諸彝煽亂。迪率土兵擊破之。賜金幣。建文皇帝卽位。改官制。定六部一品。徵迪爲禮部尙書。燕兵起。上疏陳大計。請擇大將知兵者。委以成功。李景隆方視師。極言姦庸不可用。恐損國威。二年。知貢舉。水旱詔集議條奏。迪言刑獄未清。宜敕法司擇公廉仁厚者。分詣郡縣。審覈獄囚。無令久淹。致傷和氣。又言逃民家業旣喪。且畏逋負。失今不卹。必嘯聚爲患。宜使有司招徠。其不願歸者。聽附籍。暫免差役。凡二十餘事。皆從之。三年。加太子少保。辭兼俸。景隆及諸將屢戰敗。乃受命督軍儲。過家不入。聞變。卽赴京師。太宗已卽位。召迪責問。迪抗聲索。故君慢罵不屈。并收其子鳳山。丹山等六人。同就戮。命割鳳山等鼻舌煎熟。與食。問迪好否。曰：忠臣孝子之肉。香美無比。彼逆輩狗彘。且不食。俱淩遲死。宗族被累者二百人。旣死。人

於衣帶中得詩云。三受天王顧命新。山河帶礪此絲綸。千秋公論明於日。照徹區區不貳心。又有五噫詞。並悲烈。蒼頭侯來保。拾其遺骸歸葬。邑計家橋。幼子珠生。五月乳母芮潛置溝中。得免。八歲爲怨家所訐。太宗宥之。詔戍撫寧。尋徙登州。遂爲蓬萊人。洪熙初。詔釋迪宗。姻邊戍者還鄉。給產業。成化中。郡人祀迪鄉賢祠。甲辰。郡守徐觀。吏部郎李默。謫判寧國。相繼祠祀故居。私謚曰靖獻。敖英贊曰。江漢之水。濯濯精靈。不瑞於物。鍾爲詰人。蜚英翰苑。人文有紀。天馬行空。一日千里。乃參東藩。乃伯南詔。政懋師和。匪舒匪敖。天子曰都。宗伯汝諧。直哉惟清。上副虛懷。痛泣流涕。昌言時疾。宮保峻秩。臣何敢有。鼎鑊如飴。臣死臣職。方練同歸。青天白日。宛陵大節。百世惟公。嚴祀在郡。尸祝曷窮。時有黃魁。不知何許人。爲禮部侍郎。行高古。有文學。習典禮。與迪共事相善。亦不屈死。四世孫鼎。字文相。號大竹。弘治乙丑登第。授禮科給事中。劾廖愷。子倖舉鄉試。會流賊起。條陳弭盜機宜。與臣璫爭辯不屈。坐繫獄。罷歸。嘉靖改元。詔復陝西參議。撫治商洛。時逆賊猖獗。聲震三輔。督兵平之。擢副使。兵備延綏。番彝叛化三十餘年。比至。撫循有方。所在寧帖。及處哈密事竣。擢浙江按察使。尋陞應天府尹。未任卒。子其學。博聞。嘉靖甲辰進士。作御史。彈劾緹帥陸炳。擅作威縱。諸校乘傳騷擾。自立錢法。禁切民間。至於罷市。又使私人崔甲。結京山侯。崔元。專擅鹽利。詔下甲獄。權姦悚然。戊申。按兩淮鹽法。多所建議。商民稱便。庚戌。出爲陝西僉事。尋參議榆林。備兵肅州。時哈密諸彝爲亂。出堵定之。以參政守花馬池。尋進山西按察使。晉僉都御史。撫大同。虜俺答。几慎入犯。左衛督將軍劉漢等破走之。遷副都。屢有戰捷。先是韓藩歲祿大萬。而宗室日繁。額逋且六十萬。至是

秦國將軍融燿等百四十餘人入會城大譟其學設法賑其急詔廢融燿爲庶人燿不受詔卒戡寧正法以戶部侍郎總陝西軍務陞右都敵入花馬池禦之斬獲三百七十餘級以原官調總宣大逆人邱福等入犯弘賜堡督趙總兵迎戰敗之斬首二百級召理戎政復陞南刑部尙書尋致仕卒諡恭靖子琛官至太守。

暴昭山西浮山人洪武中以薦授大理寺務歷北平布政司參政二十八年陞左都御史二十九年陞刑部尙書清介有峻節服官布衣麻履而已三十年五月奉旨取大誥條例附載於律名曰大明律誥六月署政平訟理二旛論罪囚上諭昭曰人言法家少恩此後世用法之過故有是言朕觀唐虞之世好生之德洽于民心亦安有此爾等毋論囚引陛見一時裁決恐未得情自今論囚惟武臣死罪親聽以外悉令奏聞所司引囚至外朝命行人持訟理旛傳諭之其無罪應釋者持政平旛宣遣之繼令府都院科等官詳審寃者卽爲奏聞無寃者實犯死罪以下悉如律其雜犯死罪者准贖建文皇帝卽位充北平采訪使甫至境知有變亟歸言於朝請爲備燕兵起設北平布政司於眞定昭以原官掌司事與鐵鉉等悉心經畫平安等敗召還京金川失守執之不屈上怒命先去齒斷手足猶罵不絕口斷頸乃已

贊曰耿恭守亞夫戰鉉兼之當一面昭與迪各宜勞事弗濟死無逃常山舌睢陽齒三人烈同一軌史官曰戮力行陣嘔心轉輸功有相等者鐵鉉守濟南智計百出幾殲燕及參盛庸軍捷東昌顧邢博與平安戰小河而卒無救於燕兵之南誠以參預不若專制之得爲也使得三數人者塞眞鄭滄德之間燕

能飛越乎。陳迪以遠智芻輓。赴難如歸。何其純一也。初弭盜山東。再靖彝雲南。兵事練矣。而不委之鷹鉞。惜哉。暴昭請爲備。而不及事。勢屛體解。乃以簿書勞之。亦可謂不知計矣。然同效死。其馨骨蓋壽河山哉。而鉉之賦詩天心水面亭。憂喜易形。兵法所忌。甚爲鉉不取也。悲夫。

明書卷一百三

列傳二

忠節傳三

練子甯、附徐卓敬傳

子權

練子甯、初名安。以字行。新淦人。父僖。伯尙。善詩。洪武間。爲起居注。直言忤旨。出爲廣德州同知。遷判臨汀。調鎮安。卒於官。子甯幼卽英邁。從鄉長者竹莊先生學。多解悟。稍長。與金幼孜相友善。謂曰。異日子必爲良臣。我必爲忠臣。過安慶謁余闕祠。弔以詩曰。將軍忠節著荆揚。千載精神日月光。血戰孤城身已殞。名垂青史漢猶香。殘碑墮淚空秋草。折戟沈沙自夕陽。我亦有懷追國士。爲君感慨奠椒漿。洪武十八年。會舉入對。上自發策。子甯對曰。陛下以得人之難。詢草茅之陋。謀之至廣。求之可謂切矣。臣不知陛下果聽之與。抑姑試之與。雖然。君以名求。臣以實應。好言以招禍。觸諱以亡身。非臣敢恤也。陛下所謂敬事而畏神人。此乃唐虞三代命官之語也。陛下臨御十有八載。孜孜求賢。至於數用弗當。雖臣亦疑之。夫人君之道。在知人。知人之職。在任事。君有知人之明。臣有任事之責。故唐虞用人。必敷奏以言。而後明試以功。必

明試以功。而後車服以庸。未嘗造次任之也。陛下孜孜求賢。而數用弗當者。亦察之不詳。用之太驟之過也。陛下擢用天下之士。責望非不深。委任非不專。然迄無報國之效。何耶。徇名而不求實之故也。古之用人者。必其人足當是任。而後用之不疑。今則不然。以小善而遽進之。以小過而遽戮之。且天下之才。生之甚難。成之尤難。陛下既知生之成之爲難。又忍以區區小故。而卽付之刀鋸斧鉞之地哉。漢武以英武之資。朝奏暮召。小不如意。誅戮隨之。以有限之才。縱以無窮之誅。若此無已。奈何爲治。陛下與天下之學校。育天下賢才。而教之之術未盡。故士之成就者未至也。臣願陛下選師立教。求胡瑗之法。分治經治事之科。歲考其成德至矣。能詳於始。則可略於終。能勞於先。則可逸於後。陛下命臣以志根名世。自斯舉始。是欲臣以古人自期也。臣報陛下。請服膺敬事畏神人一語。至於委曲求恩。逢迎將順。非臣所學也。策奏上善之。賜第一甲第二。授翰林院修撰。益以名節自砥。文學行誼。一時推重。滿三載。內艱。杜門屏跡。力行喪禮。復除。陞副都御史。調工部侍郎。建文卽位。與方孝孺並見信用。改吏部左侍郎。以賢否進退爲己任。多所建白。辛巳。改都察院爲御史府。拜御史大夫。燕兵起。李景隆用兵屢敗。召還。子甯執景隆於朝。數其罪。請誅之。不聽。憤激叩首大呼曰。壞陛下事者必此賊也。臣備員執法。不能除姦。請先伏誅。因大哭求死。上駭而罷朝。燕兵渡淮。靖江府長史蕭用道。衡府紀善周是修。上書論大計。指斥用事者誤國。書下廷臣議。用事者怒而詬之。子甯曰。事已至此。尙不能容言者乎。顧所論吾輩有則改之。無則加勉。詬者愧而止。燕王卽位。指揮劉傑縛至。語不遜。斷其舌曰。吾欲效周公輔成王。子甯噴血直前。手探舌血。畫成成王安在。

四字。遂族其家。姻戚逮死者百五十一人。戍邊者數百人。越數年。吉水錢習禮。其姻也。每爲鄉人所持。恆懷不安。以告楊榮。榮乘間以聞。太宗曰。使子甯尙在。朕固當用之。況習禮乎。子甯與方孝孺同朝。孝孺稱其多學而文。弘治辛亥。郡丞王佐刻其遺文曰。金川玉屑集。正德壬申。提學副使李夢陽刻其集。并建金川書院祠其父子。名其堂曰浩然。嘉靖壬午。提學僉事邵銳祠伯高於鄉賢。子甯被逮之前夕。以血大書一練字於裙幅。令侍媵抱匿。歲子匿民間。得免。展輪入閩。備保六世孫綺。爲新甯陳舉掌書記。萬歷戊戌。陳計偕入浙。有江右生同舟。一夕夢子甯持刺來謁。心異之。比入舟。見書記雅哲不羣。問其姓。答曰。姓練。生心動。叩曰。得非吾里練中丞後乎。綺不應。泪交頤。生固叩之。則從衣領中出故裙幅發之。有光灼然。上冲者久之。生以百金贖之。陳不受。遣綺。綺不肯行。曰。以死殉國。人臣之恆。且九族赤矣。歸將何爲。生益賢之。歸白當專。以幣聘之。授衣巾。俾奉先祠。爲置廬田百畝。一時聞者歎息泣下。萬歷改元。詔錄諸臣苗裔。後得子甯妾秦氏。娠生戍所者。曰善慶。俾主祀。子甯本淦東山之三洲人。嘉靖初。以流賊亂。割分峽江縣。東山實隸峽。淦與峽爭立祠。詎訟。知府錢琦議兩祀之。其同邑有徐子權者。舉洪武乙丑進士。爲刑部主事。太宗立。聞子甯死。慟哭賦詩。有翹首謝京國。飛魂返故鄉之句。遂自縊死。

贊曰。力請尙方。志在除蠶。手探熱血。豈必存舌。悲纏友生。香霏玉屑。方駕侯城。精光爲蜺。卓敬字惟恭。浙江瑞安人。後徙滄州。少讀書。十行俱下。終身不忘。七歲。與羣兒嬉。有異人相之曰。此奇兒也。骨法殊異。必爲名鄉。惜血不華色耳。長出就塾。性至孝。不以道遠廢定省。讀書寶香山。夜歸。值風雨迷。

路極望微有火光。尋得一小院。見老叟。與僧帽不受。求歸。與一牛馮之。行及門。縱之。則黑虎也。虎馴去。洪武戊辰進士。拜給事中。好直言。或以大剛則折爲戒。曰。吾諫職。居其位。則直其道。道苟直。死不可回。禍福豈所計哉。時諸王在宮中。服飾與太子無辨。一日。乘間言於上。曰。朝廷視效。全在宮中。此紀綱所先。今陛下於諸王。不早辨等威。而使服飾與太子埒。嫡庶相亂。尊卑無序。何以令天下。上笑。曰。爾言是。朕慮不及此。一日。與同官入奏。適八十一人。上命改爲元士。尋以六科爲發政本源。又改爲源士。尋復稱給事中。敬歷宗人府經歷。進戶部侍郎。建文初。燕王來朝。敬密奏曰。燕王智慮絕人。酷類先帝。夫北平者。強幹之地。金元所由興也。宜徙燕封江南。以絕禍本。夫萌而未動者。幾也。量時而爲者。勢也。勢非至勁。莫能斷。幾非至明。莫能察。上覽奏。大驚。袖入翼。日語敬曰。燕王骨肉至親。卿何得及此。曰。楊廣。隋文非父子耶。上默然良久。曰。卿休矣。事竟寢。太宗卽位。執敬責以不迎。曰。此非前日奏裁諸王者耶。敬厲聲曰。若用敬言。王安得至此。太宗怒。欲殺之。憐其才。且曰。姦臣欲害朕。敬止欲徙朕內地耳。繫獄。或諷以管仲。魏徵事。不聽。姚廣孝以敬素不見禮。銜之。獨曰。昔吳王不殺范蠡。而蠡卒。召吳王衍。不殺石勒。而勒終斃。衍陛下所藉爲重。全在地勢。使敬言見用。離北平直隴中物。豈有今日哉。上猶使中官諭之。堅不屈。臨刑。從容歎曰。變起宗親。略無經畫。敬死有餘罪。神色凜然。經日猶如生。誅三族。太宗嘗曰。國家養士三十年。不負其君。惟得一卓敬。敬有高世之才。立朝慷慨。美丰姿。善談論。凡天文地理。律歷兵刑。悉能察究。詩文峭拔磊落。有詩文五十餘卷。又著書發明周子通書。邵子經世之學。宣德間。門人黃朝光作年譜行狀。侍講劉球爲之傳。

私諡曰忠貞。

贊曰。鳳跂靡游。山奔海峙。伊周媲美。龍比同志。猛虎可馴。亢龍有悔。自託夷齊。媿彼管魏。

史官曰。觀人於忠節。取其氣。尤宜取其度。觀子甯。尚不能容賢者之語。卓敬從容。徙燕之奏。其度越諸臣遠矣。子甯執法。必欲殺景隆。卓敬毅然不爲管魏。而俱慷慨同歸。又何毅也。不容於道行。是以勳老叟嗟耳。觀子甯對策。有經濟之材。惜不柄用。黃練同稱。吾有以疑之矣。至於死君死友。子權無譏焉。

景清

附劉固傳

景清。本耿姓。陝西真甯人。倜儻尚大節。領鄉薦。遊國學。時同舍生有祕書。固不與清觀。清固請。約旦日持還。生果旦日來索。清謬曰。吾初無假書。生忿。訟祭酒。清卽持書往見曰。此清故所業書。當卽與生並誦。清爲撤卷不遺。生瞠視不能出聲。旣退。清以書還生曰。吾以子珍祕太甚。特相戲耳。初清赴舉時。過宿淳化。主家有女。爲妖所憑。是夜妖不至。去卻復來。女詰之曰。避景秀才。女以告父。父追清語之。故清爲書景清。在此四字。令持歸揭於戶。妖絕不至。洪武二十七年。試禮部第三。廷對及第第二。授編修。三載。改御史。三十年春。召見。嘉其才。命署左僉都御史。與實倖。會臺臣鄧文鑑。劉觀及清奏事罷。以疏字訛。懷印入刑科。更疏爲科臣劾。下詔獄。尋宥之。出川陝巡察私茶。改金華知府。建文初。陞北平參議。往察燕邸動靜。太宗讎之。清言論明快。大被可賞。尋召還爲左都御史。改御史大夫。燕兵入金川。諸臣競死節。清素與兵謀。且

與方黃等密善。約慷慨殉國。獨遲回覘建文所在。審知其出亡也。猶思興復。詭自歸附。太宗喜曰。吾故人也。仍故官。委蛇侍班。若不意。與燕邸故僚比。人頗疑之。會司星奏文曲犯帝座甚急。太宗因疑清。是日早朝。清獨衣緋入。命收之。得帶間所藏匕首。詰責奮起。嫚罵曰。清所以至此者。欲爲故主報仇。上大怒。數之曰。若卽不謂天子。卽親王敢爾乎。言愈不恭。命抉其齒。且抉益不恭。頃之。含血若有所啓。直前噴御衣。上命剝其皮。草拔之。械長安門。鐵蒂刷肉。至盡。碎磔其骨。族其家。是夜。上夢清仗劍繞逼。晨駕過。其屍索忽斷。乘風奔三四步。爲犯駕狀。乃命燒之。猶時入殿庭爲厲。命籍其鄉人。轉相攀染。謂之瓜蔓鈔。村里爲墟。清同里人劉固。字永貞。以儒士授青州教諭。建文初。以母老乞歸。許之。清爲都御史。以書招固。因與姊適楊氏者及弟國來京師。以避五藩之亂。清薦固學行可大用。未及授官。燕兵迫金川。國勸固出城。固曰。母老甥幼。不可去。況固受朝廷恩。雖未及用。而義已許國。惟有死而已。知禍必及己。乃潛寄甥於王氏。城陷。固衣冠開門。兀坐以待。尋清以行刺被殺。罪連姻婭。固與弟國。母袁。妻張。同受刑。聚寶門外。固一子超。年十五。有勇力。一怒縛斷。奪刑人刀。連殺十餘人。事聞。命磔之。萬歷中有降於虜者。曰。予劉永貞也。名固。以耿大夫禍連死。詩曰。且酌盃中酒。黃花向坐開。不須談往事。致死野猿哀。人問先生今何仙。曰。方入童初宮。躡年。又降於虜。詩曰。短劍光飛雪。還疑練帶鋪。龍吟豐邑獄。鬼嘯蜀王都。燕客窮圖見。秦官擁陛呼。白虹徒貫日。回看繼人無。靖難罪臣劉固書。又詩。烏行白沙上。鳥去跡不滅。鳥往不復來。鳥巢枝已折。涼火不生煙。枯蒲葉堪結。衣鶉那紉蘭。椒漿沁心熱。明月照寒霜。離離清且冷。樹上棲烏啼。幽人未能寢。空

山來磬聲。幽韻流雲結。獨行森林中。復聽猿悲徹。書法逾宕。南工部侍郎徐良彥。大學士錢士升前後爲之記。

贊曰。詭跡專嚮。幽懷孔烈。山魃避名。文曲象赫。一劍之憤。十族之滅。屍魂驚夢。稿馘斷絕。固靈英英。橫豎通徹。死而不亡。虛空有舌。

史官曰。景清緋衣進刃。與荆卿俱厲。惜皆不成。而蒼涼報國之意。千載並見。智氏已滅。豫讓擊衣。猶足愧二心。況遜荒故辟。無恙哉。恨司星無漸離之筑。徒使奮屍犯駕。厲鬼無能。悲夫。劉固降乩事。人多以爲誕。若然。則邪之避夢之入。屍之行。亦同誕矣。

茅大芳。林英。周濬。司中。甘霖。王玘。李文敏。董鏞。謝昇。連楹。丁志芳。王度傳。

茅大芳。一曰毛大方。名誦。以字行。泰興人。博學能詩文。負奇氣。走鄒魯。謁孟廟。有千古難忘義利關之句。嘉興陳堯道。父友也。嘗贈以詩。比之陸機。賈誼。洪武中。以儒士應辟。典教淮南。擢秦府右長史。上勉以董子輔相之功。大芳諫諍彌綸。不亢不諂。甚得大體。嘗顏其堂曰希董。以彰聖訓。方孝孺稱其志偉才傑。而敦大和雅。深有會於正誼明道之旨。建文元年。擢副都御史。執法嚴正。尋調吏部左侍郎。燕兵起。憤國日蹙。常以詩寄梅殷曰。幽燕消息近如何。聞道將軍志不磨。縱使火龍蟠地軸。莫交鐵騎過天河。關中事業蕭丞相。塞上功勳馬伏波。我老不才無補報。西風一度一悲歌。蓋燕兵起。爲鐵鉉等所拒。尙未渡淮時也。太宗卽位。得所作詩。執之。詰責不屈。與其子順童。道壽皆死。至永樂四年。獲幼子文生。殺之。孫二。添孫。歸

孫死獄中。妻張發教坊死。正德末。祀於鄉。郡人侍郎儲懽輯其遺文。曰希董集。

林英。字章叔。古田人。洪武末。由貢士選授御史。有言英書生。卒難重任者。太祖以狀授英。諭使供職。英竭心奉詔。屢建讜言。每以重郡縣順民心爲本。太祖深嘉之。賜廐馬楮幣。建文初。請裁抑宗藩。在行主父偃之策。不報。復劾奏李景隆誤國。其語激切。反爲所中。下都察院拷訊。謫知瑞安府。時民多逋亡。存者苦稅差。爲按畝丈量。所餘虛糧。令墾荒補之。立鄉約。行文公家禮。建立齋舍。與諸生講學。燕兵起。用御史大夫景清言。還英舊職。命與翰林修撰王叔英募兵廣德北。至勢不可爲。歎曰。臣生無補於時。死有負於國。天命將傾。力難以濟。再拜自經。時年三十有四。太宗卽位。取英家屬。妻繫獄中。自經死。

周璿。山東諸城人。建文初。以神策衛經歷言事。擢左僉都御史。燕兵起。戮力戰守。後爲燕王獲。不屈。死之。妻王。子蠻兒。皆繫獄死。

司中。鞏昌人。洪武二十九年。以監察御史署都察院。三十年。擢右僉都御史。燕王入金川。聞中名。召見。不屈。命以鐵箠刷其肉。至盡而死。姻親同死者八十餘人。

甘霖。宣府懷寧人。洪武丁卯鄉薦。爲御史。剛正敢言。中臺推重之。燕兵至。被執求死。從容就戮。子孫相戒。不復求仕。正德中。知府胡纘宗祀之鄉賢祠。御史王玘。蘇州人。以薦辟爲御史。坐匿姦黨論死。李文敏。蔚州人。以監生爲監察御史。遷四川按察使。未行。亦不屈死。

董鏞。長沙人。以文學薦入太學。建文時。爲御史。諸御史中有氣節效忠本朝者。時時會鏞所。相誓效死。將

校懷二心不力戰者。輒露章劾之。金川失守。執殺之。女發教坊。姻族死戍者二百三十人。

謝昇。沛縣人。建文時爲御史。練兵給餉。夙夜效力。燕兵入金川。不屈死。父旺。子咬兒。謫戍金齒。

連楹。襄垣人。洪武中以太學生授左春坊太子贊善。啓沃甚多。太祖美其剛正。改監察御史。十餘年。彈射不避權貴。燕兵起。與御史董鏞相誓死。廷臣有二者。輒露章劾之。城破。立金川門下。冒燕王馬前欲犯。被擒。詞色不屈。引頸受刃。有白氣冲天。尸僵立不仆。人咸異之。

丁志芳。聊城人。洪武乙丑進士。初任吳橋知縣。考取擢御史。燕兵逼京城。謂妻韓曰。師至。城必克。吾惟一死報國。汝攜其幼子潛去。撫之以延丁氏。後及兵入。被執不屈。死之。子賢。甫十歲。易姓爲龐。孫毅。中成化丁酉鄉試。後復其姓。

王度。字子中。廣東歸善人。少力學。通經史。能文章。爲鄉里師。洪武中。以明經薦爲監察御史。糾繩不避權要。疏十餘上。多見采行。燕兵起。度預調兵食。時盛庸代李景隆。度密陳便宜。有東昌之捷。及景隆還。不誅反用事。忌庸。並譏度。度見疏斥。燕兵南下。益急。度請募兵。又有小河之捷。敕度勞軍徐州。比還京師。鳳陽失守。方孝孺與度書。誓死社稷。燕王卽位。坐方黨戍賀縣。而以出語不遜。復殺之。彝其族。萬歷中。詔赦。惠州守黃時雨。查度宗三十五人。皆放還。

贊曰。嶽嶽執法。遺詩雪涕。濟濟豸冠。共持風紀。滅洪同遊。快然一死。柏峻烏騫。千秋映碧。

史官曰。西臺爲綱紀所由出。大芳峻節。賦詩慷慨。有古唾手燕雲之風。林英饒治。不負其初論矣。而周濬

以下能以觸邪之職爲如飴之歸。方之古烈。復何惡焉。聞同時御史龜城去者四十餘人。情名沈野草。弗勒金石。不然亦當與大芳等同樹軌鳥臺矣。

胡閔

附張仲禮。高翔、鄒瑾、附子機、甥魏冕。

陳繼之傳

胡閔字松友。鄱陽人。博學修行。與吳存、何英、徐素爲同志友。講業長沙王吳芮祠中。以忠義相砥礪。歎曰。天下何時平乎。畫一松於壁。題曰蒼虬出壑。系以詩云。幽人無俗懷。寫此蒼龍骨。九天飛雨來。飛騰作靈物。元至正二十一年。太祖爲吳王。下饒州。過而見之。甚喜。因召見。洪武四年。郡舉閔秀才。上曰。此題詩鄱陽廟壁者耶。授都督府都事。進經歷。建文卽位。改官制。以直諒選爲右補闕。燕兵起。與齊泰等日夜密謀。設法防禦。東昌捷至。陞大理少卿。燕王入京。著方孝孺草詔。繼召閔及高翔。皆衰絰至。哭聲徹殿陛。太宗召閔先入。諭令更服。閔曰。死卽死。服不可更。太宗以彝族恐之。閔不屈。命力士以金瓜擊其齒。齒盡。冒聲不絕。太宗益怒。絃之死。以石灰水浸脫其皮。實以草懸武功坊。子傳慶與其族二百十七人皆市斬。次子傳福方六歲。發鞍轡局習匠。宣德十年。宥爲民女郡奴。自有傳在烈女。其地胡家橋城西隅。鈔提後。左右荒榛時見光。惟有一猿。獨哀鳴徹曉。稍夜。人不敢行。嘉靖初。提學副使邵銳祠之學宮。萬曆中。御史屠叔方疏請盡釋戍籍人。得允。文移長丈許。榜邑門。忽爲旋風捲入天際。若素鸞翔迴。自午迄申。復墮邑廷中。人以爲異。先是凡與閔有連者。悉爲陳瑛腹役柴爨簿錄。老弱婦女死道路。及牴掠死者無算。幼男女置

竹筐挑起戍所中。道困多棄之。得至戍所者。率一丁一衛骨肉四散。如閩外祖。顧名關父子五人。三死獄。兩遠戍。閩姑夫張應原戍死。陳鎖住父子遠戍。閩壻史秉方其祖父俱特死。三子與近宗四人皆戍。閩弟壻祝靖安與三子皆分遠戍。閩母舅江賢祖父子分戍。賢祖之壻劉童祖等父子皆分戍。閩妻之母舅方君之壻傅繼祖父子皆分戍。閩祖母之姪婁克政全家遠戍。閩前祖母之姪于善興一家十人皆分戍。于之壻董道源父子七人戍。閩之甥陳徐李三家皆分戍。徐之壻余姓者亦遠戍。閩男之妻家雷氏全家戍。閩男妻之姨夫李慶童父子六人亦分戍。閩曾祖母之姪張福緣父子三人。一戍海南。一戍塞北。一戍西涼。閩妻之姨夫翟玄童。翟之壻程閩生。閩妻之舅祖蘇得民。三家皆分戍。閩之中表親周劉黃左包史張七姓皆分遣遠戍。□□□□□江普華等。閩母之姨姪劉午孫等。皆遠戍。從來族法之慘。莫有甚於此者。故詳書之以志感云。張仲禮者。饒州人。國初以賢良徵。初爲教官。歷惠州知府。居官清儉。多善政。民感之。以閩曾祖母族。逮籍沒無所有。陳瑛疑有私匿。復用柴斌自惠州加牒。挈縛歸饒。士民災爭賂斌求寬。至饒而仲禮無居。無他族親。遂以非刑苦之。遠戍甘州。

高翔。朝邑人。有文學。矜名節。洪武中以明經徵爲監察御史。所論奏皆國家機要。多被採納。建文時。戮力戎事。相與激發忠義。初翔與程濟並徵。翔厲名節。濟好術數。翔每以小道止濟勿爲。不聽。已而兵興。濟每勸翔學其術。翔曰。我願爲忠臣也。金川門破。翔約濟同死。濟曰。我願爲智士。燕王素聞翔名。卽位召之。翔持衷服入見。大哭。語不遜。遂沒其產。諸給高氏產者皆倍稅。曰。令世世罵翔也。親戚悉戍邊。又發其先墓。

雜犬馬骨焚灰揚之。而以其地爲漏澤園。

鄒瑾、永豐人。洪武中嘗官重慶。金華王紳稱瑾志篤才敏。議論磊落。忠義人也。建文二年爲大理寺右丞。燕兵既入。與其子樸、甥魏冕等俱死之。樸字爾昂。建文初以儒官仕周府。直言諫沮其邪謀。王不聽。嚴刑禁錮甚密。王逆謀覺。大臣以朴諫疏聞。上嘉其忠義。召至京。陞御史。尋陞秦府長史。聞父死難。憤激不食。死。魏冕時爲御史。勁直有才名。燕兵至。徐增壽私謀開門迎納。冕與鄒瑾率同僚十八人。卽殿前毆增壽。幾死。會輟朝。大呼請速加誅。臣等義不與此賊同生。聲聞禁中。而御史曾鳳詔等復力請。建文皇遂手刃之。明日宮中火起。或謂冕宜急迎附。厲聲曰。使吾改臣節。明君亦所唾棄。奈何徒自壞也。遂自殺。陳瑛請追罪。殛其族。

陳繼之。莆田人。建文庚辰進士。授給事中。嘗以江南僧道多占腴田。蠶食百姓。請爲限制。僧道人給五畝。餘以賦民。從之。燕兵南下。建白抗禦。多所指斥。又言於朝曰。徐增壽燕之至親。必有陰謀。宜先事誅之。不聽。已而果然。燕王卽位。召責問。不屈。磔於市。彞三族。父四秀。母黃氏。年垂七十。發甘肅編伍。皆卒於道。男徵仔。四歲。隨母姚氏。給配象奴。女阿宗。給武臣爲奴。弟余翺等坐戍邊。弟婦發軍中。女皆送浣衣局。

贊曰。胡三十姓。鄒四百人。翔。冕繼之。同罹苦辛。髦倪不恤。墓骨亦焚。哀猿泣雨。正氣干雲。毒哉賊瑛。長君逢君。

史官曰。蒼龍誠有骨。既召不卽錄用。僅以一經歷終太祖朝。然建文亮節。在太祖時。率不甚顯。知國初官

人以福不以才。其或繼周者，雖百世可知也。斬經易以草實，孤猿哭其墟里，哀哉！高翔怒燕及先墓，其慘更甚。知其於戎行，必有大過人者。鄒瑾與其甥冕擊姦自裁，其有先見之智乎？繼之能發增壽之陰謀，使此姦一去，燕豈不瞭如警哉？若鄒樸郡奴，蓋不愧其父矣。

郭任、盧迴、戴德彝、宋徵、巨敬、韓永、盧振、黃彥清傳

郭任，丹徒人，廉慎有吏才。建文間，爲戶部侍郎，朝廷用齊、黃之策，討諸藩之不靖者，欲以次及燕。任奏曰：天下先其本而後末，則易成。除惡不去其本，臣誠以爲迂也。今日儲財粟以備軍需，果何爲者？然北討周、南討湘，舍其本而末是圖，此豈上策？且兵貴神速，曠日持久，銳氣旣竭，姑息隨之，所謂強弩之末不能穿魯縞，有坐困耳。燕王聞而惡之，及兵出，給餉不貲，燕兵入金川，任不屈死之。子經亦坐死。少子金山保成，廣西三女給配。嘉靖中，鎮江知府劉儲秀祀之鄉賢祠。

盧迴，一名珙，仙居人，性疏爽，不屑曲謹，然大節皎然。少喜飲酒，飲酣輒長歌，人目爲盧狂。卽仕，願折節恭慎。建文三年，歷戶部侍郎，燕兵至，不屈，縛就刑，長謳而死。台郡立入忠祠祀之。

戴德彝，奉化人，洪武甲戌進士第三，入編修，陸侍講上諭以翰林雖職論思，然政治得失，民生利害，當知無不言。以唐陸贄、崔羣、李絳爲法。德彝與侍讀張信等皆頓首謝。由是感奮，思所以稱上意。章屢上，直聲震於朝。後改御史，益善於其職。建文中，改右拾遺，燕兵迫，與黃子澄、齊泰等日夕畫策防禦。燕王卽位，召見，不屈死。族其家，有媵匿其遺孤，法吏追索，斃兩乳，見五臟，終無所承。德彝因有後，邑人立忠烈祠祀之。

宋徵建文元年爲宗人府經歷。上疏請削罪。宗藩屬籍。諸王聞之。皆恨徵。徵又嘗與謝昇、牛景先數言耿、李諸將失律懷二心。當治罪。燕王旣立。得其章疏。責問不屈死。彝族。

巨敬平涼人。初爲御史。抗直敢言。建文中改戶部主事。充史官。清慎有聲。後與陳迪同被逮。責問不屈死。彝其族。

韓永陝西西安人。不知所自起。建文時爲戶科給事中。豐軀美髯。吐音宏朗。每慷慨論兵事。建文皇帝喜之。金川失守。杜門不出。與陳迪、巨敬、戴德彝等同逮。太宗欲官之。對曰。吾王蠲耳奚以官爲。不屈而死之。時同逮死義者三十五人。惟黃福、尹昌隆以歸命居官如故。

盧振不知何許人。建文中爲兵部郎。燕兵起。與齊泰等謀畫戰守。效力爲多。燕兵入金川。縛至。振厲聲數太宗罪。乃榜掠而死。彝其族。其時燕護衛指揮亦有盧振。

黃彥清徽歙人。建文末爲國子博士。燕兵旣入。以曾在駙馬都尉梅殷軍中。私諂建文君。坐死。并逮從子池。貴典史金蘭等繫獄。殷言彥清實不在軍中。金蘭等得釋。後官知縣。又有黃清者。以都御史出巡撫。太宗詔拒不受。欲圖興復。下皆效命。顧兵力不足而死。

贊曰。當門之蘭。不待不殺。七尺可捐。此志不奪。郭、盧而下。事異趨同。清議匪私。千古英風。

史官曰。郭任先制燕。誠上策。觀燕之起甚難。若一舉而圖之。如振落耳。曠日持久。四字洞肌髓矣。迺長歌以終。死協金石。德彝以詞臣具骨鯁。宋徵以卑秩關國。是皆鳥鸞而獸麟也。敬抗直。永慷慨。人才中豈易

得盧振數罪。彥清私諂，皆磊落可欽。數百年而後，猶令人想見風采焉。

張昇、謝貴、葛誠、余逢辰、杜奇、湯宗、倪諒、彭二逸傳

張昇、澤州人。洪武中，舉人材，累官刑部左侍郎。建文初，諸大臣言周代、岷谷、湘相繼告變，藩國所在，宜簡精強謀略有威望者爲守臣彈壓。乃出昇掌北平布政司事，與都指揮使謝貴並受密命。未幾，詔讓燕、燕王皇恐謝，衆疑不測。昇、貴知燕必反，乃集兵部署防守王城。飛章奏聞，燕王稱疾不出。昇嘗問疾殿中，燕王擁鑪四圍火，猶寒顫。昇等以爲果然。長史葛誠伺報昇，謂王無病，病僞也。昇且信且疑，顧兵備已嚴，睨王府在陷穽中，不甚加意也。張玉、朱能請王起兵，燕王曰：「非計擒昇、貴不可。」建文元年七月六日，會朝廷遣人逮府中官校，燕王盡縛置庭中，召昇、貴入付之。二人猶豫未進，燕王促南使者急趣之。二人謂燕王實窘，不得已應朝廷命，遂入端禮門，伏發被縛。燕王時詐病扶杖，擲杖起曰：「我何病爲爾輩所迫耳。」昇不服，死之。昇初至北平，以李友直機警，寄心腹，令刺事燕府。友直輒先事泄昇謀，以故燕得爲備。昇死，僞署友直北平參議，渡江後，昇抄家，株連親戚。法司以程亨等五人見太宗曰：「張昇之親，與鐵同頑，直須鑪冶，引出生燒之。」疏遠及里人並戍邊，一子亡去。久之，太宗屢夢昇披髮爲厲，令焚其屍，面色如生。洪熙元年，詔昇戚屬戍邊者家籍一人，餘悉縱還。正德十五年，知州馬汝驥立祠祀。

謝貴、洪武中，以錦衣指揮僉事陞河南都指揮僉事，署山西行都司事。二十八年，坐法當死，宥之。降河南衛指揮僉事。建文元年，議削諸藩，時燕王稱病，朝廷名爲備夷，齊、秦薦貴才，以爲北平都指揮使，與布政

使張昺通王府官屬伺變練兵先發後聞六月貴等在城七衛并屯田軍士布城內圍王城外牆又以木柵斷端禮諸門燕王聞之曰我病不出雖塞可也貴等乘馬張蓋過王門不下又殺王城守卒軍士登城擐甲執兵飛矢入王城四面鼓噪欲激燕以擒之有名而王知其故爲備甚嚴不爲動七月有醉卒磨刀於市隣媪問故張目曰殺王府人媪竊以告指揮張信信入語王乃召指揮張玉朱能等集護衛勇士八百人譏先擒貴昺王曰彼防守如此猝難動須以計致之事在張昺傳乃匿壯士譚淵等擒昺貴王親臨詰斬之其從者猶未知移時不出稍稍散去遂攻九門黎明已克其八惟西直門未下王命指揮唐雲往諭守者皆散乃稱兵

葛誠不知何許人以進士爲燕府長史建文皇帝卽位燕王使誠奏事京師觀朝廷所爲上召問府中事誠具以實告遂密有委託使爲內應誠許諾還燕復命王覺其詞色有異深疑之王佯病官司入問疾皆懼危篤獨誠知王僞私告昺貴使勿信宜爲備又使人上變於朝及昺貴死梓誠下殿斬之後族其家余逢辰字彥章宣城人爲燕府伴讀燕兵未起逢辰頗聞其謀遺書戒其子自分必死起兵時逢辰涕泣以諫不從死之

杜奇北平人燕兵初起欲廣置羽翼下令境內舉賢良方正有司以名上奇極諫當守臣節勿二語懇篤王怒立斬之時方急兵事未暇逮其家及卽位乃族

湯宗贛州人爲北平按察僉事上言北平按察使陳瑛密受王府金錢有異謀逮瑛謫廣西燕王入京卽

位日乃召瑛還爲都御史窮治建文諸臣多坐棄滅恨宗尤甚捕至族死株連頗多
倪諒燕山左護衛千戶上變告府中事府中官旗盡逮詔獄于諒周鐸誅死太宗卽位收諒不屈死籍其
家壯者戍邊鄉幼者面刺離間親王四字發鞍轡局

彭二逸其名以行稱建文初爲北平都指揮驍勇善戰有威名聞昺貴被害二急上馬挺槊大呼市中曰
燕府反從我有賞集千餘人攻端禮門遇燕健卒龐來興丁勝格殺二衆亦散去

贊曰兆徵大橫事殊願成昺貴誠振正疑爲傾徒傷賁勇慘歸鑕烹侃侃不替乃有奇辰宗諒與二庶幾
成仁

史官曰昺貴而下或防燕或諫燕皆不能制燕之命嗚呼疏而愚矣疏則債愚則忠卽債不礙
忠予以爲諸人皆忠也豈可以成敗論英雄哉若倪諒以燕千戶而不與謀能上變告尤足取焉聞有何
奉常者不與燕謀卒免於難何賴是奉常爲死見余杜面孔奚施彭二事雖不成蓋首櫛燕魄矣

龍鐔石撰程通傳

龍鐔字德剛萬載人洪武十七年以國子生超授浙江按察使有罪左遷長洲知縣尋陞晉府左長史燕
兵起朝廷徵兵於晉鐔引大義力主發兵燕王卽位械鐔下獄不屈死有收其遺骨得所自書贊曰捐生
固損弗事二主別父與兄忍慟肝腑盡忠爲臣盡孝爲子二端於我歸於一所

石撰山西平定人洪武中爲甯府左長史燕兵起諸郡縣皆下撰在大甯力請主將爲嚴守備以抗燕久

之。燕王怒。攻拔之。得撰。不爲屈。遂支解而死。

程通。字彥亨。績溪人。祖平。字德正。性溫厚。素與友張德良。羅法。株連者衆。波及平。御史喻曰。灑於衆則汝免矣。平謝曰。家世儒業。非義不敢爲。不幸爲人所誣。而反又誣人。是欺天也。御史歎異之。尋謫延安。與郡人朱仲傑偕行。仲傑悍戾。盛暑同憩樹下。仲傑囑守行囊。趨酒家飲。俄驟雨水大至。平自救不暇。仲傑還責償于平。乃如數還之。至延安。仲傑依于梅百戶。明年。仲傑臥疾。以所有寄之。梅曰。待子至付之。旣卒。梅調守他郡。平爲理後事。或曰。彼待子如是。獨無憾耶。平曰。同里無依。我當自致。聞者歎服。後朱氏子德生以母命來省。行至汴。聞仲傑死。而囊篋爲梅百戶挈之他往。中道還。給其母曰。吾買地葬父矣。出所攜衣曰。此遺物也。越三年。平子實來省。遂命負其遺骨歸報朱氏子。令迎葬。德生藐不顧。尋平自延安歸。知朱氏柩尙留殯後園。乃曰。延安數千里。尙爲負之歸。績溪距休寧百里。豈可不一送。旣命孫通負至其家。實剛直尙義。兄純。洪武中。以人材爲潮之程鄉知縣。有治蹟。其子泰。將省父程鄉。稚不任行。實與俱。中道聞兄被逮。且瘴作。偕行者誅泰反走。實怒曰。汝父坐事。正當赴救。歸何心耶。遂徒步至潮。冒瘴死。通其長子也。少有至性。動必遵禮。嗜學不倦。洪武乙丑。貢入太學。徒步走廣。扶父柩還葬。廬墓三年。哀毀至。妻子不相識。時祖平老。謫延安。通上書乞骸骨。極懇切。太祖憐之。持其章不下。私驛召平。旣至。乃召通對立玉階下。顧問平。汝識此人否。祖孫相對哽噎。不能仰視。上歎曰。孝哉。若人。命兵部除其籍。驛送平還鄉。庚午。舉應天鄉試。時遣諸王將兵行邊。以封建策諸貢士於廷。對稱旨。親擢第一。授遼府紀善。辛未。從王閱武臨

清祖喪歸。復廬墓三年。復任。太祖上賓。從王渡海南還。燕兵起。草封事數千言。陳備禦之策。進左長史。明年。從王徙國荊州。悉心輔導。王敬禮之。國事皆咨焉。先是在遼衛士紀綱者。山東黜生也。狡猾善詞事。通每召而笞戒之。及太宗卽位。綱得見。留爲錦衣指揮使。被寵。乘間言通前有封事。械通詣京師。庾死。家人發戍邊簿錄其家。得笏田數十畝。遺書數百卷。牯皮數張。黃希范方知府事。雅與通善。至是亦連坐。并籍其家。初遼王雅敬重。命圖其像。又錄世譜。親爲贊。後十年。異母弟彥迪以事至荊州。王召見。語及舊事。曰。汝欲見汝兄否。彥迪頓首不知所對。王出遺像示之。彥迪哭失聲。並請其世譜以歸。永樂中有讐家欲訟之官。適彥迪他出。家人懼而焚其像。獨遺世譜。通厲志聖學。居常抑抑如有弗逮。至臨事則毅莫能奪。故所立如此。詩文辭氣超越。有集百餘卷。悉毀於官。

贊曰。藩垣屏翰。寧與晉遼。惟三長史。乃心王朝。龍石守口。通讀於鴉。移孝爲忠。維音嘒嘒。

史官曰。急國難者。不在受恩之淺深。官爵之崇卑。三長史皆閒曹。亦梁園老耳。而慷慨發兵。嬰城固守。封事備禦。纒纒千言。何其謀遠而猷壯也。奚必常依日月之光。早備心膂之寄。而義烈扇世。有古國士之風焉。

明書卷一百四

列傳二

忠節傳四

黃觀

附金有鑿、張同知

黃鉞、陳性善

附黃埤、陳子方、彭與明、劉伯完傳

黃觀字伯瀾一字尙賓貴池人初從父贅姓許幼穎敏受學元侍制黃昇昇死節觀益砥礪博通今古有聲性至孝洪武甲子貢入太學是歲領鄉薦第一外艱服闋仍入監嘗繪父母墓圖自隨閱之輒泣辛未會試第一廷對禦戎策大要以天道福善禍淫之機人事練兵講武之法爲言稱旨復擢第一拜修撰日侍御前敷奏明爽上甚愛重每賜顧問命編寫省貪等錄上以其有政事才凡法司諸榜文令觀撰成卽書之兼理軍職貼黃及管註銷諸司案牘侍東宮講論累遷尙寶卿禮部侍郎復姓建文初更官制每部增侍中一員位次尙書命觀爲之仍掌尙寶司事與方齊並見信用燕兵起索齊黃急時觀草詔極其詆斥四年燕兵已迫密奉詔募兵上游且督諸郡勤王燕王已卽位列文職奸臣罪狀觀名第六先是索寶不得或言已付黃觀出起兵矣於是索觀急觀至安慶聞變痛哭謂人曰吾妻翁有志節必不辱招魂葬

之江上。明日家人自京奔至。言夫人暨二女同被執。有象奴得之。夫人給以釵釧。出市酒。殺急攜二女。率家屬十人。投淮清橋下。死。觀慟哭。至李陽河。朝使見。迫知不可爲。給曰。入賀新朝。禮當豫習。朝服東向。再拜。投羅剎磯。湍流中。急鉤挽之。僅得珠絲棕網以獻。太宗命東芻蒙觀帽。而對於市。年三十九。逮姻黨百餘人。繫獄。仁宗初。放還。友人柯暹爲之傳。是後清溪居民。時見冠裳者一人。攜二。三女郎。立溪畔。皆識爲觀也。駭歎立祠。景泰中。邑人進士孫仁使遼。於老卒朱黻處。得其文集。黻故諸生。從觀遊。以累戍。觀故宅在學宮西偏。貴池令龔守愚卽其所立祠。而南京祠亦益拓。有金有聲爲刑部侍郎。與觀及張顯宗等徵兵浙江。至南昌。將入援。爲取部百戶劉恩縛送京。死之。又有松江同知周繼瑜。聞觀奉勤王詔。乃榜募義勇入援。極言大義。感動人心。痛詆燕王。乖恩違義。太宗卽位。械至京。磔於市。初翁夫人及二女屍順流至。賽工橋。相持而立。顏面如生。烏鳶不敢近。久之。土人瘞於橋側。萬麻中。青陽施益臣爲封樹立墓。夫人投水時。嘔血於通濟橋石中。成小影。陰雨則見。相傳爲大士影。衆戒勿踐。有僧昇致菴中。夫人見夢於僧曰。我黃公妻翁也。僧因沃以清水。悲愴之容。恍然側立。東向。髣髴鬢鬢。人咸異之。戶侍郎徐良彥移置祠中。題曰翁夫人血影石。太學生許重熙刻銘於上曰。湯湯淮流。炳炳梁石。爰滯貞魂。乃昭靈跡。金光隱見。玉顏映觀。冤並飛青。怪疑藏碧。昭哉侍中。有赫烈媛。命際蛇窮。時逢龍戰。神逐魂浮。光垂唾現。年歲可遷。精英不變。儼然法相。恍同梵侶。鬱影沈雲。幽香陰雨。蓬鬢悽容。嚴凝悴宇。僕固留痕。明月印礎。靈修容與。義義淒淒。孝義聖母。驂螭駕覽。飭我巾幗。嗟彼鬚眉。貞砥不毀。千載傳彝。

黃鉞字叔揚常熟人少明敏好學貧無藏書日從書肆流覽倚徙終日不歸主者憐其少多與觀時天下新定重法繩下士不樂仕而詔求賢急鉞父見其好學恐爲郡縣所知數懲之兒何爲自速不祥不能止則潛走友人借書道中披覽比至輒盡每以無餘爲恨楊濬者元末隱士也學古行高嘗避雨泊舟鉞舍旁見鉞持書於無人處竊吟哦不休異問之曰豎子好學如此日能讀幾何答曰兒不省事得觀古人爲樂苦貧不能多得也濬曰我多先人遺書去此不遠子能從吾遊乎可以遂子樂鉞喜再拜卽從濬至其舍與數冊去輒卽來易濬怪其頻舉所借書問之悉誦如流濬大喜曰吾架書且萬卷寶惜不能舉付汝汝當就吾舍讀因令其子福同起處三年盡其書郡縣聞之辟鉞賢良并及福濬恚曰吾不幸遭世亂家破族散獨攜一子避遠郊畢此餘生曩以子好學乃用相餉奈何不自晦卒爲人知累我福福死矣鉞徐曰第母患當爲公說尹罷之乃教福結束如農夫誠曰卽尹有問子但操吳音勿有所對因與詣尹曰鉞與福同居數載知甚深福才能無所長而福父老病不可行卽行恐不足應詔旨君且得罪時福詞訥故作不解尹心知其詐也乃罷福獨上鉞以生員除宜章典史洪武二十二年舉湖廣鄉試明年成進士授禮科給事中居職封駁甚多建文中外艱歸方孝孺往弔屏左右密曰北兵日南蘇常鎮京師左輔也君吳人又朝廷近臣今雖去當有以教我鉞曰三郡惟鎮江最爲要害守非其人是撤垣以納盜也指揮童俊狡獪不宜獨任吾近見其奏事上前視遠而言遊此其心不可測蘇州知府姚善忠義激烈有國士風能獨當一面但仁慈有餘御下太寬此治郡之良才恐不足定亂然國家大勢不在江南待戎馬至此而

禦之晚矣。孝孺是之。因附書致善。以忠孝相勉。期戮力王室。濟時艱。善得書。與鉞相對慟哭。自誓必死。鉞守父殯。在陂上築廬居。御史按部至常熟。問曰。此有黃給事何在。邑中無知者。鉞鄰乃引御史舟至陂。時暮秋。收禾堆積。村巷路又泥淖。御史徒步抵舍。鉞從幕中對語移日。家人欲割雞具饌。鉞曰。豈有居喪而殺牲禮客者。卒以菜粥對食而別。燕兵至江上。善奉詔總蘇、松、常、鎮、嘉五郡兵馬。勤王以書招鉞。鉞即日營葬畢。詣軍慷慨曰。明知無益。義不可諉也。既而童俊果以鎮江降。燕王既卽位。詔暴善罪狀。急收之。善麾下許千戶性權譎。因得親近。縛善邀賞。鉞聞。遂絕食。閉目三四日。或傳善款服。已得有歸。瞪目曰。豈有從逆姚蘇州哉。且少俟之。善事定。吾乃引決。脫果不死。吾將下報希直。遂復稍稍食。七月十一日。報善死。鉞起祭琴川橋。西向再拜哭曰。吾與君同受國恩。不幸有國難。義同許身。今君與希直同死國。烈矣。吾何忍背義獨生。祀畢。給家人歸祭具。遂從容整衣冠。奮身入水死。時捕善黨急。縱橫郡邑中。且訛言併錄鉞家。親族悉驚竄。楊福獨具棺衾。晝夜泣橋側。求屍不能得。更數日。屍忽自出。立水中。容貌如生。福慟哭親抱而起。易其衣。體猶不敗。竟成禮葬之。復弔以詩曰。江風夜夜鼓橫波。江雨朝朝溼薜蘿。九辯不回哀郢志。三軍難奪採薇歌。手披宿草孤蹤滿。夢落空梁月影多。誰謂百年臣子恨。獨聞野老淚滂沱。葬虞山北麓。邵圭潔爲立石。

陳性善。初名復初。以字行。浙江山陰人。洪武乙丑。進士上第。臚唱過御前。太祖見其容止凝重。屬目久之。謂侍臣曰。君子人也。授行人司副。遷翰林檢討。初。誠意伯劉基卒。上遣御史李鐸往取其遺書。簡工書者。

數人入便殿。繙錄性善與焉。諸人憚天威嚴重。多戰汗不成字。性善動止安雅。書法妍正。上嘉悅。賜飲饌。時誅譴叵測。性善留中。竟日。家人以爲死矣。旣出。乃大驚。拜禮部左侍郎。薦起薛正言。韓宜可於戍籍。皇太孫在東宮。久熟性善名。卽位。一日退朝。獨留賜坐。問以治天下之要。使書以進。性善益感知遇。盡所欲言。上面允行。而中多止。一日請對曰。陛下不以臣迂。猥承顧問。臣旣僭塵聖聽。許臣必行。今而詔書云然。所謂爲法自戾。何以信天下。上爲動容。未幾。燕兵南下。改副都御史。監平安軍。戰靈璧。遂與大理丞彭與明。欽天監副劉伯完。指揮王資等十餘人。皆被執。燕王旋縱之歸。性善曰。辱命罪也。而又活於燕。何以見吾君。朝服躍馬入河死。後徙邊。洪熙初。赦還。時餘姚黃墀。陳子方與性善同死節。與明。萬安人。建文時。以大理承督諸將。有風裁。伯完精占候。多奇中。預知靈璧之敗。後被釋。不知所之。贊曰。矯矯伯瀾。忠壯之殫。赴江投淮。一家若安。叔揚就義。從容爲難。復初抱憤。去不復還。怒隨濤立。悲咽湍浚。吁嗟汨羅。萬世斯丹。

史官曰。嗚呼。從容就義。古今所難。若其懷翺翔之情。昧舍生之概。避經濟之小節。忘見義之大勇。卽梯榮顯勢。君子醜之。黃觀奮發勤王。名居第六。如斯馨壯。可不謂烈焉。黃鉞畢葬。赴難。失其同人。忍須臾以待。克一之徇命。而自沈。不棘以曼禍。不紆以苟生。孝不遺親。忠不後君。翠川俎豆。信不媿友。備美哉。性善縱不偷生。情非畏罪。均無傷勇之譏。咸樹成仁之軌。其垂名徽潔。與河流俱永矣。

王良程本立曾鳳韶龔泰傳

王良字天性。祥符人。洪武二十六年。任僉都御史。尋遷刑部右侍郎。建文初。轉左。辛巳。坐未滅燕軍校罪。出爲浙江按察使。謁岳飛墓。誓曰。苟愧步武。非人也。金川之變。慟哭誓殉國。太宗以前事頗德之。特召將大用。使者至。良執下獄。詰旦。且縛。以徇。道中。忽衆鼓譟奪去。良還坐堂上。抱其印。及其餘九印。悉騰置於篋。攜歸。謂妻曰。我分應死。顧思所以處汝。未決爾。妻應聲曰。君爲男子。乃爲婦人謀乎。從容餽良食。抱其子。歎歎如廁。投池水死。良往覓子。匍匐池旁。屍浮起矣。殮殮畢。積薪閉戶。戒其家人毋得出。命妾抱其子。往僚友某僉事延其祀。遂舉火。以印投之。身赴火死。事聞。太宗曰。死自其分。乃毀吾先皇印。詔徙其家於邊。旣而風雨晦冥。人恆見其神出沒。後至者不敢居。正德中。按察使梁材始卽司門內水鑑亭爲祠祀之。

程本立字原道。系出伊川。徙杭。再徙桐鄉。父德剛。通書史法律。負才氣不仕。元將賂成兵過暴掠。爲陳利害。成悟。戢其部衆。欲奏官之。以疾辭。本立少有大志。從邑人鮑恂。貝瓊游。讀書不務章句。海鹽沈壽康時。稱爲孝隱。先生嘗執手勉之曰。學者爭務科舉。以經學爲名。而無實。子質厚年富。當務聖賢之學。本立遂篤志修檢。乃從金華朱克修。得考亭之傳。復往學于白雲許先生。國初。舉明經秀才。除秦府引禮舍人。後改周府。從王之國。大梁二十年春。進長史。從王來朝。被累謫雲南馬龍。他郎甸長官司吏目。留家大梁。攜一僕之任。時六詔初附。叛服靡常。會施可伐煽誘百夷爲逆。本立單騎入夷巢諭之。會咸悅附。西平侯沐英。布政使張統皆禮重之。委以統領守禦。本立深憫民夷之患。矢心盡瘁。創爲賑濟安撫之策。未嘗以文

法自委。歷道險遠。山行野宿。自楚雄。姚安。大理。鶴慶。麗江。永昌。徧往撫綏。民夷稍安。三十一年。奏計入京。應天府尹向寶。翰林學士董倫薦其學行政事。宜留中朝。徵翰林。充纂修官。預修太祖實錄。未幾。陞試左僉都御史。作御史箴。尋卽眞。俸入之外。不通餽謁。時稱清御史。建文三年。坐失陪祀調俸。仍留翰林編纂。明年。實錄成。改江西按察副使。未行。燕兵入京。痛哭自經死。燕王卽位。追奪官籍。其家無遺資。所著有巽隱集十卷。

曾鳳韶。廬陵人。洪武末年進士。建文中爲御史。會諸藩王入覲。馳皇道入。且不拜。鳳韶侍班。大旨殿上宜展君臣之禮。宮中乃敍叔姪之情。由皇道不拜。大不敬。建文皇帝曰。至親勿問。燕兵逼。朝議遺書燕諭罷兵。無敢行者。鳳韶毅然請行。姚廣孝言於燕王勿納。乃取竹通節。入書鼓風達之。亦不報。建文皇帝出亡。鳳韶請從。曰。多人不能無生得失。麾之去。鳳韶泣曰。臣頃以死報陛下。太宗卽位。召復御史。不至。加吏部侍郎。召。又不至。刺血書憤詞襟上。曰。予生廬陵忠節之邦。素負立朝骨鯁之腸。讀書而登進士第。仕宦而至繡衣郎。旣一死之得宜。可以含笑於地下。而不愧古文天祥。屬妻李。子公望曰。我死。勿易衣斂。遂自殺。時年二十九。李亦自經。

龔泰。字叔安。義烏人。少聰敏。日記數千言。洪武十九年。領鄉薦。明年入太學。奉命閱齊府獄。監安東倉。盡力搜剔。獄清弊絕。吏部策試第一。除試給事中。建文時。遷都給事中。燕兵逼。命泰巡城。泰與妻傅訣曰。國事至此。我自分必死。爾第攜幼穉歸。否則無辱也。妻諾。俄宮中火起。泰馳赴。爲燕兵所執。見燕王於金川。

門不屈。王以非奸籍，不殺。因曰：主辱臣死，況已亡耶？乃奮身投城死。妻負骸歸。子永吉，累官兵部侍郎。贊曰：誓岳無愧，書襟以血。自勵有箴，去家則決。懷懷忠忱，四人一轍。

史官曰：王良，斬使不遂，縛而過市，邁斬衣矣。火其身，不火其名。赫炎哉！程本立，撫夷有方，奪鳳凰池而猶徇國，可謂無怨矣。曾鳳詔，直聲動殿陛，且屢卻寵召，其孰能之？龔泰，巡城死於城，與雉堞俱崇也。若四人者，蓋不徒臨難勿苟，而平時之略，有足嘉焉。

王叔英、王良、陳忠、廖昇、周是修傳

王叔英，字原采，黃巖人。少孤，從母嫁陳氏，因姓。久而後復，負至性。往往聞孝子友弟，卽爲之感，激流涕。好獎進士類。洪武中，與楊大中、葉見泰、方孝孺、林右並徵至京。辭還鄉。二十年，薦起仙居訓導。歷漢陽知縣。有禱雨文三首，約四日不雨，減一食。五日減二，六日絕食。以俟神之顯戮。其誠如此。隨澍隨止，皆應其請。遠近異之。建文初，孝孺被召，詒書曰：凡人有才固難，能用其才尤難。子房之於高帝，能用其才者，賈誼之於文帝，不能用其才者也。子房察高帝可行而言，故高帝用之。一時受其利，雖親如樊、呂，信如平、勃，任如蕭何，不得間焉。此子房能用其才也。賈生不督而易言，且言之太過，故絳、灌之屬，得以短之。此賈生不能用其才也。方今明良相遇，言而行之，千載一時。雖然，天下事固有行於古而亦可行於今者，亦有行於古而難行於今者。夏時周冕之類，此行於古而亦可行於今者也。井田封建之類，可行於古而難行於今者也。可行者行之，則人之從之也易。難行者行之，則人之從之也難。從之易，則民樂其利。從之難，則民受其

患此君子之用世貴得時措之宜也。時孝孺欲復井田。故言及之。孝孺得書。感其意。薦之。召爲翰林。修撰。上資治八策。曰。務問學。謹好惡。辨表正。納諫諍。審才否。慎刑賞。明利害。定法制。皆援證今古。可見施行。又曰。太祖除姦剔穢。抑強鋤梗。如醫去病。如農去草。去病急。或傷體膚。去草嚴。或傷禾稼。是故體膚病去。則宜調燮其血氣。禾稼草去。則宜培養其根苗。并論行限田法。甚具識者。知其有經濟遠略。上深嘉之。與孝孺曰。見信重。燕兵渡淮。上遣使四出募兵。叔英奉詔行。至廣德。聞建文皇帝遜。燕王卽位。慟哭。會齊泰出奔。相值。曰。泰貳心矣。急擒泰至。密問之。故乃相抱慟哭。圖後舉。已而知事不可爲。止移書於祠山道士盛希年。葬我祠山之麓。命治棺。書絕命詞藏裾間。沐浴冠帶。自經。玄妙觀柏樹。詞曰。人生穹壤間。忠孝貴克全。嗟予事君父。自省多過愆。有志未及竟。奇疾忽見纏。肥甘空在案。對之不能嚙。意者造化神。有命歸九泉。嘗念夷與齊。餓死首陽顛。周粟豈不佳。所見良獨偏。高蹤邈難繼。偶爾無足傳。千秋史官筆。慎勿稱希賢。又題其案曰。生旣久矣。未有補於當時。死亦徒然。庶無慚於後世。年三十七。壬午六月二十七日也。道士斂之。葬於城西五里橫山。尋窮治姦黨。妻金。已自經死。二女赴井死。弟原默。變姓名匿京師商旅中。鄉有金寬者。告捕受戮。正統中。楊士奇題其墓曰。嗚呼翰林。修撰王原采之墓。爲文以祭曰。先生之學。聖賢是師。先生之行。綱常自持。先生之心。金石其貞。先生之道。霜雪其明。浩然歸全。乘雲翩翮。我懷先生。崇山長川。祠山之藏。旣固且深。遙致觴奠。神其來歆。蓋士奇徵時館。漢陽村落中。叔英行部過之。聞讀書聲。曰。兵革之後。久不聞此。入視。士奇避去。見案上詩文一編。稱賞。亟署其面曰。此公輔器也。邀見。以文字相推。

重尋薦爲訓導。復贊陞審理。有幼子名期。謫戍大同。士奇以百金與同鄉涿州同知張璣。治中孟範。訪得教誨甚篤。卒無成。士奇曰。奈何。抱持痛哭。復與金遣之。遂不知所終。後祀學宮。成化中。知州莆田周瑛修其墓。嘉靖中。編修安福鄒守益謫州判官。立懷忠祠。太平知縣曾才漢。又建忠節祠。妻及二女有貞烈祠。在黃淡巖山。叔英自號靜學。卽以名集。

王艮。字敬止。吉水人。建文元年。舉鄉試第一。明年。廷試已定第一。以貌不揚。易胡靖居首。靖後名廣。靖對策有親藩陸梁。人心搖動等語。見擢。艮次之。又次同邑李貫。並授修撰。如洪武十八年故事。設文史館。待之陞秩一等。分類祕閣書目。預修太祖實錄。總集類要。及時政記。屢上書言時務。飭身正色。不可褻玩。聞燕兵起。常憂慙不食。日就羸。金川門變。羣臣多往迎附。艮獨闔門痛哭。告其母曰。兒且死。有弟三人。足侍養。母請勿念兒。亦訣妻子。遂自鳩死。燕王卽位前一日也。文章雄偉。常曰。悖於理而工於辭者。非不知理悖也。欲希世而盜名也。吾竊恥之。詩調高古。一以理爲主。字畫精楷。皆稱其爲人。子修。後鄉試亦第一。靖貫皆事太宗。永樂初。上出建文時羣臣封事千餘通。令解縉等編閱。非軍馬錢糧諸涉於犯者。悉令焚之。因從容問縉等曰。爾等宜皆有之。衆未對。貫獨頓首曰。臣貫實未嘗有也。上曰。爾以無爲美耶。食其祿。思任其事。當國家危急。官近侍獨無一言可乎。朕非惡夫。盡心於建文者。但惡導誘建文以亂政耳。爾等前日事彼。則忠於彼。今日事朕。當忠於朕。不必曲自遮蔽也。貫大慙。久之。貫遷中允。累繫獄十年。竟死獄中。

陳忠字思中。鄞縣人。洪武甲戌進士。第二官翰林編修。素有志操。以道義自持。燕兵入金川。忠不屈死之。廖昇。襄陽人。以學行知名。進與方孝孺、王紳輩友善。洪武中。由左府斷事。上知其賢。超擢太常少卿。建文初。留翰林。修太祖實錄。爲纂修官。昇博雅有史才。朗達負氣。書南北用兵事。語多直。聞茹常等自龍潭敗還。請割地不許。燕兵逼金川。慟哭與家人訣。自經死。徇義諸臣。昇死最先。都御史陳瑛奏昇、黃觀、王叔英、周是修、王良、顏伯瑋等皆不順天命。效死建文。計其存心。與叛逆等。並宜追戮。上特宥昇家。周是修。名德以字行。泰和人。少孤貧。元季兵亂。奉母避難。苦行力學。十餘載。學成不仕。洪武末。薦明經。爲霍邱訓導。入見。太祖問家居何爲。曰。勸人爲善。子弟孝弟力田。上喜。擢周府奉祠正。先是有異人送藥。上嘗之。甘。占云。當得善人。至是符夢。賜書褒美。在周府。每應教賦詩。援筆立就。王甚重之。踰年。從王北征。至黑山。還。陞紀善。尋得侍皇太孫。大承恩眷。建文元年。王有過。盡逮府中官屬於獄。是修以嘗諫得免。改衡府紀善。衡王者。建文皇帝弟也。上聞其母賢。書賢母二字賜之。因言胡樵、潛賢。復書樵、潛二字賜之。一日。帝檢古樂府。作思美人賦。以賜王。未就國。留翰林。預纂修。好薦達知名士。數陳論國家大計。燕兵渡淮。與蕭用道上書。指斥用事者。誤國下集議。用事者怒。共挫折之。屹不爲動。燕兵將入金川。留書別友人。付以後事。具衣冠入應天府學。拜先師。畢。自銘其衣帶。略曰。在藩國。欲不負藩國。在朝廷。欲不負朝廷。欲繼先哲之淳風。開後來之正學。越十餘年。而言皆不行。豈非天耶。歸於聖人之門。庶無罪悔。因自經於尊經閣。年四十有九。其帶至今子孫寶之。祭必以陳。太宗卽位。都御史陳瑛言。是修不順天命。請加追戮。上曰。彼

食其祿。自盡其心耳。勿問。是日。中書舍人臨川聶同文。因迎燕王。天熱徒步急。暈死途中。先是。是修嘗約楊士奇。解縉。胡廣。金幼孜。黃淮。胡儼。同死國難。燕兵入。廣方問家人。飼豕。亟。餘悉負約。後。是修子轅。請士奇。作傳。士奇語轅曰。當時我亦同死。今誰爲若翁傳者。聞者以爲笑。是修內貞外和。孝友忠信。非其義不苟取。性行坦直。寄懷沖澹。其學自經史百氏。下至陰陽醫卜。靡不通究。好吟咏。每旦伸紙濡毫。自述所懷。文先理致。若不構思。雍容雅贍。皆可傳誦。所著有詩小序。詩集義。詩譜。論語類篇。廣衍太極圖。綱常懿範。邇言家訓。芻蕘集。進思集。嘗曰。忠臣不以得失爲憂。故其言無不直。烈女不以生死爲慮。故其行無不果。因取先忠節遺事。輯爲觀感錄。朝夕省覽。不負其志。蓋燕兵渡江。翰林諸臣先死者。惟是修。轅有文名。萬厯中。卿史饒位。卽尊經閣旁立祠祀之。

贊曰。節義二字。禹光不識。所讀何書。古今大惑。二王諸人。名蜚翰墨。節義文章。忠亦其匹。彼餽豬者。千古作色。

史官曰。王叔英等英才卓犖。飛聲翰苑。旣無軍旅之嫌。復不參帷幄之寄。儘可效志鴻冥。避薰鬮鼠。乃皆從容就義。不負所學。嗚呼。與見執而不得不靖者。蓋有間矣。蓋有所慕與有所激。又未免二時哉。王叔英。通達時變。王艮名理暢徹。陳忠雖乏表見。而義存。周是修。目靖聖域。蓋優入聖域者矣。不然。卽爲楊。解。胡。黃金。李。奚。難。

高巍字不危。遼州人。事母蕭至孝。蕭老而痼疾。奉湯藥不懈。母亡。廬墓蔬食三年。洪武十五年。貢入太學。十七年。以孝行旌。尋授督府試左斷事。上疏欲墾河南山東北平兵後荒田。及抑末技。慎選舉。惜名器數事。太祖嘉納之。後因它事坐罪不測。以議賢。請戍貴州關索嶺。仍許其諸子代役。建文皇帝即位。放歸里。知州王欽應詔辟巍赴銓曹。上書論政事。其略曰。太祖有文王紀一之德。皇后有后妃不妒之行。百男君王。上齊三代。分茅胙土。先據形勢。星羅碁布。比之古制。雖皆分封過當。然太祖之意。莫不欲護中國而屏四夷也。今各處親王。故多驕逸不法。遠犯朝制。無所顧忌。不削則朝廷紀綱不立。削之則傷親親之恩。此我皇上所難處也。賈誼曰。欲天下之治安。莫要於衆建諸侯而少其力。力少則易使以義。國小則無邪心。真裁制諸侯之良策也。以臣愚見。勿爲晁錯削奪之謀。當行主父偃推恩之策。秦晉燕蜀四府子弟。分王於齊。兗吳楚潭湘齊兗吳楚潭湘。分封於秦晉燕蜀。其餘寧遼谷代慶肅等府。類比而分王之。少其力而減其地。如此則藩王之權不削而自弱矣。其賢如河間東平。下詔褒賞。驕逸不法如淮南濟北者。初犯則容之。再犯則赦之。三犯而不改者。當合親王告太廟。削其地而廢處之。豈有不順服者哉。修身齊家。宣父明訓。睦族和邦。帝堯盛德。惟皇上覽焉。上深奇之。會燕兵已起。命從李景隆參贊軍務。巍復上書言。臣願使燕披忠膽。陳義禮。曉禍福。明親親之宜。以折之。遂遣往燕。巍自稱國朝處士。臣某。上書燕國大王。其詞曰。志慕仲連子。善與人排難解紛。名世不朽。我太祖升遐。遺詔內外臣民。同心輔政。我聖明天子。嗣登寶位。誕布維新之政。下養老之詔。天下感戴。奚啻考妣。朝野皆曰。內有聖君。外有骨肉藩翰。帝王之治可待。

不意大王與朝廷有隙。張皇三軍。抗禦六師。竟不知其意何出。在朝諸臣。執言仗義。以順討逆。臣以爲勳干戈。孰若和解。使帝者復帝。王者復王。君臣之義大明。骨肉之親愈厚。臣所以得奉明詔來見大王者。何哉。誠夙許太祖。生當殞首。死當結草。故求盡一言。卽頸血汗地。所不惜耳。昔周公聞流言。卽避位居東。若大王收諸始謀者。檻送京師。或戮而奏聞。或解其護衛。或質所愛子孫。釋骨肉猜忌之疑。塞讒賊離間之口。須當與周公比隆。而慮不及此。乃傳檄遠邇。大興甲兵。襲奪疆宇。任事者得藉口。以爲殿下假誅。左班文臣。實欲效漢吳淠。倡七國。以誅晁錯爲名。家必自毀。然後人毀之。恐有奸雄。鳩集無賴。因時乘釁。數萬突起而橫擊之。萬一有失。大王獲罪先帝。莫挽矣。今大王據北平。取密雲。下永平。襲雄縣。掩眞定。易若建瓴。但自興兵以來。經今數月。尙不能出區區蓟爾一隅之地。較以天下十五而未有一焉。大王將士殆亦疲矣。況朝廷天下無限之師。大王以一國有限之衆。應之。大王同心之士。大約不過三十萬。大王與我聖天子。義則君臣。親則骨肉。尙生離間之疑。況三十萬異姓之士。可保終身。困迫而死於殿下乎。大王信臣言。上表謝罪。按甲休兵。朝廷寬宥。再修親好。天意順。人心和。太祖在天之靈。亦安矣。不然。執迷不回。大喪未終。毒與師旅。恐與伯夷。叔齊。秦伯。仲雍。求仁讓國之義。徑庭矣。幸而兵勝得成。後世公論爲何如。儻有蹉跌。取譏萬世。於是時也。追復臣言可得乎。巍白髮書生。蜉蝣微命。生死不懼者。但久蒙太祖教養。無能補報。死孝死忠。臣至願也。書再上。不報。景隆兵屢敗。巍自拔南歸。建文二年五月。遇鐵鉉於臨邑。相持。慟哭。共誓效死。遂趨濟南守城。拒退燕兵。飛書報捷。巍與鉉燕天心水面亭。作賦志喜。有曰。至濟南而被圍。

思張巡之忠堅。遇知己之鐵相。更從英輩以雲聯。若徐將軍之赴赴。盛統兵之桓桓。愈憲高公之糾慢。大叅宋公之周旋。掠陣張都統之能勇。給儲王太守之從權。吾道王府校之論議。斯文王肯播之勉旃。衆資筆策。屈力保全。盛統兵者。盛庸也。餘不可考矣。京城破。巍縊死。驛舍後。弟宣。謫戍南海衛。

贊曰。指大於臂。古今所疑。推恩散權。偃策實奇。巍言若行。可以杜危。借漢徒喻。學魯莫移。死忠死孝。志願可悲。

劉璟。字仲璟。基之子也。弱冠涵濡經傳。喜談兵。究極韜略。握奇諸書。偉貌豐髯。議議英發。基嘗以二子見太祖。太祖曰。阿連明秀。阿璟凝重。父歿不仕。甌賊葉丁香叛。延安侯唐勝宗討之。決策於璟。破賊。還薦璟才略。太祖喜曰。璟真伯溫兒矣。召見。謂曰。朕欲汝日夕左右。惟閣門使如儀禮司。立百官上。宣達爲職。處爾無逾此官者。遂授之。賜第馬衣帶。諭以糾正時諸司。每事執法。以剛直聞。都御史袁泰奏事件旨。當殿呵駁。上曰。可謂不負此使。因金書除奸敵佞四字於鐵簡。賜之。會谷王封宣府。詢侍臣擇可爲輔者。諸大臣故忌璟。對曰。閣門使劉璟忠勇果敢。可任。上領之。授谷府長史。且曰。王年少。凡事執正。谷在宣邊。兵機尤不可忽。璟設險足兵。諸胡屏息。嘗至燕。王與璟奕。璟勝。王怫曰。卿獨不少讓。我耶。璟正色曰。可讓處。璟不敢不讓。不可讓處。璟不敢讓。燕兵起。璟隨谷王馳還京。獻十六策。不聽。令參議李景隆軍事。九年。救政景隆。又不聽。景隆戰敗。璟夜半渡蘆溝河。水陷馬斃。璟力破冰。跳躋岸。冒雪走良鄉。趾裂。跛行三十里。璟子豹自大同赴難涿州。遇璟。翼上馬南奔。知景隆決誤國。稱疾求歸。見許。建文三年。輿疾赴闕。進聞見錄。

千萬言又不聽。辭歸。燕王既卽位。凡仕建文者悉令趨朝。否有重罰。璟稱疾堅臥不起。陳瑛論璟逃叛。逮至京。臨行。宗族以魏徵事勸。璟曰。吾志決矣。入見。但稱殿下。且云。殿下百世後。逃不得一箇字。詔下獄。辯髮自經死。法官欲坐其家。上以基故不許。得歸葬。嘉靖中。提學副使萬潮肖像配享基祠。

贊曰。矯矯仲璟。英偉剛直。父志持運。子目行是一奕不苟。而況生死。勇過孟賁。一字正史。遠天信心。懷然不緇。

史官曰。高巍之學。其用近晁錯。錯議削其所守。而巍乃分其所疎。所謂施行有漸也。處士上書。大義炳烺。周公不恤流言。九毀何歌矣。協守濟南。燕不得志。誠如宋參軍之謀。疾走北平。天下事未可知也。卒使賦詩不足退敵。悲哉。劉璟風烈逾拔。以奕襖燕魄。再上書皆不用。其志行不亦悲乎。然太宗終不能逃一箇字。千古定評。又何謬焉。

張安國、劉原弼、何申、方法、王省、陳思賢、張倫、儲福

附妻范傳

張安國。浙定海人。建文中。爲工部郎。燕兵逼京師。安國與妻曰。大事去矣。無能爲也。予職非司馬。旣不能帥兵應敵。又不能羔鴈以事人。奈何。遂相與乘舟入太湖。忽聞人言。燕王卽位。安國大慟。於崖上致祭。與妻曰。食人之祿。而存身於讐主之世。恥莫大焉。遂登舟。鑿其底而共沈。崖人哀之。爲立石誌。

劉原弼。字良輔。扶溝人。洪武中。以貢任刑部主事。燕兵入。原弼率家人巷戰。遇害死。索遺骸不可得。其家

刻木爲人葬之。六世孫自強。萬厯初。任至刑部尙書。自有傳。

何申。嘉興人。爲中書舍人。建文末。奉使四川。聞太宗卽位。慟哭嘔血死。

方法。字伯通。桐城人。少孤。母程氏教之。奉訓勵志。以儒術顯。魁梧奇傑。聞朝廷利害。輒奮激慷慨。欲以身任。建文己卯。方孝孺典應天試。庚辰。授四川都司斷事。剛正廉直。執法不撓。太宗旣立。諸藩入賀。有表當署名。法獨投筆奮袂出曰。舊君安在。此名節所關。死矣。庶可見方先生。尋詔逮登舟。謂家人曰。及安慶告我。旣至。望拜先墓。慨然曰。得望我先人鄉。可矣。拜訖。踴沈於江。求屍不獲。妻鄭收其爪甲於巾笥藏之。鄭守節幾四十年。卒。遺命以伯通之髮爪納懷中。櫛而葬。其後裔如大美。大鎮。大任。大鉉。孔炤。拱乾等。多顯官。

王省。字子職。吉水人。洪武五年鄉薦。至京。詔免會試。命吏部次第擢用。獨乞歸養。尋以文學徵。上親試稱旨。當殊擢。自陳才薄親老。乞便養。得浮梁教諭。外艱。起復改睢陽。凡八年。又改濟陽。燕兵至。爲前哨所執。從容引譬。詞義慷慨。衆義而舍之。歸坐明倫堂。伐鼓聚衆。諸生會曰。若等知此堂何爲。稱明倫。今且勿多論。只說君臣之義何如。因大哭。諸生皆哭。遂以頭觸柱死。女靜。適邑人周鳳岐。爲卽墨主簿。聞北兵至。濟陽。女泣曰。吾父必不生矣。三遣人訪。竟得遺骸歸葬。後有司祀之學宮。子禎。成化中。爲夔州通判。亦抗節死於賊。

陳思賢。廣東茂名人。質直好義。洪武末。爲漳州教授。以忠孝行誼最諸生。隨材教誨。多所成就。太宗卽位。

詔至。慟哭曰。明倫之義。正在今日。遂墜臥不出。率其徒伍性原、陳應宗、林珏、鄒君默、曾廷瑞、呂賢卽明倫堂爲舊君位。哭臨如禮。郡人執送京師。思賢暨六生俱死之。嘉靖中。提學使邵銳立祠祀之。六生侍侑焉。張倫。河北人。爲衛指揮。勇悍負氣。常喜觀古忠義事。嘆曰。恨不身親爲之。建文元年十二月。薊州衛官兵攻北平。不克死。倫聞之發憤。合兩衛官率兵南歸。結明報國。初從景隆。已而從盛庸。並有功。燕兵南。尙率殘兵據砦守。太宗卽位。招倫降。倫笑曰。倫將自賣爲丁公乎。伏劍死。

儲福。無錫人。洪武初。隸燕山衛籍。年二十餘。頗好義。建文末。挈母韓妻范逃去。太宗卽位。詔甸戍卒入位。調福曲靖衛。復挈母妻以行。舟中日夜涕泣曰。吾雖一介賤卒。義不爲叛逆。竟不食死。母妻爲營地葬之。妻少有姿色。居貧奉姑甚謹。每哭其夫。不忍傷姑意。則走山谷中長號而返。有貴官曠甚。慕其姿。聘之。范執刀誓曰。吾持此以待貴官。聞之曰。此節孝婦也。我安忍犯之。一日。范往澗邊浣衣。見其旁有草若蘇蓆。因取織蓆養姑。賴以存。姑年七十餘。終營葬。爲廬於墓旁。年八十餘卒。澗蓆草遂不生。土人異之。卽其廬葺爲菴。集尼居之。名崇孝菴。

贊曰。江湖可隱。乃不忘君。巷戰遇害。霄壤迎奔。申法表表。抗節致身。卓哉賢省。教先明倫。韎韋附注。實惟成仁。炳茲史冊。餘芬風人。

史官曰。張安國身旣隱矣。又何以死。其有薇不食之意乎。部曹閒冷。巴蜀萬里。此非計畫無之不能苟活者。而必以身殉。誠明於義也。儒官之秩卑矣。王省身任綱常。陳思賢從容盡道。且能使諸生就死不悔。執

意海邦荒僻。乃有若人張倫武。弁羞稱賣主。儲福賤卒。志能殉君。其妻亦終盡節。孝忠義之在人心。豈限愚夫婦哉。南京故老言。建文中。法網疎闊。道不拾遺。有得鈔於塵土中。輒拂之。置高潔處。以石鎮之而去。一時士風樸茂。尙義者多。聞燕兵入城。百官遁者百餘人。惜其名不傳。蓋名節之漸深矣。

姚善

附王賓
錢芹

陳彥回

附黃
希范

張彥方傳

姚善字克一。安陸人。初姓李。志行淳實。學識高遠。自題其讀書處曰待旦軒。工詩。與會稽唐之瀆相唱和。洪武中。鄉薦爲祁門丞。同知廬州。重慶三十年。擢知蘇州府。初太祖以吳承元俗。僭靡遠式。繩以重法。鬪惡者更持短長。訟蜂起難治。善洞曉政體。諳悉人情。數延郡賢。詢求治道。商略民生休戚。因俗救正。由是衆皆易嚮。轉稱大治。高隱王賓字仲光。獨居陋巷。善躬往候。舍車徒步叩門。自稱太守姚善賓。乃開門延語。盡歡。及賓報謁。望門再拜而返。善自邀還。辭非公事不敢入。又將候韓奕。奕避入太湖。善歎曰。韓先生所謂名可聞而面不可見者耶。奕潛心理學。尤精於醫。洪武初。累薦不起。所著有韓山人集。錢芹字繼忠。少好奇節。自守甚高。洪武初。辟大都督府掾。從出絕漠。解職家居。善初願見不可得。會俞貞木以明經見重於善。月朔望必延致學宮。講經書訓士。一日遣菜貞木。誤致芹所。芹受之。吏覺其誤。詣貞木以告。貞木曰。錢先生不苟取予。今受不辭。必仰府公之賢耳。善喜。使人先道意。芹對使者曰。芹誠幸見公。然芹民也。禮不可往。若明公弘下士之風。請月朔會學宮。善如期致迎。芹上坐。質應義。芹曰。此經生業。今事有急於

此者方煩公料理耳。善竦然踴請教。芹出一簡授善。竟不交言而去。視之。則皆戰守制勝之策也。善心嘉之。時燕兵已南下。善密結傍郡。起兵赴難。薦芹爲行軍斷事。芹道卒。善尋至京師。畫策防禦。時朝廷用漢破七國策。貶齊黃以緩燕。善言於朝曰。人有文武才略。可扶顛濟危者。孰有過黃太卿者。反置散地以快敵。今事已狼狽。盍急召之。乃召泰。子澄還。而善奉詔還督蘇、松、常、鎮、嘉五郡兵。勤王未及戰。燕王已卽位。索子澄急。子澄走蘇。約善共航海舉兵。善曰。公可去。善不可去。公朝臣。可四往號召。圖興復。善職守土。義當與城存亡。子澄遂去。善尋爲麾下許千戶等縛見太宗。詰善曰。若欲以一郡。乃敢舉兵抗我耶。善曰。燕亦不過一郡耳。語多不遜。死之。時年四十三。子節。謫戍。幼子繼兒。坐配保兒習匠。正德中。巡撫秦金祀之。鄉賢祠。王賓未冠。父歿。終身不冠。夙善姚廣孝。後廣孝掃墓歸吳。謁賓。再閉戶不見。已徒步往。乃納之。語未卒。遽墮茗甌而仆。口目俱歆。廣孝後復往。不見。從門隙窺見。呼曰。仲光。仲光。賓作吳音曰。和尙差哉。有光庵集行世。

陳彥回。字士淵。莆田人。父立誠。洪武初。舉秀才。爲歸安丞。被誣論死。家破。彥回謫戍滇南。弟彥困。戍遼東。大父及母郭僅存。會赦。又弗原。監送者憐而縱之去。顧貧不能歸。聞邑人黃積良。知合州定遠縣。往依之。更姓名曰黃禮。未幾。閩中教諭嚴德政。薦彥回明經。爲保定府學訓導。三考至京。承顧問者四十日。太祖器之。陞平江知縣。上崩。彥回應入臨。廷臣薦其文學廉幹。擢知徽州府。至徽。政教一新。士民感悅。建文元年春。以循良受上賞。是冬。祖母卒。當承重。徵父老走京乞留。因請復故姓。詔許之。釋前罪不問。除彥困戍。

籍又乞竟服不許。許襄事畢，卽蒞郡。再疏又不許。葬郭徽郡北山之陽。彥回召徽人泣諭曰：「吾故莆田前罪人也，向所蒙恥而受祿者，以吾祖母耳。祖母歿，固宜自請死。上矜宥之，恩大何以報！」日走墓下哭甚哀。方回視事，徽人名爲太守山。先是恆以亡命冒宗爲愧，悒悒不自安。因號曰訥齋，屢欲陳首，輒自籌曰：「祖母年高，卽蹉跌奈何？」隱忍二十餘年，始得行其志。燕兵至江上，奉詔糾義勇勤王。適彥回至，自遼東邂逅旅邸，郡士往賀。彥回泣曰：「此身蒙朝廷再造，恩今骨肉重聚，予固有以處之矣。當遣吾弟歸治家事。此勤王報命之秋，予身許國，他不卹也。」乃書務本二大字以遺弟，俾其歸。以孝弟力田，修身克家爲務。未幾，太宗卽位，彥回猶糾衆奮力入援，爲新安卒，眞興縛至京，不屈死之。年四十七。籍其家，彥回旣去，代守徽郡者黃希范，政令嚴明，士民信服。修武備待戰，聞變，素服不治事。後坐與長史程通義嘗共議條上防禦策，爲錦衣邏卒捕去，論死，籍其家，而彥回逃去。

張彥方，龍泉人。建文元年，由給事中以便養告改江西樂平知縣。四年，勤王詔下，彥方褰旗糾義起兵。一邑響應，或沮之。彥方大哭曰：「君父在水火，吾可以自緩乎？」遂率所部抵江口，遇北來游兵，執至樂平，梟首暴屍譙樓下。時暑月經旬，顏面如玉，無一蠅集。父老竊葬縣治之清白堂後。贊曰：勤王之旅，寥寥罕覩。五郡方糾，中台已泐。彥回投袂，慷慨決策。彥方纓冠，毅然植髮。偉哉丈夫，鬚髯如戟，相彼青蠅，聞風辟易。

史官曰：夫封疆之臣，則死封疆，固其所也。不又曰：謀人之軍師，敗則死之，謀人之邦邑，危則亡之乎？若姚

善諸人竭力以抗。不濟則以死繼之。斷不忍須臾之苟活。受萬代之詬。爲縣賁父所竊笑。或以王珪、魏徵事爲解。夫珪、徵受命爲青宮庶僚。其不可與委質任事者同日而論。明矣。人臣之義。當以王陵爲正。若姚善虛懷下士。更爲人不可及。

明書卷一百五

列傳二

忠節傳五

顏瓌

附子有爲、廣子清、黃謙

向朴、鄭恕、鄭華傳

顏瓌字伯璋。以字行。廬陵人。聰敏介直。能文辭。建文元年。徵賢良。擢沛縣令。以善政撫民。未幾。南北構兵。官軍駐德州。淮北之民。終歲給餉。瓌布置有方。民不告勞。三年九月。設豐沛軍民指揮司。集民壯五千。築七堡爲防禦計。尋調三千益山東軍。所存皆疲弱。不任戰。四年正月。燕兵來攻。急呼弟珏。子有爲曰。兵勢如此。孤城無援。瓌與城俱義也。歸語大人。無過傷。且爲我善養。得令終爲孝。瓌旣爲人臣。子職弗克盡矣。因題詩察院壁。有丹心不改。人臣節。青史誰書。縣令名之句。燕兵夜入東門。指揮王顯迎降。瓌具冠帶升堂。望南再拜。自經死。有爲不忍去。半道還。自刎。父傍以從。俄而諸軍至。主簿唐子清。典史黃謙俱死。珏脫走濟寧。躡月還沛。詢邑人。知父子屍已爲縣丞胡先理瘞。乃至徐。告同郡徐守晏。璧有行義。能文章。因爲瓌傳。言其孝友。敦內行。嘗與同督運德州。連牀共食。談論慷慨。練達機宜。以其屬吏。深惜之。後楊士奇

過沛。悼之以詩曰：平生金石見臨危，就義從容子亦隨。千載山河遺跡在，一門忠孝史官知。故鄉住近文丞相，先德傳從魯太師。欲酹邱墳何處是，離離荒草淚空垂。顏真卿後也。正統初，御史彭勛起墳祠祀。唐子清者在沛，有善政，民愛之。伯瑋令專調兵食，司一切邏察事。子清矢力不懈，燕兵執子清，欲殺之。將兵者欲活子清，子清曰：吾誓不令顏父子獨死，願相從地下。乃及難，黃謙以儒生爲沛典史，果敢能戢下。伯瑋禮遇之，益效盡職。燕兵執之，使至徐招降，謙曰：不能招我降之，能令我招降人耶？死之。

向朴，字遵博，慈谿人。宋向敏中嫡裔也。父壽，宗慈湖之學，世稱爲樂齋先生。朴益精究其旨。洪武二十五年，以人才應詔，陛見。太祖問家居何爲，對曰：種田。其容秀而文，上心知其非耒耜中人也，因詢麥何以四節，對曰：以其占四時也。授獻縣令，單車就道，不攜妻子，兵燹之餘，闢荆榛，教農桑，與同甘苦，流移漸復，燕兵起，獻當兵衝，無城郭，乃集民兵，激以忠義，與燕將譚淵迎戰，力不敵，被執，懷印死。獻民哀之，拾遺骸葬道左。已而陳瑛亦獻人，請追戮死事諸臣，最酷，有楊姓父子，懼瑛知其葬處，拙夜負骨潛更葬邑北十里，微識之。永樂初中，書王尹實北上，夜夢朴服血污葛衣，共談往事，起秉燭爲文，乘星月往哭之。涓川令韓彥復匿其二子於任，司諫顧道輯其遺事，書於寶峰菴佛座。三人皆義士也。二子道澇，道澇被徵，稱痼疾不赴。有王偉元攀柏悲號之風，嘉靖間，朴祀本縣鄉賢祠。隆慶五年，又祀獻縣名宦祠。萬厯初，奉詔撫按建祠本縣北門外。王尹實、韓彥復、顧道附祀別室。楊氏父子臘食焉。

鄭恕，字本忠，仙居人。治尙書、工詩，好古博聞，蕭然斗室，與生徒數十人，日講論經義，高標勁節，一時傾嚮。

之聘爲昌國縣訓導。尋陞知蕭縣。大得民心。建文四年。上平燕疏。不用。燕將王聰來攻。力竭城破。不屈死。之後籍其家。妻彭妾夏蓮及二女當配。亦死之。子濂。從子溫。汲。謫北平種田。祀台八忠祠。

鄭華。字思孝。臨海人。洪武十八年。進士。初授行人。奉使川廣。稱旨。太祖亟稱之。建文元年。註誤謫東平州吏。日燕兵起。與其妻蕭訣。蕭亦以義相勉。以家託友人。無錫丞趙次進。亟還州。州長貳以下盡棄城走。華獨率民吏憑城死守。憂勞病甚。水漿不入口者三四日。燕將宋能攻陷東阿。分兵取東平。華曰。守土之臣。義不苟生。乃力疾戰。不屈死。年甫三十。祀台州八忠祠。

贊曰。獻。鄆河上沛。蕭淮南。兵衝地要。螳臂奚堪。朴。華前死。瓌。恕甘殲。闔城殉義。乃有□濂。一時烈禍。千古奇男。

史官氏曰。剖符列宿。吏動星躔。微祿下僚。能扶綱紀。斯固守土之英。忠良之選也。瓌之於沛。朴之於獻。恕之於蕭。百里符重如是哉。子清與謙。何其感義而興起乎。鄭華以吏目。獨以守城自予。顧其所許大也。以視迎塵投獻者。其相去不啻天壤矣。噫。

侯泰、葉福、陳植、樊士信、王彬

附鄆
崇剛傳

侯泰。字順懷。南和人。累官刑部尙書。燕兵起。上抗禦之策。督餉山東。屢進言於李景隆。不能用。濟寧不守。輜船陷沒。還京。建文四年。又出淮安督軍餉。經畫苦心。嘗徹夜不寐。京師失守。泰至高郵。與其隸上高人

茅卯仔同執不屈。與其弟敬祖、子玘皆死。籍其家。幼子京兒。永樂九年尙繫錦衣獄。時有徐尙書者。坐匿建文。又縱之去。誅死。一女屬樂。樂官陳儀。儀能執義。不令汙玷。洪熙初。遇赦。儀爲擇嫁良民。

葉福。字叔疇。侯官人。建文庚辰進士。授刑科給事中。燕兵起。福守金川門。勢危。自期盡節。遣家人歸報其母。曰。福爲王臣。不得爲孝子矣。或勸之曰。所欲有甚於生。吾人不當爾耶。爲內叛者。殺於門。祀閩三忠祠。陳植。廬江人。元末舉鄉試。不仕。洪武間。爲吏部主事。建文中。歷兵部侍郎。監戰江上。慷慨誓師。有督將金某謀降燕。植責以大義。甚厲。督將恨。殺之。出迎降。自陳邀賞。太宗立誅之。使人斂葬。植家不知上意。逃匿。無敢會葬者。

樊士信。應城人。洪武十八年進士。建文中。以兵部主事守淮河。燕兵南下。士信禦之力不支。遂死。後追族。王彬。字文質。東平人。洪武中進士。御史巡按江淮。燕兵日南。彬方在揚州。括餼糧。備樓櫓。飭器械。銳意守禦。指揮鄧崇剛。沈鷺。善謀。彬使贊其軍。因相與躬履艱危。激示忠憤。日夜巡城。率勵將士。七日不解甲。燕兵畏之。揚州衛指揮王禮。謀以城降。調知之。執禮及其黨。下獄。有力士能舉千斤。彬恆以自隨。燕飛書城中。有縛王御史降者。官三品。禮弟崇及其黨。欲應之。憚力士莫敢睨。乃厚賂力士母。誘其子出。彬適解甲浴。宗等與千戶徐政突入。縛彬并剛。縋城送燕。破獄出禮等。與俱降。燕將欲降彬。彬不屈死。剛亦死。府衛官皆降。江都知縣張本。率父老降。即以本知揚州府。後歷官兵部尙書。

贊曰。乘城捍圍。惟力是視。天欲廢之。金湯曷恃。隸也同死。弁也倒戈。賣國邀賞。被戮則那。

史官氏曰。侯泰等或任守土。或司防禦。皆能矢志不回。與職俱盡。雖勳績無成。而風烈有餘也。如張本即終躋巍顯。遺唾萬世矣。彼區區武弁。又何誅焉。

馬宣附會 宋忠附余環孫 楊松 潘忠 朱鑑 瞿能附小 鄧戩 陳鵬 莊德附楚智 楊本 宋瑄附徐讓衛
澤 泰彭聚 馬王 卓旗張 鍾周拱元 傅

馬宣北平都指揮使。燕王兵起。殺張曷。謝貴。宣巷戰。度不能勝。東走薊州。悉發守兵。西逆戰。不利。復還。張玉等來攻。與鎮撫曾濬共閉城堅守。燕王遣人反覆諭之。兩人終不聽。燕兵力攻。宣出戰。被執。罵不絕口。死。建文帝寢卹其家。曾濬繞城大罵。亦力戰死之。

宋忠錦衣衛指揮使。智勇有名。洪武末。有屬百戶論死非其罪。忠疏救。御史劾忠。太祖曰。忠率直無隱。爲人請命。何罪爲。并宥百戶戍邊。尋以臺抨忠作威福。邀名譽。調鳳陽中衛。明年。平羌將軍都指揮齊讓討西夷無功。以忠爲參將。從征虜。前將軍楊文凱旋。復官錦衣。建文初。防燕。名備虜。敕忠以都指揮總邊兵三萬屯開平。盡簡燕兵護衛壯士從忠。聽節制。護衛胡騎指揮關童者。素驍勇。忠遣童入京。北平有永清左右衛。左調屯彰德。右屯順德。都督徐凱屯臨清。耿璫屯山海。與忠相犄角。約北平藩閻張曷。謝貴。長史葛誠爲內應。燕王旣殺曷等。稱兵。忠率兵三萬詣居庸。而守將俞瑱爲燕所敗。退保懷來。燕兵奪居庸。忠不及救。燕王曰。宋忠握兵懷來。必爭。須乘其未至擊之。衆皆謂衆寡不敵。宜固守。王曰。用兵當以智勝。論力則我不足。以智則有餘。彼衆新集。其心不一。且忠輕躁寡謀。先擊之必破。乃以精兵八千人。卷甲倍道。

趨懷來。獲謀言忠勵諸將士云。公等家北平者。盡爲燕府誅滅。盍努力復家讐。報國恩。衆奮。燕王聞之曰。知所以破忠矣。令其家人張故旗幟爲先鋒。衆遙識。又見其父兄弟相問勞。家故無恙。輒喜。罵忠欺我。倒戈走。忠率親兵食卒渡河。戰大敗。被執不屈。死之。諸將以得忠。頗有喜色。王笑曰。忠庸才。得之不足爲喜。喜則驕。驕則不戒。不戒則敗。幾萌矣。爾曹戒之。燕使人給余瑱曰。石頭城破矣。瑱曰。石頭城破。吾與此城共存亡。力盡被執。亦不屈死。時都指揮孫泰。彭聚並從宋忠戰懷來。泰先登。頗有斬獲。燕兵叢矢射泰。流血被甲。慷慨裹瘡。與聚皆力戰奮呼陷陣。皆死之。時諸將燕俘者。多不肯降。發憤死者十八九。多不可考。

楊松、潘忠俱都指揮使。耿炳文帥兵三十萬駐真定。遣松爲先鋒。都督徐凱壁十萬於河間。潘忠屯鄭州。松帥驍勇九千人。進據雄縣。約忠爲繼。燕兵乘中秋不爲備。圍雄城。忠兵來至。松乘城守禦。黎明。城破。松率麾下南走。燕王度忠在鄭。必引衆來援。遂伏兵月漾橋。忠果至。伏兵起據橋。忠戰敗。急趨橋不得。燕兵腹背夾擊之。生擄忠。並追獲松。二人皆不屈死。

朱鑑、北平行都司都指揮。守太甯。勇冠諸將。虜皆畏避之。燕兵至。諸將陳亨、房寬皆降。鑑力戰不支。被縛。罵不絕口。死之。建文皇帝加卹典。

瞿能、字世賢。合肥人。驍勇有名。洪武中。以四川都指揮使與同知徐凱統兵從藍玉擊西番有功。又從都督聶緯討建昌叛酋月魯帖木兒。又改副藍玉。能破賊雙狼塞。建文初。從李景隆爲裨將。攻北平。能力戰。

勢甚銳。與其子通帥精騎千餘人。殺入彰儀門。景隆忌之。以大軍未至止之。於是北平連夜汲水沃城。天寒冰凝而滑。明日南軍欲登城。不可得矣。景隆率師駐白溝河。與燕兵迎敵。能父子奮躍所向披靡。殺傷燕兵甚多。燕兵遂卻。日已暝。各收軍還營。燕王曰。彼軍雖衆。明當破之。及朝復戰。王先以七騎馳擊之。且進且退。南軍飛矢如注。馬三被創而三易之。射矢亦盡。幾爲能所及。王佯招後兵疑之。脫去。薄暮能復引衆躍前。大呼滅燕。斬其騎百餘人。愈通淵。滕聚復引衆來會。會旋風起。王見陣少動。乃以勁騎繞出其後。突入馳擊。與高煦騎兵合。能父子皆死於陣。通淵聚亦皆死。有小馬王者。失其名。官指揮。臨淮人。嘗乘一小馬。故名。白溝之敗。脫胄付其左右曰。吾爲國。以此歸報家人。立馬豎槍而死。不異生時。

鄧戩陳鵬爲都指揮。與都督吳傑等守真定。燕王曰。若傑等嬰城固守。是爲上策。偶來求戰。下策也。當設奇以誘之。乃散軍四出。聲言取糧。又令人荷擔言抱嬰兒。佯作避兵奔入城云。燕軍各散取糧。營中無備。戩等信之。乃出兵。與燕兵遇於藁城。突入奮擊。矢集燕王所建旗如蝟毛。擒殺甚衆。忽大風起。發屋折樹。燕兵順風乘之。戩軍大潰。與鵬俱被擒。死之。

莊德洪武末爲西涼都指揮。召至北平。爲燕兵右翼。出塞有功。建文初。隸宋忠麾下。懷來之戰。惟德一軍獨全。後盛庸戰夾河。德力戰。斬燕將譚淵。明日方戰。勝負未分。忽逆風起。塵埃漲天。咫尺莫辨。燕兵乘風大呼縱擊。乃大敗。時有楚智爲都指揮。嘗從馮勝。藍玉出塞有功。軍中稱驍將。力戰死之。張某者。亦都指揮。充偏裨。力挽千斤。每戰輒舉卓旗先登。屢有俘誠。人皆呼爲卓旗張。亦力戰死。手猶執卓旗不仆。人以

爲異。

楊本中。中牟人。火色雄幹。頸無髮。初爲太學生。精法術。建文初。徵才略之士。本起應聘。曰。惜事不成。奈何。既試。授錦衣鎮撫。時吳王撫軍。一日。本請王出觀兵。及登將臺。見大水淼茫。而一軍皆不見。王及左右並駭問。故本曰。此水遁也。及帥師北禦。本常持一鐵棒。重三十斤。臨陣馳突。燕兵披靡不敢前。屢破之。景隆忌本功不上。已而本約日出戰。請諸軍爲後繼。景隆謂諸將曰。今日譬如一園瓜。我輩種熟。乃被別人採去。耶。竟擁兵不救。本上疏。略曰。刑屬三千。罪莫大於不孝。人倫有五。德莫大於盡忠。忘君虐民者。不可以不懲。喪師失律者。不可以不罪。今都督袁宇與耿炳文。征討北平。喪軍士二十萬。皇上憐其爲太祖故舊。不忍加刑。又如魏國公徐輝祖。征燕私存姊妹之情。虧喪士馬。皇上召還。業已洞燭其情。曹國公李景隆。自進兵以來。喪失軍馬無限。皇上責問。乃歸罪羣下。此實總兵之罪。而邪說得行。支吾廢法。將何以勝。乞假臣柄。用賢能官員。召募義勇。招撫軍伍。凡先鋒參謀。軍政稽考等官。臣自當保舉。仍特命親王爲監軍。疾馳燕師。以成戡定。庶可免生民於塗炭。奠宗社於泰山矣。疏入。未報。本率孤軍。獨出力戰。燕衆共扼之。被擒。

宋瑄。鄆國公晟之長子。洪武中。爲參隨舍人。立功。遷指揮僉事。建文初。陞指揮使。數從諸將禦燕。有功。靈璧之戰。披甲躍馬先登。斬首數級。已而諸營兵敗。瑄猶格鬪。力屈死之。後晟功名大著。封西寧侯。永樂中。兵部上列侯子孫名。乞嗣封。瑄宜嗣。上惡瑄。以弟琥嗣侯。琥尙安成公主。琥弟瑛。尙咸寧公主。琥罪廢。瑛

嗣侯沒於土木。時有王資以指揮守淮。北有膂力善射靈壁之役。率卒護軍餉。諸將兵敗。輻重芻糧。委棄狼籍。不能獨完。燕兵執之。詭得脫。走鳳陽。從知府徐某防禦。然事不可爲。後爲人縛獻死之。又軍前效力徐讓。爲山西布政司理問。材氣磊落。有口辯。孝義縣丞衛健。讀儒書。達吏事。膽量過人。與讓應募。齎書至北平。議和解兵。受而不答。還並授衛鎮撫。尋皆戰歿。周拱元。沅州人。少讀兵書。出入辰。沅蠻中相交易。蠻人信重。建文初。應募入京。試騎射對策。授鎮撫。於軍前占候。輒中。每引兵防餉。舟有功。被燕兵執。不屈死之。

贊曰。赴赴武夫。裹革是誓。蹙陣陷堅。洞膺決背。有疇不死。若得死所。大風驚沙。天意如此。熊羆同盡。邦家之瘁。賁父有誅。以愧竄鼠。

史官曰。觀諸力戰而死者。皆偏裨也。而大將徒建旗鼓。擁麾鉞。莫展一籌。莫效一臂。坐使燕山之馬。漸飲江波。藩國之旄。立掃帝闕。嗚呼。誰之罪哉。諸武臣死。綬鼓若此。足以見燕無倒戈之迎矣。自馬宣、宋忠等而外。滄州之戰。則有都督徐凱、程暹、陳暉、都指揮俞琪、趙澆、胡原、李英、張傑、德州之掠。千戶蘇獻、真定之戰。都督甯忠、都指揮劉燧、朱榮、白溝河之戰。都指揮何清、指揮滕聚、定州之戰。都指揮花英、鄭琦、王恭、指揮詹忠、渡涑水則指揮賈榮、陷東平則指揮詹璟、失汶上則都指揮薛鵬、渦河之戰。則胡騎都指揮林帖木兒、哈三帖木兒。如火耳灰則降燕矣。婁鬼里及淮河之戰。則丁良、米彬、靈壁之戰。則都指揮孫晟、王貴等。一百八十餘人。嗟乎。燕事不成。豈不金書鐵券。廟祀榮世世者哉。

程濟、葉希賢、楊應能傳

程濟、陝西朝邑人。有奇術。洪武末，以明經爲四川岳池教諭。岳池去朝邑數千里，濟寢食朝邑，而治岳池學事不廢。建文初，上書言某月日西北兵起，朝廷謂非所宜言，繫至京將殺之。旣入見，仰面大呼曰：陛下且囚臣，至期無兵，臣伏罪，遂下獄。已而燕兵果起，上異之，赦爲翰林編修。充軍師，護諸將北征。徐州之捷，諸將樹碑敍戰功，及統軍者姓名。濟一夜往祭碑，人莫測其故。後燕王過徐，見碑問故，大怒，趣左右以鐵椎椎碑，再椎，遽曰：止。止爲我錄碑文來。其後按碑族之，鮮得脫者。濟姓名正椎脫處，得免。曩之祭，蓋禳之也。其神術如此。淮上敗聞，召濟還京。初，濟與邑人高翔並以明經徵，翔厲名節，濟好術數，翔止濟勿爲此。此小道耳。濟曰：吾所好者，可以預知吉凶，其大可以占國護君，次亦可以居身備世，公何小之乎？翔曰：不然。翔聞君子之道，自盡而矣。子盡孝，臣盡忠，蒞官盡廉，戰陳盡勇，何事預知？旣而有兵事，濟又勸翔學之。翔曰：我願爲忠臣，金川門破，翔招濟同死。濟曰：我願爲智士，翔死之。建文皇帝素知濟神，急召入問計。泣曰：天數已定，惟可出走耳。立爲帝祝髮，遂從之出。每遇險，以術脫，相從數十年。濟嘗病，帝親爲煮糜，有所往，必令濟筮，從隨帝至京師。人尙有識濟者，曰：此程編修也。自著從亡隨筆，其文繁，茲載其略曰：燕兵入金川門，帝徘徊殿庭，欲自殺，召羣臣問計。羣臣多散亡，至者數人。濟請出亡，帝曰：敵兵四集，且朕病足不能行，奈何？濟曰：臣卜出南方可免難。時司禮少監王鉞以太祖遺篋爲請，帝命取發之，有僧牒衣具三，帝遂與御史葉希賢、吳王教授楊應能各祝髮，分其牒。濟袖出黃冠自易，漸羣臣至者約三四十人，忘其姓。

名願隨亡。帝令散之。以太子文奎付廖平先行。帝獨與濟及梁良用潛出西華門。時燕王坐金川。燕兵在外朝未入。詣河得小舟。良用易服鼓柁而行。抵南門。舍舟而徒。良用自赴水死。濟掖帝出城。晚走神樂觀。宿道士王昇家。時宮中火起。燕王不及追捕。是夜。應能、希賢及金焦、吳成學、趙天泰、蔡連、梁中節、梁良玉、梁田玉、宋和、郭節、馮灌、王資、牛景先、劉仲、郭良、史仲彬、鄭洽、王之臣、黃直、內官周恕、何洲先後會。帝曰：以後以師弟稱。各訂約散去。適史仲彬有舟在通濟門橋下。師入舟。楊葉、鄭史、程五人從。時壬午六月十四日也。沂江由丹陽抵吳江。至仲彬家。仲彬栖師於水月觀。成學來會。已祝髮。即辭去。八月。縣丞鞏德至其地。蹤跡。師同希賢、應能、濟至京口渡江。從六合走襄陽。入廖平家。平寓師於西山中。景先至。尋朝有捕索令。平舉家遁。師留景先山中。自與希賢、應能、濟入蜀。遇馮灌於途。灌寄食荒村。留三日而去。癸未正月。投雲南永喜寺。命灌訪廖平家事。六月。灌來。知梁良玉死。甲申正月。離雲南。三月。仍還襄陽。就景先於西山。五月。命景先入吳約仲彬。六月。師行。八月。至仲彬家。師一宿遂行。仲彬問故。師曰：昨道中遇一冠蓋者。瞪目視。速去爲爾也。相與泣下。與濟先行。希賢、應能、景先、仲彬以次會於吳山。九月。遇焦運、灌、仲於天台山。尋遇廖平於耶谿。冬。離台州。乙酉二月。西至重慶。結菴於善慶里。遂留居焉。夏六月。將如雲南。命濟筮得乾之姤。曰：恐有偵者。已胡濛。鄭和果入雲南。遂止不往。冬十一月。黃直至。留三月去。丙戌三月。別菴行。夏四月。至沐晟家。旬日。有朝臣以使事過。滇見師去者。晟恐。請師遁。五月。希賢、應能結茆於白龍山。請師居之。丁亥三月。師病。七月。濟出乞食。出遇郭節、程亨、史仲彬來視。八月。節、亨辭去。十二月。師祭死難諸臣。爲

文哭之。戊子二月，仲彬來。夏六月，菴災。七月，蒼菴。賴道者張靜成之。濟筮得小過之旅。曰：烏焚其巢，不久將毀。冬十二月，成學。焦黃直皆至。己丑正月，師東行。留賢能守菴。濟及成學、焦直從。三月，復至善慶里。成學留。五月，復過襄陽。知廖平家徙蜀。庚寅三月，師還菴。辛卯春，有司毀菴。夏四月，師至浪穹。賢能復募建菴。成濟筮得剝之坤。曰：剝盡而順，吉卦也。然龍戰之詞有凶。壬辰三月，應能卒。四月，希賢卒。師哭之過慟。病並葬於菴東。師納弟子應慧。十一月，灌直來。癸巳正月，辭去。五月，師南行至甸。濟及慧從。六月，還菴。納弟子應智。十月，鑄應明鐘。師爲銘篆之。甲午秋，師學易數。冬，應慧死。納弟子辨空。乙未三月，師夢賢能來。慟覺，設奠爲文祭之。夏，師出遊。路遇灌直，留其主家數日。八月，師與濟至衡山，還訪灌。已如滇。師還滇，偶寄宿野寺。見廡下有二病者，卽灌直也。因留視之。灌直相繼卒。葬寺東。師題石曰：兩忠之墓。十月，還菴。立從亡死者之主於舍東。丙申冬，師自敍從亡傳藏之山巖。丁酉二月，別築靜室於鶴慶山中。七月，成學弟子了空來。知成學已卒。冬十一月，胡濙、鄭和復至滇物色。師往衡山，作感慨詩曰：我行自東，自南自北。黑霧毒霽，燭龍沈色。我行自西，陰雨霏霏。弓矢野施，我悽我惶。何道可行。戊戌三月，返至黔。五月，命濟爲圃。己亥，師註楞嚴、法華經。署曰文和尚。註九月，命濟輯禽遁諸書。庚子七月，仲彬來。八月，辭歸。十月，師與濟遊蜀。登峨嵋。師有登高不耐東翹首，但見雲從故國飛之句。辛巳四月，復入蜀。七月，南行入粵。遊海南。冬還菴。師蓄髮爲道士。日翫太元老、莊、壬寅春，遣空智主鶴慶靜室。師別居淥泉。癸卯二月，師與濟遊楚。登章臺山。六月，至漢陽。登晴川閣。師有江波猶湧憾，林鶴欲翻愁之句。七月，留大別山。甲辰二月，東行。九月，

遇仲彬於途。十月。至仲彬家信宿。彬族人宏送至杭。十一月。師與濟至寧波渡海。乙巳正月。至潮音洞。五月。自閩粵還山。十二月。命濟出丐。丙午正月。命濟往河南視王資。金焦。六月。濟還。知資。焦皆卒。八月。祭諸人於菴。丁未二月。師移居鶴慶之靜室。命空智還主浪穹。四月。師復祝髮。八月。滇寇亂。師與濟入蜀。冬。宿永慶寺。師有杖錫。南遊歲月深。山雲水月。傍閒吟。塵心銷盡無些子。不受人間物色侵之句。戊申春。聞仲彬獄死。遙祭之。秋。遊牛渚磯。師詩云。嶺猿夜泣湍波急。樹上霜紅含淚色。雲愁烟慘雨冥冥。野老吞聲談故國。十月。至漢中。遇廖平弟子。乃知平已死會稽。文奎妻平妹三歲矣。己酉五月。還浪穹。菴已焚。六月。至鶴慶山中。九月。師復蓄髮。庚戌四月。師欲廣其菴。濟空出募。七月。成。師顏之曰潛志軒。辛亥二月。師遊秦。濟從。四月。至延安。七月。入蜀。九月。抵夔。絕糧。幸有二道人給之得度。壬子正月。入楚。至公安。宿野寺。二道士初不識其貌矣。既去。乃知爲郭良。梁中節。五月。師至武昌。登黃鶴樓。仙棗亭。有何年化鶴歸之句。八月。舟下九江。九月。復至吳山。十一月。至天台。留赤城觀。癸丑。師在赤城。甲寅五月。至吳江。訪仲彬之子晟。留五日。八月。還至夔。十月。還山。乙卯三月。師遊粵西。七月。濟遇何洲於市。洲隨行。十二月。洲死。丙辰八月。還滇。仍卜築浪穹。丁巳二月。師復祝髮。欲東歸。命濟筮得兌之歸妹。曰。此女子之貞。男子則否。三月。從師復入漢中。五月。遊峨嵋。十一月。還至浪穹。戊午冬。智遁。師恐跡露。遂復入粵。己未正月。濟勸師還滇。不果。庚午春。師決意東歸。復筮得歸妹。濟拊几曰。大凶。師快快題詩寺壁。時有僧自詭稱帝。藩司以聞。詔械入京。下御史鞠。僧名揚行祥。鈞州白沙里人。以不實論死。師乃曰。吾老矣。歸葬故都何如。乃是年八月。自陳所

司上聞。九月。至京。命中官舊侍者吳亮診視。師語疇昔事數條。亮大慟不能語。返奏。詔迎入大內。號老佛。養之。濟聞而嘆曰。今日方終臣職矣。紀始末付了空遁去。不知所終。後人以爲仙去云。葉希賢。浙松陽人。以進士爲御史。侃侃自負。建文中。屢言用兵事。嘗劾耿李二大將軍失律。楊應能。杞縣人。爲吳王府教授。壬午六月。京師陷。興建文皇帝同時祝髮從亡。初出亡。諸臣皆衣葛。宿六合野店。濟抱帝足睡。希賢應能皆盡脫葛衣覆之。已從遊吳楚蜀滇間。死鶴慶。並葬於浪穹。

贊曰。臣也抱足君也。煮糜一心相從。萬死不移。探易之祕。決篋以奇。爲讀爲璞。匪彝所思。草莽君臣。間關生死。朝夕一堂。靡進靡已。生兮同袍。死兮同壘。彌次骨香。千秋不毀。

史官論曰。昔徐偃王愛民無權。曰吾賴於文德。而不明武備。及走死彭城。羣臣之不忍去。中山君出亡。挈戈隨死者二人。雖曰得士之報。要於大義有不可解者。若夫枕股易孱之事。君則失矣。臣亦未爲得也。趙襄子賞功。高赫無功而上賞。曰拘厄之中。惟赫也不失臣主。噫。臣主之義。無所逃於天地之間。甯得以有位無位論也。五蛇從龍。周流天下。四蛇入穴。皆有處所。亦計及十九年後之富貴耳。孰與程濟輩三十七年之窮老且萬死哉。善乎宛支之臣言曰。我君是事。非事國也。臣曰從君。豈曰從國。嗚呼。使人流連於此。甯能以宮中之焰輕爲抹殺耶。

